

**NATIONAL ASSEMBLY OF  
SEYCHELLES**

*Thursday 10<sup>th</sup> November,  
2022*

*The Assembly met at 9.03am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour zofisye Lasanble ki pe akonpany nou ozordi e piblik an deor ki pe swiv nou. Byenveni ankor enn fwa pou nou travay e biznes Lasanble ozordi i deba lo *Appropriation Bill, 2023*.

E nou konmans avek diskour *Leader* Lopozisyon Onorab Pillay mon envit ou pran laparol. Eskiz mon pa ankor envit Minis Hassan pou antre dan Lasanble, mersi.

Bonzour e byenveni Minis Hassan e mon war ki ozordi ou tousel pou nou deba. Nou a konmanse Onorab *Leader* Lopozisyon ou diskour silvouple.

**HON SEBASTIEN PILLAY**

Bonzour Mr Speaker. E bonzour Mr Speaker. Bonzour tou koleg Onorab. E byensir bonzour Minis. Mr Speaker pa

fer sa pa envit Minis taler dimoun i a krwar Minis in per e pa le vin ekout nou diskour ozordi bomaten. Mon'n dir li pa fer sa, taler dimoun i a krwar Minis in per.

Mr Speaker ou ava premyerman permet mon lo lapar nou lekip isi dan Lasanble pou remersye tou siporter *United Seychelles* ki ti reponn nou lapel an gran nonm pou nou *rally* Dimans le 6 Novanm. Sa ti en levennman ti en gran sikse. Laplenn ti plen!

*(laughter)*

**HON SEBASTIEN PILLAY**

Lapli ti vin konman en benediksyon!

*(laughter)*

**HON SEBASTIEN PILLAY**

Mon repet ankor laplenn ti plen ...

*(laughter)*

**(APPLAUSE)**

**HON SEBASTIEN PILLAY**

... lapli ti vin konman en benediksyon e lanbyans ti so, tre so, menm tro so menm! Nou'n reisir ranpli sa Anse Boileau!

*laughter)*

**(APPLAUSE)**

**HON SEBASTIEN PILLAY**

Nou'n penn li rouz! Alors mon dir bann sipoter *United Seychelles*. Felisitasyon!

E pou bann ki ti pe - pou bann ki ti pe misouk-misouk dan lapay e dan *pickup*, mon annan sa pou zot - *sorry* (pou nou dezapwent...) pou zot dezapwentman, me pa seye *United Seychelles* i ankor for dan sa pei!

**(APPLAUSE)**

**HON SEBASTIEN PILLAY**

Alors kontinyen misouk, misouk dan *pickup* zot!

*(laughter)*

**HON SEBASTIEN PILLAY**

Mr Speaker, mon osi le remersye bann ki'n zwenn avek *United Seychelles* Sanmdi le 6 Novanm menm bann ki pa siport nou. Akoz finalman dimoun pe konmans realize, ki pli gran lafors politik dan nou pei pou reste *United Seychelles*!

**(APPLAUSE)**

**HON SEBASTIEN PILLAY**

Alors malgre ki Gouvernman in anvoy son bann azan pou veye, sipoter *US* i annan sa pou dir zot, nou fyer nou *US* e personn pa pou fer nou per!

**(APPLAUSE)**

**HON SEBASTIEN PILLAY**

Mon bezwen dir Mr Speaker ki pandan sa pres en semenn ki'n pase, apre ki Minis in fer son diskour Bidze dan nou Lasanble, nou'n war plizyer keksoz arive. In annan plizyer reaksyon parmi nou popilasyon.

En keksoz ki'n etonn mwan mon'n menm war Minis al donn en *interview*, pou swadizan eksplik e defann son Bidze avan menm ki Lasanble i reponn son Bidze.

Minis-Minis!

Malerezman sa i paret man in *backfire* e in anmenn plis mekontantman e dezapwentman, e mon war ki Minis in menm riske ganny problemm avek son sef ler in dir ki, fer desann pri lavi se en fabrikasyon bann politisyen.

Me sa ki pli enportan, se ki sa reaksyon ki Gouvernman *LDS* ti pe antisipe an relasyon avek sa Bidze, pa'n vin en realite. A sa pwen Mr Speaker mon fer kler, ki nou tou nou apresye travay ki bann profesyonnel dan Minister Finans in fer pou ki nou annan en Bidze ki'n ariv devan nou Lasanble.

Mon oule zot konpran ki nou tou nou apresye zot profesyonnalizm e zot prezans partou dan bann Minister, i en testaman vivan sikse ki bann

Gouvernman *SPPF*, Lepep e *US* in akonpli atraver lenvestisman dan lazenes nou pep.

Me nou konnen, ki zot in travay lo sa Bidze baze lo lenstriksyon ki parti *LDS* ki dan Gouvernman in donnen. E set avek sa ki *leadership LDS* ki mon bezwen dir ozordi Seselwa la deor i mekontan e dezapwente.

Alors apre ki bokou in ganny dir lo sa Bidze i vin mon devwar e responsabilite, pou montre Lepep Seselwa ki zot reaksyon anver sa Bidze i byen fonde. Zot lakoler i zistifye, zot mekontantman e dezapwentman osi i zistifye.

Sel solisyon pou lenkonpetans sa Gouvernman, se si zot pran en desizyon ferm an 2025. Mon rapel zot ankor enn fwa ki *US* in toultan meyer opsyon pou Sesel, e atraver mon ladres ozordi, mon pou montre zot ki konman en parti *US* i konnen ki mannyer pou diriz en pei e zer son lekonomi.

Pandan sa 2an ki Gouvernman in vin avek bann Polisi ki'n fer ou soufer, *US* in sa sel opsyon pou fer tande ou lavwa! *US* in sa sel opsyon pou met Gouvernman o defi e kestyonn li lo son bann pratik.

Malgre i pa'n fasil, *US* in reste akote ou e a sak fwa ki Gouvernman in refize aksepte, nou'n redouble nou zefor e

kontinyen lager pou ou! Se nou *US* ki pa'n zanmen les tonbe! Se nou ki'n fer tande ou lavwa! *US* in reste "*fearless in dignity*" malgre tou lobstak.

**(APPLAUSE)**

### **HON SEBASTIEN PILLAY**

Mr Speaker Seselwa i dezapwente akoz zot war en Gouvernman ki konfize ler i sitan anvi fer politik, i bliye ki i bezwen diriz nou pei dan en fason serye e responsab. Olye asize e prepar byen bann baz lo ki zot pou prezant zot Bidze, Gouvernman in degaze vin anmenn en gato ki pa kor fini kwi kot serten sirtou bann ki o plase pou kontinyen manz lakrenm e ou sa Kreol la ater ou pa pou ganny naryen.

Wi Mr Speaker, Seselwa in remarke ki Gouvernman i konfize e sanz son bann largiman tro fasilman pou anbet zot. Par egzanp Vandredi Minis ti reasir nou ki Gouvernman in fer tou kalkil, balans tou keksoz an sa ki konsern logmantasyon 10poursan.

Nou ti ganny dir ki sa pou ganny donnen pou bann dimoun ki dan sekter piblik. Mon ti a kontan Minis i eksplike si sa pou enkli osi bann travayer parastatal parey dan *PUC*. Me Mardi dan son *interview* mon e

lamazorite Seselwa ti soke tann Minis dir, ki li menm i pa konnen ki kantite taks dimoun pe al peye avek sa logmantasyon saler 10poursan.

Mon ti'n ava ekspekte ki Gouvernman ti ava fer en prozeksyon taks lo *income tax* atraver sa Bidze. Nou ti ava ekspekte ki ler ou pe dir ou pe al donn pep en pti mwenza, ou'n kalkile konbyen taks pou al pran.

Me pli grav ankor ler i ti ganny *challenge* an sa ki konsern travayer dan sekter prive, larepons minis i demontre klerman ki Gouvernman LDS napa solisyon pou zot. E nou tou nou'n tann li dir avek sa de zournalis, sa i Bidze Gouvernman e pa Bidze Sekter Prive;- sa i Bidze Gouvernman e pa Bidze sekter prive. Par kont Sekter Prive atraver nou bann nouvo taks, pou bezwen peye pou ki Gouvernman LDS i akonpli sa ki son Bidze politik i oule. Minis la mon krwar ou pe al en pti pe tro lwen.

Sa ki pli soka ankor se ler Minis i dir li menm sorti dan son labous, ki pri lavi pa pou zanmen desann. I azoute ki sa zafer fer desann pri lavi, i en term ki politisyen in kree pou fer nou krwar pri lavi i desann. Me non, eski zot pran Seselwa pou bann bet?

LDS in anmenn en kanpanya asarnen lo fer desann pri lavi e ozordi enn zot bann Sef Sinyor dan zot Gouvernman, i dir nou ki sa ti pe zis fer nou krwar;- savedir zot ti pe zis anbet nou. Alors eski Prezidan Ramkalawan ti anbet nou an 2020? Pa li ki ti dir pri lavi pou desann? Eski Minis pe dir nou ki son sef in anbet pep Seselwa?

Me sa pa etonan. Zis parey ler nou pei ti lans li dan konstriksyon bann *tankers* Prezidan Ramkalawan ti premye pou kritik Gouvernman *SPPF*, me la ozordi se li avek LDS ki pe koz labous plen lo ki mannyer bann *tankers* pe fer tre byen menm par lao lekspektasyon.

Mr Speaker sa i reprezant en kriz *leadership* ki nou pei pe fer fas avek, e sa i a la baz lenkonpetans Gouvernman LDS e son mank konpasyon in plonz en gran kous nou popilasyon dan lapovrete. Apre de lannen kot Gouvernman LDS olye soulaz nou bann dimoun ki dan bezwen, zot in anmenn en politik kot leta in prefere fer lekonomi lo ledon malere, zis pou montre zot bann ki zot konn fer" politik ser sang" avek zot bann nouvo dirizan dan *IMF*.

Alors ler Minis pou Finans i vin devan sa Lasanble e koz lo sakrifis ki pep Seselwa

in fer, wi pep in fer sakrifis, me zot bann Sef non, zot in donn zot lekor nouvo *allowance*, zot in byen aranz zot, zot in *travel*, fer *retreat*, gaspiy resours leta e li pep in fer sakrifis.

Seselwa ouver nou lizye. Ler Minis i dir nou ki met R21milyon pou donn *breakfast* zanfan i en sours lafyerte, en rekonpans pou nou sakrifis, e nou menm war politisyen LDS bat lannen, bat lanmen - sa i fer lapenn.

Pa ti ava meyer si nou pep ti kapab *afford* pou donn *breakfast* zot zanfan? Ler *social safety net* i monte par R61.8milyon, eski la nepli annan labi? Eski la sa pa pe viz eleksyon? Eski i vre alors dimoun pe soufer? Alors aköz ki sak fwa Lopozisyon in sonn *alarm* lo sa size lapovrete, *leadership* LDS in rod tou fason pou bloke?

E menm al ziska *ban* bann *press conference United Seychelles*? Zot in riye e koz lo 43an, dan plas pran responsabilite sa lenpak zot bann swadizan Polisi sakrifis in anmenen lo sa pep. Sa tandans anbet pep Seselwa in vin en labitid Gouvernman LDS, e se sa ki pe fer lamazorite dimoun fistre.

Ler ou pa war okenn mansyon ganny fer lo ki pou arive avek nou bann dimoun aze, lo si pou annan en

logmantasyon pou zot osi, eski zot pa al dan menm laboutik?

Me plito ou war Gouvernman pe sey trankilman glis lamannman dan Lalwa Pansyon pou fer pansyon vin 65an, eski sa i aksyon en Gouvernman responsab? Ladan menm Minis pou Lafanmir in fek zistifye aköz i bezwen pran R1000 lo larzan sa bann dimoun aze, selman Minis pou Finans i dir nou lekonomi pe byen fer. Ankor konfizyon.

Par kont ki nou war? Dan Bidze i annan plizyer milyon - pres bilyon, ki pe ganny mete pou en bann gro proze. Pou en pake promes ki nou konnen zis parey sa lannen e lannen pase, pa pou materyalize.

Le 26 Novanm US pou organiz en gran lamars pou solider avek nou bann dimoun aze e nou bann retrete, zwenn nou, vini ansanm nou ava anvoy en mesaz kler kot sa Gouvernman, ki nou pa dakor avek sa ki zot pe fer nou nepli per e nou pa pou reste trankil!

Permet mon Mr Speaker aprezan adres sa pake mansonz ki'n ganny rakonte lo zesyon nou lekonomi dan lepase. Sa i osi viz konpetans en Gouvernman US pou zer nou lekonomi. Pep Seselwa i bezwen realize ki pandan sa de dernyen lannen in annan bokou propagann ki'n ganny

fer, pou fer nou krwar ki Gouvernman *LDS* in erit en pei avek en kof vid, e sa bann mezir ki'n pran se aköz leta ki i ti zwenn pei an Oktob. E alors se Gouvernman *US* ki ti responsab pou sa. Pli tar nou'n tann Gouverner Labank Santral dir ki napa okenn kof.

Me sa ki enteresan tou bann sironstans in ganny manipile pou rakont bann mansonz lo ki mannyer Gouvernman *US* ti pe zer lekonomi. E se ki *LDS* ki ozordi pe delivre lo nou lekonomi - sa i bann mansonz e zis parey zot kanpany lo pri lavi, sa i zis en bat latet! *LDS* in fer lekonomi avek laverite.

I bon alor ki nou met keksoz o kler, pou ki Gouvernman *LDS* i enn fwa pou tou aret anbet pep Seselwa. Annefe se bann Polisi, striktir e kad ladministrativ ki Gouvernman *US* in met an plas, ki ozordi Gouvernman *LDS* pe zis servi pou li zer pei. Se sa laverite ki i pa ankor kapab sanz nanryen.

Alor anvi ki i fermal pou Gouvernman *LDS* aksepte ki *US* in toultan annan bann bon program fiskal e monneter, Gouvernman *LDS* i prefere kre konfizyon pou anbet Lepep Seselwa. Gouvernman *LDS* i zwe bliye ki depi reform ekonomik an 2008, Gouvernman *US* in toultan

asire ki pei i balans primer fiskal par lao 2.5poursan.

E tou le lannen konsekitiv rezerv deviz etranzer dan Labank Santral in touzour par lao 500milyon *gross* e par lao 400milyon *net*. Labank Santral ti fer resorti dan son rapor 2019, ki sa ti sinifye en amelyorasyon 8.3poursan. Sesel pa'n zanmen en kales kase - kof pa'n zanmen vid!

Target rezerv deviz ti kontinyelman ganny depase pandan sa bann lannen. Sa pa ti en Gouvernman ki pe *fail*, me ti plito en Gouvernman ki ti pe konstrir en baz solid pou nou pei. Propagann *LDS* in fer Seselwa krwar ki nou ti bezwen sanzman, zot in al apre dir nou ki Sesel i parey en kales kase.

Me zot in pran sa kales kase ki'n anmenn zot partou dan lemonn *first class* depi *New York*, Lotris e menm *Formula One Abu Dhabi*. Antretan ou'n reste ater pe esper sakouy pye pou gete kwa ki tonbe - vwala ki sanzman in anmennen pou lamazorite Seselwa.

Larealite ki an 2019 avan ki lepidemi *Covid-19* i frap lemonn, Sesel ti fer balans primer fiskal 2.7poursan. Nou det ti'n ariv 57poursan nou *GDP* e ti lo, nou ti lo target pou li ariv 51poursan. Fodre note sel keksoz ki ti pe afekte nou

sa letan sete en garanti lavalan 30mil Dolar Ameriken pou *Air Seychelles*.

E sa i travay ki Gouvernman *US* ti pe fer pou asire ki *Air Seychelles* i ganny sipor leta enkli negosyasyon bann krediter *Air Seychelles* ki ti osi an demars. Tousala kontrerman a sa ki *LDS* i oule fer nou krwar.

Li *LDS* dan Lasanble sa letan ti pe koz lo ferm *Air Seychelles*, blok tou keksoz e konport li konman en nwizans, zis parey bomaten nou pe war. Pa bliye sa letan i ti pe fer propagann *Seychelles Airline*.

Me apre ki i ti vin dan Gouvernman i ti sanz son *tune*, e deswit fer krwar ki se li ki'n negosye rediksyon det *Air Seychelles* avek *Abu Dhabi*. Kan sete Gouvernman *US* sa letan ki ti komans negosyasyon e fer demann avek bann krediter ki sa bann det i ganny redwir. Parey labitid Gouvernman *LDS* in zis pran laglwar lo travay Gouvernman *US*.

Malerezman avek restriksyon global anvi lepidemi *Covid-19* ki ti deteryore an Mars 2020, tou pei o monn ti war son lekonomi ganny afekte, me li *LDS* ti dir i annan en baton mazik.

An 2020 e sa Me, *IMF* ti fer resorti ki tou bann

lakonplisman Sesel anver son lavans ekonomik depi 2008 pe ganny seryezman afekte. Alor i ti aprouv \$31.3milyon koman *emergency financial assistance* pou Sesel.

Gouvernman *US* ti reakte vitman par bann mezir imedya pou kontenir *Covid-19* par ferm nou teritwar, ranforsi bann Polisi repons lasante e sirtou pou bann endividi dan biznes. Sa *LDS* pa koz lo la. Zot osi pa koz lo la kantite dimoun ki'n mor ek *Covid* apre Oktob 2020 akoz zot ineksperyans e lenterferans politik dan travay bann profesyonnel.

Me sa ki enteresan, ler sa bann mezir ti ganny anonse dan lamannman Bidze 2020 an Avril 2020, bann mezir pou sov nou pei, *LDS* sa letan dan Lopozisyon ti sey bloke sa zour. Akoz Minis Finans ti vin dan Lasanble e sesyon ti kennsel akoz *LDS* ti anvi met nou pei lo son zenou. Zot ti blanm Gouvernman *US* e apre servi menm leskiz ler zot ti vin o pouvwar.

Zot ti konvenk pep Seselwa ki sa ki Gouvernman *US* ti pe fer ti mal. Me ki nou'n war apre Sesel pa ti lesel pei ki ti met an plas sa bann mezir efikas, e kontrerman a sa ki *LDS* i kontinyen dir. Si zot dir nou, nou annan labi dan *FA4JR deal* ek sa labi.

Mon ankor pe esper rapor lo konbyen bann antite ki'n konmans fer repeyman anba *FA4JR*. Alor, fotespere Gouvernman *LDS* i arete fer son bann propagann poudir ki i pe fer progre lo nou lekonomi apre move zesyon Gouvernman *US*. Kan annefe depi avan 2020 Sesel in touzour arive atener tou bann target ekonomik e fiskal e pei ti deza lo en bon semen devlopman.

Alor mon le dir Minis, si lemond i war nou bann performans eksepsyonnel parey i pe dir, ozordi sa pa sirprann nou lo sa kote latab. Nou'n abitye atener sa bann bon performans depi menm avan sa dernyen 2an ki zot *LDS* in vin o pouvwar.

Sa i akoz nou bann bon fondasyon ki nou'n met an plas e ki prezan *LDS* pe servi pou li zer pei lo la. Aret malonnet omwen dir mersi! Ler nou war zot pe al *COP*, pe koz *blue economy*, pe koz *climate change*, tousala i baze lo sikse Gouvernman *US*. *LDS* in deza menm refize pou annan en Komite lo *Climate Change* dan Lasanble Nasyonal.

Pou kontinyen demontre mansonz dan Bidze *LDS* not byen ki an Avril 2020 nou rezerv ti 591mil \$591milyon. E lakantite rezerv ki ti a dispozisyon pei ti \$439bilyon.

Sa ti vedir ki pei ti annan ekivalan demann pou deviz etranzer pou en peryod 7.8mwan an 2019. Sa ki tou Seselwa i bezwen konpran si Gouvernman *US* pa ti'n met sa bann Polisi an Avril 2020, nou lekonomi pa ti pou'n rekipere parey i pe fer ozordi. Alor ler *LDS* i vin koz 10poursan logmantasyon, konmsi sa en kado ki i pe donn ou, sa i fo! Sa i sakrifis ki ou'n fer avan *LDS* i vini.

Annou get en keksoz enteresan, Labank Mondyal ti fer resorti ki pandemik *Covid-19* in afekte progre ki lemond pe fer pou redwir lapovrete. Prozeksyon Labank Mondyal se ki an 2020, lapovrete dan lemond ti pou'n sorti 8.4poursan an 2019 pou ariv 7.9poursan an 2020.

Malerezman avek *Covid-19* plis ki 150milyon dimoun dan lemond in kapab war zot dan lapovrete e sa an 2021 osi parey. Savedir si Gouvernman *US* pa ti'n met an plas bann Polisi efikas, kot bokou nou sitwayen ti pou war li ganny trennen dan lamizer, difikilte e soufrans.

Sete Gouvernman *US* ki ti asire ki bann endividi e biznes i garanti en saler e larzan, pou zot kapab mentenir zot bezwen debaz e evite ki nou osi nou war nou dan lapovrete, konpare avek



bann lezot pei ki pa'n kapab asiste zot sitwayen.

Me apre Oktob 2020 lenkonpetans Gouvernman LDS in kontribye pou agrav sityasyon e sa ki US ti pe sey eparnye in arive. Bokou, bokou plis Seselwa in tonm dan lapovrete. Nou'n war zot koup lamazorite *scheme* zis apre pou re entrodwir sa bann menm *scheme*. Kot ler en Minis pe ganny *housing allowance* R25mil, en senp *part rental* R2mil500 ou pa ti oule donn dimoun.

Al rod en lasistans kot ASP ti'n vin difisil. Zot largiman koup labi ti fer ki zot bann Polisi liberal in met bokou dimoun dan lapovrete. En keksoz ki drol se ki tou mezir ki Gouvernman US ti met an plas avan Oktob 2020 in fortman ganny siporte par Labank Santral.

E Minis Finans ti en teknisyen laba, zistifikasyon sete ki Gouvernman i bezwen asir stabilite finansyer. La ozordi i dir nou ki ti responsab e LDS ti erit pei avek selman R14milyon an Desanm 2020 dan kont Labank Santral. LDS pe *mislead* dimoun.

Ler bann Labank Komersyal pa ti aste *Treasury Bills*, Gouvernman US ki ti siny lagreman avek Labank Santral pou ganny likidite e se sa fasilite ki Gouvernman LDS ti pran an Desanm 2020 pou

kontinyen finans depans Gouvernman. Ti pou napa okenn problem pou pey saler dimoun, parey Minis i vin dir nou zot in bezwen garanti saler.

Ziz sa pou zot menm, si pei ti sitan dan mal, akoz ki *Cabinet* antye ti fer monte zot bann *allowance*? Akoz ki deswit apre pran pei Gouvernman LDS ti konmans *travel* partou? Kote nou ti ganny larzan pou aste nouvo loto pou Gouvernman deswit-deswit?

Sa i demontre ki mannyer Gouvernman LDS in manipil laverite. Servi bann stratezi ki Gouvernman US ti met an plas, e apre fer krwar ki pei ti'n faid. Ler zot dir US ti pe mal zer pei sa i fo. Kan o kontrer sa bann Polisi e stratezi ki Gouvernman US ti'n fer, in asire ki nou lekonomi in kontinyen ganny zere efikasan, an vi ki tou bann risk ti'n ganny prevwar.

Larealite i se ki ler Gouvernman LDS in pran pei in zis kontinyen avek sa fondasyon ki Gouvernman US in met an plas, e i pe fer krwar ek Lepep Seselwa, ki se li ki'n sov nou pei. Ankor mansonz.

Alors mon mesaz pou Seselwa i senp, si nou'n pas dan tou sa soufrans parey Prezidan li menm ti dir a lokazyon son diskour 2an dan nou Lasanble, i zis akoz nou

annan en Gouvernman ki'n prefere sey fer politik dan plas fer sa ki byen pou son pep.

*US* in toultan annan en plan pou sa pei me *LDS* pa'n oule war sa son politik bloke depi 2015 in ganny fer pou anbet ou, ki *LDS* i annan tou solisyon, me malerezman i napa. Zis parey ozordi i pe admet ki pri lavi pa pou desann *LDS* in anbet ou! Seselwa, *US* in toultan ou meyer opsyon e *US* in toultan annan kapasite pou zer lekonomi.

Pou tro lontan nou'n les zot pil lo nou e zanmen nou'n ganny sans pou adres zot bann demagozi lo nou sityasyon ekonomik. *LDS* in fer son mye pou re envant listwar pou satisfere son azanda politik. Ozordi bokou dimoun pe konmans war kler, menm bann ki'n al devan *TRNUC* e bokou pe konmans akseptere realite "*they lied to us.*"

E sa i lakle problem nou pei. *LDS* li pa'n kapab akseptere depi 2020 ki in bat latet Seselwa, an sa ki konsern vre sityasyon ekonomik. Lo en kote i ti pe dir nou ki nou pei in faid, lo lot kote depans en pti 3milyon pou al lo zil ti *ok*. Note ki malgre nou ti pe ganny dir kof ti vid e napa larzan pou lepep, Gouvernman ti annan larzan pou li fer lekstravagans.

Son politik 'kof vid' in fer li pran bann mezir pou prouve kof i vid e gard depan pep Seselwa. *LDS* in azir dan en fason iresponsab. I ti'n kapab anmenn soulazman pou bokou dimoun e sa bokou pli boner, me in bezwen gard son riz 'kof vid' e 'kales kase' Gran perdan dan sa zwe politik se Lepep Seselwa.

Les mon aprezan adres serten bann mezir bidzeter ki Gouvernman *LDS* pe propoze. Premye size ki nou bezwen aborde la se pri lavi. Dan son ladres Minis Finans pe dir nou ki pri lavi ti pou bokou pli o, si Gouvernman pa ti'n pran bann aksyon nesaser.

Sa ki nou, nou konnen e se ki tou Seselwa la deor i konnen, se ki pri lavi i tre o dan Sesel aktyelman. Al aboutik avek R500 e ou a dir mon ou menm. Kestyon se ki aksyon Minis pe koz lo la, si li menm in admet ki i pa krwar ki pri lavi i desann, e ki sa i en fabrikasyon politisyen enkli li menm, alors ki nouvo mansonz i pe sey tap nou avek?

I dir nou ki to lesanz ozordi i par anba R15 e sa i gras a *LDS*;- savedir ki nou rounpi in apresye depi 2020. Be si ou napa ase Rounpi pou depanse ki ou pou depanse, kote ou pou al aste keksoz? Sa ki Minis pa dir nou se ki anvi ki pri lavi i deza tro o, e

Seselwa napa larzan pou li kapab aste bokou plis komodite parey avan;- R500 pa vo nanryen dan laboutik ou a ganny 4 ou 5 keksoz e larzan i fini.

Seselwa in war li neserer pou koup son depans, akoz pri komodite e lezot byen e servis in ogmante. Sa rediksyon dan demann in fer ki napa bokou demann ouswa presyon lo deviz etranzer parey avan, alor to deviz in apresye.

Sa ki nou osi konnen e sa ki nou'n war, sa ki nou'n ganny dir, i se ki Gouvernman LDS ti promet i pou redwir pri lavi, e in fer bokou propagann dan lepase dapre li pou fer pri lavi desann.

LDS ti pas dan tou keksoz pou fer Lepep Seselwa krwar ki i annan solisyon lo pri lavi. Me la ler ozordi i pran pei, LDS i dir ou pri lavi pa zanmen desann. Fodre ki nou *hold* sa Gouvernman *accountable*. Annou met presyon lo li pou li fer desann pri lavi dan sa pei, oubyen annou demann nou lekor eski Gouvernman LDS pe sey protez serten endividi oubyen Sekter Biznes ,ki pe kontinyen ronz nou pep?

Sa ki nou rapel se ki Prezidan ti pou al rod meyer *middlemen* avek STC, pou anmenn komodite pli bon marse. Zot in ferm bann *outlet* STC lo Praslin e La Digue, apre tou kanmi- kanmi rod lot

fason pou ouver. Anba administrasyon LDS, STC ki zot ti a en moman dir fermen, pe fer konpetisyon direk avek Sekter Prive dan plizyer domenn. Plizyer labi lo resours pe arive dan sa lorganizasyon.

Serten gro akter pre ek LDS pe monopoliz sa lorganizasyon. Bann ki napa sa kontak in ganny kit ater, e nepli annan latransparans dan sa ki pe pase kot STC.

Me sa ki zot krwar se ki dimoun pa pou koze? Petet ti ava bon si Minis ti kapab adrese si STC in nobou reklanm sa plis ki \$80mil ki'n depanse pou aste disik. Zot ti koz latransparans ozordi zot sey kasyet e *cover up* tou keksoz. Gouvernman LDS in osi finalman anons son logmantasyon saler. E sa mon krwar tou dimoun pe espekte ki mon dir en keksoz lo la.

In deside ki sa i pou fer li atraver en logmantasyon 10poursan. Ozordi pou LDS en logmantasyon par poursantaz lo grid saler i *ok*. Sa i enteresan, Minis in dir Mardi dan son *interview* ki sa i normal, se koumsa ki logmantasyon i bezwen ganny fer.

Savedir sa ki ganny plis a ganny plis e sa ki ganny mwens pou kontinyen ganny mwens. Kestyon eski LDS in sanz son *tune* depi Oktob

2020? Akoz ler logmantasyon saler ti ganny propoze lo en baz 5poursan an 2020, *LDS* ti bloke ti fer en pake nwizans e Gouvernman pa ti kapab donn sa logmantasyon.

Akoz alor zot ti fer tou sa tapaz? Akoz zot ti dir ki tou dimoun i devret ganny parey? Nou kapab *trust LDS!* Ase pran Seselwa pou bann bet. La savedir i normal pou en dimoun ki ganny 40mil par mwan pou ganny en logmantasyon R4mil par mwan, konpare ek sa drayver ki pe ganny li 6mil641 ki pou ganny li R1000?

E son logmantasyon i a vin R7mil641. Sa i vedir tou dimoun anba 10mil pe ganny R1000 be akoz zot pa ti zis dir sa? Akfer koz poursantaz kan ou ti pe donn tou dimoun R1000? Me la i annan en keksoz ki travayer i bezwen konpran, anplis ki sa, pran en travayer ki ler ou azout son *allowance* son saler i vin R9mil.

I vedir ki i pou ganny R900 en *top up* R100 pou fer ki i pou ganny R1000. Lo sa R1000 i pou bezwen pey taks R217 e 4poursan *Pension Fund*, alors i pou ganny mwens ki sa R1000. Akoz ki Gouvernman pa ti zis dir *ok* nou pe donn en *flat* R1000 tou dimoun anba R10mil e nou pou *offset* taks e pansyon? Savedir ki tou dimoun pou al

kot li tou dimoun ki anba R10mil, i al kot li avek R1000 an plis, sa ti ava pli senp e pli fasil pou dimoun.

Fodre travayer i osi note ki *LDS* pe konsolid sa 5poursan *supplementation allowance* ki ti ganny entrodwir an 2019. Ler zot ti pe sey blok logmantasyon saler dan Gouvernman, si zot pa ti'n anpes Gouvernman *US* donn logmantasyon saler an 2019, ozordi zot pa ti pou bezwen konsolid sa *allowance* dan saler travayer Gouvernman ki'n perdi peyman lo 13enm mwan saler pandan 2019.

Anplis ki sa nou war ki *marketable skills allowance* osi pe konsolid dan saler debaz. Pou bann *graduates* sa i serye pou zot *marketable skills allowance* i ganny servi pou ankouraz travayer ogmant zot kalifikasyon e ganny reminere pou zot zefor.

Ti a bon konnen ki pou arive prezan pou ankouraz travayer avek diferan nivo kalifikasyon? Ki *LDS* i annan plan pou fer? Nou bezwen realize ki Servis Piblik Sesel i konman en e i en pti pei, i annan bann ka bann defi kapasite resours imen serye.

Sa konsolidasyon *marketable skills* pou koz bokou fristrasyon, kot i pou anpes travayer ganny reminere pou zot kalifikasyon

e pa rekonnèt diferans dan kapasite bann travayer. Prezan mon annan en mesaz spesyal pou bann *nurse* e bann *teachers*, e lezot travayer ki ti pe ganny en *long service allowance*.

Pa bliye ki *LDS* in koup logmantasyon dan *long service allowance*. Mazinen en *teacher* avek 21an dan *teaching* sa lannen i ganny en *basic salary* selman R11mil.

E in perdi son R500 *long service allowance* ki pa *fair*. E sa larzan dan mon lopinyon in aprezan vin dan sa 10poursan. Sa i vèdir dan sa R1100 logmantasyon ki sa *teacher* oubyen sa ners pou gannyen, R500 ladan i son *long service allowance*.

Savedir pou sa *teacher* ek sa ners ou'n ganny zis R600. prezan pa bliye ou pe al pey taks lo la. I iresponsab lo lapar *leadership LDS* pou sey fer krwar Seselwa, ki i pe donn li en pli bon *deal* kan saler i pe donn li en kabri dan sak!

**(APPLAUSE)**

### **HON SEBASTIEN PILLAY**

*US* i konsernen ek bann tel lapros, aköz si sa logmantasyon pe pran lefe an Avril 2023 aköz ki sa logmantasyon pe pran lefe an Avril 2023 e non pa Zanvyè 2023?

Akoz ki en lannen pou bann travayer Seselwa i konmans Avril 2023, me logmantasyon sa logmantasyon *allowance* pou bann Minis ti konmans deswit? Si sa larzan in ganny bidzete aköz ki nou pa pe konmans sa logmantasyon an Zanvyè? Nou demande ki si *LDS* i serye tou bann travayer i ganny *back dated* zot saler depi Zanvyè.

**(APPLAUSE)**

### **HON SEBASTIEN PILLAY**

Sa i a vreman montre si Gouvernman i serye avek sa logmantasyon. Nou ti a kontan osi war sa grid saler ki Minis pe koz lo la. E pa fer parey avek Lalwa Fon Pansyon pa vin sey pas li an misouk, misouk, fer li vin devan Lasanble e nou a regard lamannman ki zot pe propoze. Anmennen nou a gete.

E dezyenm nou pe osi esper lamannman dan Lalwa pou bann *Constitutional Appointees*, pou nou war relman ki Gouvernman *LDS* pe propoze pou bann Sef. Lo en lot kote sa logmantasyon pa tous ditou bann travayer dan Sekter Prive, e se zot ki anmenn plis larzan ek reveni pou nou pei. Zot in ganny kit ater.

Pli gro logmantasyon ki travayer in deza gannyen dan

Sesel se 20poursan e sa sete an 2014. E la Gouvernman lepep sa letan ti anmenn soulazman pou tou sekter. Bokou zot in apros mwan e plizyer zot in *call* mwan apre sa *interview* ki Minis Hassan in donnen. Kot in menm dir ki sa se Bidze Gouvernman parey mon'n anonse oparavan. Mon oule dir ek Minis ki i annan bokou mekontantman.

Travayer sekter prive i dir ou se sekter prive ki kontribye pou Gouvernman annan Bidze. Eski alors nou pou les nou bann ser ek frer anpandan? *United Seychelles* lo son kote i dir non! La deza avek inefikasite Minister Lanplwa, plizyer nou bann frer ek ser pe konplent move tretman dan serten landrwa travay.

E sa zafer *performance system* an sa ki konsern 13enm mwan pa koz lo la;- in vin en *nightmare*. Eski LDS i vremen konekte avek sa ki pe arive ozordi? Avek lanons ki lasistans tanporer pe al arete an Avril 2023, *US* i proteste lo lapar travayer Sekter Prive e egzize ki zot devret ganny en *better deal*!

**(APPLAUSE)**

### **HON SEBASTIEN PILLAY**

Prezan annou regard sa byen Lepep Seselwa - sitan *LDS* i konfize, dan son diskour 2an

dan Lasanble Prezidan Ramkalawan i dir ki 2023 lasistans tanporer pou vin permanan, tou dimoun i bat lanmen dan Lasanble! Nou *US* nou pa ti la. Me ler me Minis Finans i dir ki lasistans tanporer pou arete an 2023, ankor en fwa zot bat lanmen.

Nou tou nou'n war Prezidan admet dimoun in soufer, zot bann mezir i montre zot pe sey adres soufrans sa pep, me sa ki enteresan si pa ti nou *US* sityasyon ti pou pli pir! Se nou ki'n met presyon! Alors eski ti neser met tou sa presyon e enstil tou sa soufrans dan dimoun, zis pou zot sey prouve kales in kase e kof ti vid?

*LDS* in *let down* travayer Seselwa dan Sekter Prive! Gouvernman i devret imedyatman konmans travay lo en *supplementation of package* pou travayer dan Sekter Prive. Si ou pe rod taks ek zot anplwayer ou devret kapab pas serten sa benefis avek zot. Revwar sa formil ki donn zot zis R40, omwen zot osi zot a santi ki i annan en keksoz pou zot dan sa Bidze apre tou zot osi zot Seselwa.

Sa ki nou pe dir i a ed dimoun fer fas avek larealite lavi ozordi;- pri elektrisite ek delo ki met presyon lo dimoun, pri bis ki met presyon lo dimoun. Mezir en Gouvernman i devret

konpreansiv e non pa gout par gout zis pou sey *score* pwen politik.

E ler nou pe koz lo mezir konpreansiv Mr Speaker mon fer en pledwari pou nou bann pansyoner e retirete. Nou bann dimoun aze pa pe ganny gete anba sa Gouvernman. Ozordi bokou zot i viv zis lo sa ozordi bokou zot i viv zis lo sa pti R5mil ekek.

Avek defayans dan sistenm lasante, bokou pe bezwen depanse pou aste latizann. Bokou i servi en pti pirat pou al anvil, rod en dimoun pou netway kot zot, grat zot pwason menm bann ki ganny plis ki sa pti R5mil 550 i apros mon e dir mon pou koz pou zot.

Pou bann ki dan *home* par kont Minis Zialor ti zistifye pran R1000 avek leskiz ki Gouvernman pa kapab *afford* pou *maintain* bann *home*. Selman Gouvernman pe al depans pres pou ki R1.4 bilyon dan proze kapital.

E *MNA LDS* i bat lanmen ankor - *come on!* Lannen pase en pake larzan zot pa ti kapab depanse dan proze kapital e sa lannen in parey. Mon sizesyon ki Gouvernman i retourn lo sa desizyon pou pran R1000 ek sa bann dimoun.

E dan mezir ki ava montre vreman zot annan konpasyon, donn en

logmantasyon dan sekiritre sosyal.

**(APPLAUSE)**

**HON SEBASTIEN PILLAY**

Aprè tou nou bann dimoun aze, nou bann pansyoner, nou bann retirete zot al dan menm laboutik parey tou dimoun e la marsan pa donn zot *discount* akòz zot par lao 63an. Mr Speaker mon swete ki Gouvernman i reponn pli byen a sa lapel, pou pran bann mezir ki serye pou adres difikilte ki nou pep pe fer fas avek.

I osi neserer ki enn fwa pou tou *LDS* i adres sa mank *leadership* dan plizyer sekter kle, e konsider zot langazman pou annan plis latransparans.

Ler i ti sermante, Prezidan Ramkalawan ti promet ki sa dimoun ki vin *Leader* Lopozisyon dan Lasanble, pou ganny tou sipor, ozordi ou bezwen tir ou zong e lager e redi ou seve, pou rod leklersisman e demann kestyon dan sa pei. Oli sipor?

Sekreter Prensipal, *CEO* i ganny sispann e lepep pa konn nanryen. *MNA LDS* i reste trankil. Antretan Bidze pe ganny prezante pou sa bann departman e lorganizasyon, ki anba sa responsabilite sa bann dimoun. Sa fason fer keksoz pou kasyet e menm

touf keksoz pe konmans vin tro frekan ozordi.

Par egzanp ler Minis in dir in met en Bidze pres ki R1.2bilyon pou Sekter Lasante, fodre ki nou koz lo sa bann defayans dan Minister Lasante ozordi.

I reel ki moral *staff* dan Minister Lasante i tre ba, *leadership* lasante, i dekonekte avek larealite ki *staff* pe fer fas avek e bokou Seselwa pe konplent nivo servis ki zot pe gannyen. Nou kapab met tou nou milyon dan lasante me si, me si nou napa en bon *leadership* nanryen pa pou marse.

Yer menm en madanm Anse Royale in ganny preskripsyon ler in al kot dokter. Me ler i al kot farmasi napa latizann. Sa pa akseptab! Nou drwa bann travayer lasante osi en *better deal*. Bokou i ankor pe konplent serten *allowance* ki zot pa'n ganny peye e zot dezapwente avek sa lodit lo Fon *Covid*, ki pa'n donn montre nou egzaktman mannyer bann larzan in ganny depanse.

Nou osi konnen ki serten dokter etranze pe arete e pe kit pei. Eski pou annan en kriz tre byento dan servis swen lasante? I paret ki tou dimoun i okouran a leksepsyon Gouvernman *LDS*. En lot sekter ki bezwen

seryezman dres li se sekter ledikasyon. Sa zafer fer plan lo plan apre fer plan, ase! Get dan *welfare* bann *staff*, espesyalman bann *teachers* ki bezwen delivre lo sa bann plan.

Nou annan bon baz dan nou sistenm ledikasyon. I annan plizyer dimoun kalifye ki si zot ganny sa sans zot kapab delivre. I pa akseptab ki *Scheme of Service* bann *teachers* pa pe ganny revize dan bann lannen ki pe vini. Tro bokou *teachers* ki pe *retire*, pou depan lo sa pti revizyon *scheme*, pou zot ganny en *retirement* an dinyite. Alors mon dir ek Gouvernman si bann *scheme* pa pe ganny revize tenir sa Lalwa pou fer laz *retirement* vin 65an silvouple.

**(APPLAUSE)**

### **HON SEBASTIEN PILLAY**

Sekter lord ek lape i osi bezwen ganny plis latansyon. Fodre aret annan lenterferans politik dan travay Lapolis. Nou pa kapab annan en sityasyon kot en zofisye Lapolis i ganny tape e la mon pou dir ek en transpor par en Minis, e dan plas al kot sa gard, sa Depite Komisyoner i taye i al kot sa Minis, ler sa gard li i pe soufer ater.



**(APPLAUSE)****HON SEBASTIEN PILLAY**

Nou demande ki sa ka i ganny trete seryezman. Mwan mon'n swiv sa ka. Sa zofisye pa pe ganny trete parey i devret. E mon demande ki Komisyoner Lapolis i pran aksyon serye an relasyon avek sa ka!

Met R95.9milyon dan Bidze san bon *planning* pa pou abouti dan nanryen. Bokou zofisye lapolis e menm bann zofisye prizon i tre friste.

Serten promes ki ti'n ganny fer - serten keksoz ki ti'n ganny dir, kot 80poursan gard i swadizan LDS dapre Onorab Ferrari sa letan, pa pe materyalize. Gouvernman i bezwen adres sa bann defayans. E la eski lepep pe note ki serten lakonpanyen prive pe ozordi vin *de facto* Lapolis dan nou pei? E i pou enportan ki nou regard lo ki mannyer kontra pou sa bann proze sa swadizan *de facto* nouvo Lapolis i vini.

Eski Sesel byento pou annan en milisya pou bann ki'n dan milisya zot a konn sa pli byen ki mwan. Mon ti a kontan aprezan vir mon latansyon lo Sekter Prive e sa bann nouvo taks ki pe ganny entrodwir e la sirtou bann anplwayer bann *businessmen*.

Ozordi nou war Gouvernman LDS pe al met an

plas en taks lo bann lasanm dan bann pti e mwayen lotel. Selman Gouvernman fek fer en revi taks ki pa ankor ni menm ganny enplimante.

Sa i en taks R25, R75 e R100 pou sak nwit dan sak lasanm depandan lo lakantite lasanm lotel. Alor lentrodiksyon en taks lo lasanm i vin konman en Polisi Taks ki pe fer nou regrese lo nou sistenm taks.

Akoz dapre sa ki Minis ti pe dir nou bann taks koumsa i azout plis fardo lo ladministrasyon taks. Minis in retourn lo son parol. Dan plas adres bann defi lo *transfer pricing* ki plizoumwen ganny fer par bann gran lotel, Gouvernman in deside entrodwir en nouvo taks, ki pa zis met plis fardo lo bann pti e mwayen operater lotel ki ganny opere par nou bann Seselwa.

Mon not byen - not byen bann pti e mwayen lotel ki ganny *operate* par nou bann Se..sel..wa - mazin byen. Sa ki Minis in lir lo son rapor i ti pou'n war ki nouvo rezim taks ti pran lefe e 30poursan bann lakonpanyen Sekter Tourizm pe raport en *taxable income* pozitiv ki anba *tax threshold*.

Sa i vedit sa letan zot pa ti pey taks lo sa premye R150mil ki zot ti pe fer, la ou pe al fer zot pey taks. Alor sa revi lo biznes taks ti fer ki tou

biznes i konmans pey taks lo premye Roupi profi, Gouvernman in retourn lo la.

Gouvernman pe al alor re entrodwir taks lo reveni par met 2poursan lo reveni bann mwayen e gran lotel. Sa i fer ki prezan bann lotel pran plis pey *TMT* e zot pou osi pey en taks lo reveni.

Mon *hope* ki sa pa afekte *service charge* bann travayer. Sa pou osi defigir nou sistenm taks, akoz dapre Minis sistenm taks mannyer nou ti pe *manage* ti mal avan i ti anmenn lamannman e ozordi i *go back* lo son bann prop lamannman.

I nesaser ki Gouvernman i fer travay pou adres problenm *transfer pricing* imedyatman, dan plas ki debalans e destabiliz nou sistenm taks. Me par kont nou kapab konpran akoz Gouvernman pe met sa de nouvo taks lo Sekter Tourizm.

An total Gouvernman i prezimen pou kolekte 280milyon lo sa de taks - 162milyon azout 118milyon. Sa i pou servi zisteman pou li kapab finans son bann gran depans politik ki i pe al fer. Sa i prouve ki se Gouvernman *LDS* ki pa responsab!

Akoz dan plas asire ki anmezir pei pe rekipere parey i pe dir e ki nou ankor vilnerab parey i pe dir avek bann devlopman enternasyonal

parey i pe dir, nou pa depans plis konpare avek sa ki nou kolekte. Gouvernman i alor war li nesaser pou bezwen rod finansman, par entrodwir nouvo taks lo Sekter Tourizm, zisteman pou li kapab pey sa ki'n *plan* dan son Bidze.

Alors sa Bidze i Bidze Gouvernman e pa Bidze Sekter Prive. Se prezan ou bann *businessmen* ki pe al anmas fardo an plis ek bann taks ki ganny mete lo ou reveni, konpare avek lafason ki en taks i devret ganny mete lo profi.

An sa ki konsern sa taks flat lo Sekter Lapes, mon bezwen riye. I bon note ki sa propozisyon mon pa tro konnen ki diferans i pou anmennen pou sa sekter. Akoz rapor *OECD* ki Minis ti koz lo la an 2019 - ti fer an 2019 - ti montre ki selman de biznes dan Sekter Lapes ti pe raport en profi ki par lao R250mil an 2017.

Savedir lamazorite ti pe fer profi pli ba ki R250mil. Alor nou pou donn en rezim spesyal flat 15poursan, ki pa pou nesaser. Petet i a fer serten diferans. Ankor enn fwa i ava al depan lo Minis pou eksplik nou kote, kote zot pe takse sa bann dimoun dan Sekter Lapes ki nou pou ganny sa larzan?

Fotespere la osi napa en lapo bannann pou bann

dimoun dan Sekter Lapes. Ler mon pe terminen Mr Speaker me mon oule ankor enn fwa dir ki sa Bidze ki'n ganny prezante devan nou Lasanble, i en Bidze politik pou fer *damage control*. Gouvernman LDS pa senser!

E se e zot mon bann frer ek ser dan Sekter Prive, se zot Lepep Seselwa ki pou pey lepo kase. LDS in realize ki son baz sipor politik in desann. Sa lefori sipor ki i ti annan an 2020 in ale. Seselwa nepli aste lagrenn bat latet.

Tou son bann nouvo mezir taks, tou sa ki nou pe war i dan en sel bi, en sel bi se permet Gouvernman depans plis ki R700milyon konman finansman Gouvernman dan proze kapital. Mon repete - permet Gouvernman depans plis ki R700milyon konman finansman Gouvernman dan proze kapital.

Mon rapel tre byen lo *Reply* pou Bidze 2010 sa ki Prezidan Ramkalawan ti dir, i ti dir ki Gouvernman SPPF sa letan ti pe met gro, gro sonm dan Bidze ki i pa pou depanse, apre fer krwar son Gouvernman in fer *savings*, be ki son Gouvernman pe fer la?

2020 nou'n war *savings*; 2021 nou'n war *savings* e la 2022 pa nou fek war *savings* ankor? Savings ki pa *savings* lo proze kapital ki pa ganny

fer, lo *recruitment* ki pa ganny fer.

Sa ki enteresan Mr Speaker sa lannen nou'n war ki to efikasite Gouvernman lo proze ti par anba 40poursan. Sa Gouvernman sa i vedir ki Gouvernman i riske kapab depans pa plis ki R300milyon lo proze kapital, baze lo son kapasite pou abzorb sa bann proze.

E la mon swete ki finalman Lopital Baie Lazare i a ganny fer, apre 3an promes. E mon demande osi ki sa kontrakter Seselwa *class 1* oubyen *class 2*, i ava osi ganny en pti keksoz dan sa 700milyon ki pe al ganny depanse. E ki pa tou proze i ava e tou proze pa ava al pou GICC, ki Gouvernman in deside konman son nouvo *pet* kontrakter ki fer tou proze pou Gouvernman.

Sa ki mon pe propoze Mr Speaker se fer sir ki larises i vreman ganny partaze avek tou dimoun dan sa pei. Ler pei i dan kriz parey ou kontinyen dir nou Minis, eski i fer sa bann depans dan bann proze kapital? Pa zot devret ganny kontrole? Eski Gouvernman pa devret depans plis dan saler lo bann byen, e donn priyorite bann keksoz parey bann servis?

Me sa ki nou kapab war pou ki Gouvernman i fer tou sa bann proze kapital e osi fer

en sirplis 1.1poursan parey Minis pe dir nou, Minister Finans, Gouvernman LDS pe enpoz bann gro, gro taks lo Sekter Tourizm e sekter prive.

Si sa de taks pa ganny fer Gouvernman pou war li fer en defisit fiskal. Antretan nou ankor pe espere pou kontiny pou nou konnen konbyen *Travizory* pou kontribye konman reveni pou Gouvernman lo biznes.

Konbyen *Travizory* pou kontribye, me selman biznes Seselwa li ou kapab deswit met taks e egzize ki i kontribye. Pou larestan Seselwa, Gouvernman i anvi depans R700milyon, selman i pa kapab donn tou donn tou dimoun aze en logmantasyon sekirite sosyal. I pa kapab fer desann pri bis; i pa kapab fer desann pri elektrisite ek delo, i pa kapab donn ou en logmantasyon saler ki prop e kler, e pou ou en lannen i konmans an Avril pa an Zanvye.

I pa kapab donn en logmantasyon saler ki pou tou ki dan sekter prive, malgre se ou ki pou bezwen travay ki ou anplwayer i kapab fer sa reveni, ki sa Gouvernman pou bezwen pou li depans sa R700milyon. I pa kapab ogmant *allowance* pou nou bann etidyan pos-segonder. I pa kapab tenir lo Lalwa pou fer laz *retirement* vin 65an.

Gouvernman e dapre son Minis pa kapab fer desann pri lavi aköz parey in dir sa ti zis en fabrikasyon.

### **MR SPEAKER**

Ou ti pe al konklir Onorab. Ankor en minit.

### **HON SEBASTIEN PILLAY**

I pa kapab donn ou lasistans ler ou'n vreman bezwen en lasistans ek Lazans Proteksyon Sosyal - in fer ou ale, vini. I pa kapab ed ou biznes ler i dan difikilte. Plizyer santenn pti biznes in frenmen.

Be si sa Gouvernman LDS pa kapab fer nanryen, eski ou pou kit li la 2025? Desizyon i avek ou ser, frer Seselwa. Antretan mon a dir zot sa, mark sa dat le 26 Novanm desann zwenn nou e nou ava lans en mesaz kler avek sa Gouvernman;-

Seselwa i bezwen en meyer opsyon! Seselwa i anvi en meyer opsyon! Mersi Mr Speaker.

**(APPLAUSE)**

### **HON SEBASTIEN PILLAY**

Mon demann ou leskiz Mr Speaker mon'n al 4minit par lao mon letan.

### **MR SPEAKER**

Mersi Onorab. Nou aprezan pran diskour Onorab *Leader*

Biznes Gouvernman Onorab Georges.

**HON BERNARD GEORGES**

Mersi Mr Speaker. Bonzour Mr Speaker. Bonzour Minis. Bonzour tou mon bann koleg Onorab dan sa Lasanble. E bonzour tou bann dimoun ki pe swiv nou dan lakour.

Mr Speaker ler ou'n benny ou lisyen, ou'n donn li *shampoo*, ou'n dezenfekte li, i prop i difisil pou al rod en pis lo li en?

*(laughter)*

**HON BERNARD GEORGES**

Ou kapab rode.

***(APPLAUSE)***

**HON BERNARD GEORGES**

Mr Speaker i arive tanzantan dan lavi lemonn ki en fenomenn i vini e tou dimoun i realize ki en sanzman fondamantal pe pase e ki lavi pa pou parey ankor.

Parfwa sa i en levennman pozitiv parfwa i en levennman negatif. Me tou lede i anmenn menm rezilta - en sanzman profon dan fason fer en dimoun, en pep, en Nasyon - lemonn antye. Lo kote pozitiv, mon mazin lannen 1989 ler Lerop miray Berlen ti tonbe bann pei dan Lerop de les, ti ganny zot laliberte e Linyon Sovyetik ti konman fraktire.

Sa in anmenn en gran lelan devlopman lo tou lede kote miray e Larisi e bann pei libere Lapolonny, Romani, Laongri e lezot ankor ti trouv en souf nouvo e ti montre en krwasans ekonomik san presedan.

Menm lannen Sidafrik sa sistenm terib ki apel *Apartheid* ti tonbe, Nelson Mandela ti ganny libere e sa gran pei ki tou Seselwa i kontan ti antre dan klib bann pei normal. Lo kote negatif dan sa detrwa dernyen lannen, lemonn ti bezwen fer fas avek en pandemi *Covid* kot en sel kou - *overnight* ou kapab dir - lavi in sanze e nou ti bezwen fer fas avek *lockdown*, *mask*, vaksen, teste, maladi e lanmor san triye.

Aprè *Covid* nou pe fer fas avek de lezot defi ki pou e ki pe sanz lemonn. E ki annan en lefe lo sakenn parmi nou - sa se lager ant Larisi e Ikrenn, ki pe amenn bokou lensertitid dan lekonomi mondyal e Sesel pa'n ganny eparnyen parey Minis in fer nou konpran.

E sanzman klima ki pe menas nou zil koralayenn nou lakot partou nou legzistans e fitir nou plannet parey nou Prezidan fek fer *COP 27* rapel. Isi menm dan nou pei Sesel, nou osi bezwen viv atraver sa bann fenomenn negatif e pozitiv, ki sanz nou perspektiv

nou direksyon, direksyon nou lavi, e lafason ki nou egziste.

San al dan gran detay Mr Speaker nou kapab dir ki *Coup D'état* 1977 ti enn sa bann fenomenn ki'n sanz nou pei e nou pep. Malgre ki bokou pou defann serten benefis ki serten ti gannyen atraver le 5 zen 1977, la ki plis ki 40an in pase depi sa levennman, nou kapab regard an aryer avek plis perspektiv e konstata ki lo la balans sa *Coup D'état*, in amenn plis problem ki solisyon pou nou pei.

Apar bann labi drwa imen ki *TRNUC* in dokimante, Seselwa ki'n bezwen al an egzil e ki ankor pe viv an deor Sesel, olye pe kontribye dan zot pei. Sa sistenm sosyalis ki ti swiv *Coup D'état*, in amenn en sanzman profon dan nou pep.

En latitud kot Gouvernman i pran tou responsabilite endividyel, in fer ki an gran parti nou pep in perdi zot valer e in vin tro depandan lo Leta. E sa se pa zis an deor ki nou war sa. Isi menm dan sa Lasanble Mr Speaker semenn apre semenn, sa menm mank responsabilite endividyel e kolektif, in ganny defann e ankouraze lo lot kote latab.

Par kont, lo kote pozitiv levennman pli enportan dan listwar resan nou pei, lo nivo sanzman fondamantal dan fason fer en pep e en Nasyon ti

le 24 Oktob 2020 avek larive parti *LDS* e Prezidan Ramkalawan o pouvwar.

**(APPLAUSE)**

**HON BERNARD GEORGES**

Sa i pa parol vid Mr Speaker ouswa fer politik se en santiman ki baze dan larealite e ki Seselwa pti a pti pe konpran. Se pa selman en dimoun ki sanz en pei, set en lide, en filozofi e determinasyon pou pran bann desizyon dan konteks sa lide, pou benefis en pep, menm ler sa pep pa toultan oule war, ouswa aksepte sa ki pe arive.

Se sa ki enportan e se sa ki pe arive dan nou pei Sesel. Pa par pa, mwan apre mwan, nou pei in war sa transformasyon ki sa Gouvernman pe anmennen dan lavi e dan fason fer nou pep.

E la Vandredi le 4 Novanm, Minis Hassan in donn nou dernyen legzanp dan sa seri mezir, ki en Gouvernman responsab ki travay dan lentere tou son zanfana i anmennen. Si nou egzamin sa diskour Bidze ki Minis in prononse e analiz son mesaz, nou a konpran ki mannyer i en lekstansyon en pilye enportan mon kapab dir sa transformasyon ki a labaz sa ki sa ladministrasyon pe

anmennen dan Sesel depi Oktob 2020.

Me avan mon pas lo mezir dan sa Bidze, permet mwan ankor en moman Mr Speaker pou souliny sa diferans dan Polisi sa Gouvernman ek bann ki'n presed li. Mon krwar ki sa analiz i ava enportan pou eksplik avek nou Lasanble e bann sitwayen ki nou reprezante isi aköz, aköz ki fason fer ladministrasyon Ramkalawan i meyer pou nou tou, e aköz son lefe pou, pou pli lonterm e amenn plis benefis, pou sakenn parmi nou bann Seselwa.

Depi premye pa en ladministrasyon ou kapab konpran sa ki pou swiv ;- sa ki pou fason fer sa ladministrasyon, sa semen ki i pou trase. Ladministrasyon SPUP, SPPF, Parti Lepep, US ki'n dir pou 43an, in konmans annou pa bliye par en koudeta kot tou keksoz ti ganny sanze dan en sel lannwit.

Konstitisyon ti ganny aboli, parti politik ti ganny aboli, laliberte ti ganny redwir e en zonm ki pa ti'n ganny elekte, ti met an plas en striktir revolisyoner kot tou lepase ti ganny efase e en nouvo sistenm ti ganny met an plas a son limaz.

Par son fason pran pouvwar e pou mentenir sa pouvwar, sa sistenm Mr Rene

ti baze lo donn sitwayen tou sa ki zot bezwen, tanpi konnen kote larzan pou sorti e ki mannyer pei pou peye.

I en Polisi ki mars byen pou ou ganny vot e sipor, me ki detri rezilyans en pep e lekonomi en pei. Sa sistenm in anmenn amelyorasyon a kour term, me i detri lekonomi a lonterm. Se pou sa rezon ki Sesel pa'n zanmen kapab abzorb bann sok ekonomik ler i ti arive pandan 43an. Nou ti bezwen demann prete.

Nou rapel sirman Kim Il Sung, larzan Gaddafi e Saddam Hussein. Fer bann *deal* ilegal nou rapel *SEYPEC* ler in kas *embargo* lo lavant petrol avek Sidafrik dan lepok *apartheid*.

Nou'n vann zarm *MALO* pou al touy nou frer ek ser *Rwanda* zis pou ganny en pe larzan. Nou'n pret larzan avek Siva e donn li paspor ek en tit Anbasader - la ozordi in ganny bloke dan Lenn pa kapab sorti.

Nou rapel ki sa sistenm in amenn nou dan *black market*, dan fouye lo Erport pou *forex*; dan fer laliny an deor labank pou ganny \$400 pou vwayaze. Nou rapel ki ler kriz ekonomik in frap lemonn an 2008, nou ti bezwen al demann lekskiz avek *Paris Club* e anmenn *IMF* isi pou tir nou dan problemn.

E nou rapel ki an 2020 ler *Covid* ti'n anmenn nou dan *FA4JR* ki le 26 Oktob 2020 ler Minis Hassan ti ouver kof, i ti war - parey in fer nou rapel Vandredi pase - zis R14milyon ladan.

R14milyon Mr Speaker, lavalèr konstrir en blok apartman. R14milyon pou fer marse en pei an antye, se sa ki Minis Hassan in war dan kof Labank Santral. Vwala Mr Speaker kote en sistenm fer plezir tou dimoun, san avan tou *build* en lekonomi ki for, in anmenn nou. E kote Parti *US* i oule anmenn nou ankor.

Permet mon en pti legzanp Mr Speaker. En tel sistenm i parey en dimoun ki'n fer son lakaz, me i napa semen pou ariv kot lakaz e i napa larzan pou fer semen. Sistenm *US* se fer en gran semen beton, akòz sa i merite, epi grat latet e rode ki mannyer pou peye pou sa semen. Rezilta en tel sistenm se en pep i vin depandan lo sa sistenm.

I bezwen siport sa sistenm, pou li esper eleksyon e la ganny en *loan* pou *write-off* sa ki in bezwen prete. Sa sistenm li i toultan pe taye manz manze so epi ganny dizesyon. Sa se sistenm ki ladministrasyon Ramkalawan ti erite le 26 Oktob 2020.

Lo lot kote le 24 Oktob 2020 en tranzisyon pezib ti arive, kot Gouvernman in

sanze dan lape e dan respe pou nou la demokrasi. Nou kapab dir ki si le 5 Zen 1977 ti en revolisyon anti-demokratik, le 24 Oktob 2020 ti en levolisyon demokratik.

**(APPLAUSE)**

### **HON BERNARD GEORGES**

Ler en tel sanzman i arive Mr Speaker transformasyon ant en sistenm e en lot, i en prosesis pli mezire e son rezilta i pli solid.

E akòz nou pe koz lo Bidze ozordi, fason fer en Gouvernman responsab, se premyerman met labaz pou en lekonomi solid avan konmans depanse. Rezilta en tel lapros, se en pep ki apresye sa ki in kapab kontribye pou gannyen, en pep for e solid. Se sa en Gouvernman responsab. Ler napa ou pa donner ler i annan ou partaze. Destinasyon li i pou parey, se semen pou ariv laba ki diferan.

Pou servi menm legzanp ki mon ti donner taler, ou'n fer ou lakaz e ou napa semen fer en peron, epi ler ou annan dekwa la ou a fer ou semen loto. Konmsa ou pa pou dwa, e ou pou dormi byen aswar, akòz ou pou napa traka *loan* e ou pou satisfè ki sa ki ou'n gannyen ou'n ganny li a *la sueur de ton fron*.



Andotmo fer dapre ou mwayen e ler ou kapab. Se sa filozofi ekonomik ki mon war dan sa Gouvernman, atraver sa diskour Bidze ki nou'n antann Vandredi pase. Me se pa tou Mr Speaker, en Gouvernman pa kapab zis travay dapre son mwayen. I bezwen osi kree le mwayen; -kree en larises pou permet li partaz sa larises.

Dan sa bann mwan ki'n fek pase dan sa Lasanble an ekoutan bann Manm US lo lot kote latab, nou'n konpran diferans ant filozofi ekonomik sa de parti ki reprezante isi dan sa Lasanble.

Lopozisyon li, i annan en filozofi partaze, donn lasistans, sibvansyonn pri lakaz, donn tou keksoz *free*, pa rod okenn performans an retour. Sa in ankouraz plizyer fenomenn ki'n anmenn nou e ki'n anmenn nou pei dan en deklen ekonomik sitan difisil, ki i ti'n ganny dekrir konman en "kales kase."

E i pa drol pou war ki mannyer en tel politik i pa akseptab dan konteks lemonn ozordi. Premyerman en tel sistenm i anmenn labi. Ler en dimoun pa'n travay, ou kontribye pou en keksoz i pa apresye sa keksoz parey i ti pou'n fer si i ti'n travay pou li.

Nou war sa a tou nivo. Lakaz ki pa ganny antretenir ; -lo serten paran ki war lekol

konman en *day care* pou zot zanfan e pa konman en landrwa laprantisaz. Lo dimoun ki ankor raport klinik Lendi bomaten zis pou prolonz zot *weekend*. Dimans Anse Boileau nou'n tann menm refren "donn dimoun zot 13enm mwan" zot in kriye, "akfer depann lo zot performans?" Sa se zot fason fer sa.

Dezyenmman- dezyenmman Mr Speaker en tel sistenm pa soutenab. Gouvernman dan lepase in fer lakaz ki kout 300 a R400mil, epi i vann sa menm lakaz pou R14mil e apre dan sak eleksyon i tir 40poursan lo balans sa *loan* ki ti reste pou peye. Rezilta zanmen in annan ase larzan pou fer plis lakaz, e alor nou ti war aplikan esper 10an, 15an, 20an pou ganny en lakaz.

Annou pa bliye ki pa tro lontan pase Mr Speaker, si ou ti anvi en lozman tou sa ki ou ti bezwen fer anba ladministrasyon *SPUP*, *SPPF*, *Lepep*, se met ou non lo en lalis retourn kot ou epi esper en lakle. En tel sistenm pa renouvle son lekor, e sa ki vin apre i bezwen espere pandan tou sa bann lannen akoz sa ki'n pas avan in tro benefisyè.

Trwazyenmman en tel sistenm i detri performans. Si en dimoun pou ganny peye ki i travay, ki i pa travay akoz i

pou fors son lekor? Akoz ki i pou rod en lanplwa ler i kapab ganny *welfare*? Akoz ki i pou perform pli byen ki en lot ler tou lede pou ganny menm *bonus* 13enm mwan? Zis travayer onnet ki pou travay, sa ki anvi *slack* pou *slack*. Rezilta prodiksyon i tombe e progre ekonomik pei i redwir.

Katriyenmman, en tel sistenm i detri responsabilite endividyel. Si tou sa ki ou bezwen ou gannyen zis akoz ou demande, akoz ki ou pou responsab? Sa bann lendilzans in eklo isi Sesel en bann problem sosyal parey nou tou nou konnen.

Nou'n war zenn fiy ansent, *heroin babies*, zanfan ki paran i fer epi abandonnen e les Vilaz Prezidan elve zot. E la, e se la kot presyon ekonomik i vini Mr Speaker. Letan, Leta in bezwen entrodwi en sistenm *welfare*, en sistenm *methadone*, en Tribinal Lafanmir pou rod solisyon avek bann problemn familyal, ouswa pou fer sir ki bann papa i peye pou *maintain* zot zanfan.

Resanman nou'n antann Minis Rangasamy pled avek dimoun pou plan zot fanmir silvouple, akoz ler ou pa fer sa ou met presyon lo lozman e ou pe aras en dimoun ki'n *save* pou en lakaz sa sans pou li ganny enn.

Senkyenmman, en tel sistenm i redwir performans ekonomik nou pei. En dimoun ki pa travay ouswa ki pa travay dir i depann lo lasyer lezot ki travay e ki travay dir. Travayer konsyansye ki leve bomaten e ki travay en zournen epi ki fer en dezyenm zournen, akoz i anvi fer en *saving* pou aste en loto, e la sa dimoun ki mon pe masyonnen, i konnen lekel li e mon felisit li.

Ouswa pou refer son lakwizin i anbelir nou pei e i kree larises. I pey son taks i aste konmisyon e Gouvernman i anmas plis taks pou kapab konstri lakaz, lopital e lezot lenfrastruktir. E pou kwa pa ogmant saler ler i kapab parey Minis in promet pou ganny fer.

Sizyenmman e dernyerman, en tel sistenm i anpes kreativite e i redwi linisyativ. Angle i annan en proverb ki dir '*necessity is the mother of invention.*' Ler ou anba presyon ou debrouye ler tou keksoz i vin dan dalo ou pares. *Covid* in montre nou sa tre, tre byen. Ler ti napa touris, bann lotel ti ofer bann pri redwi pou Seselwa.

Ler lenportasyon ti redwir akoz bato pa ti vini, prodiksyon agrikol ti ogmante isi e dan tou kwen semen ti annan prodwi fre pou dimoun aste. Me si ou donn tou

dimoun tou sa ki zot bezwen ler zot bezwen, sa bann linisyativ i perdi e pei i vin pli mizer. Lo sa kote latab Mr Speaker, nou pa partaze sa bann filozofi. Nou pa partaze sa fason fer politik. Nou program pou Gouvernman, nou Manifesto i met kler kisisa prensip ki gid nou parti.

E dan son gran mazorite, Lepep Seselwa i partaz sa bann prensip e zot in demontre sa dan sa dernyen eleksyon. E zis pou fer nou rapel sa bann prensip ki gid nou konman en parti e ki nou pep in swazir se en Gouvernman responsab, ki pe administre en Leta normal e efektiv.

Ki konpri en servis piblik ki rod solisyon, pou en en pep travayan e prodiktif. Kot sitwayen i demontre respe, lapolites e lakourtwazi. La i la Mr Speaker filozofi sa Gouvernman ki nou form par ladan.

**(APPLAUSE)**

### **HON BERNARD GEORGES**

Se pa en bann prensip difisil Mr Speaker. O kontrer se en *roadmap* ver progre, ver larises e ver en lavenir briyan. La ki nou'n antre dan trwazyenm lannen ladministrasyon Mr Ramkalawan, sa Bidze i repran sa bann tenm. E i demontre nou ki distans ki

nou pei in arive dan sa 2an. Pa selman lo lekonomi ki'n redemare, me sirtou lo sa transformasyon a tou nivo ki nou pei e nou pep pe viv.

Vwala kot nou'n arive Mr Speaker dan parol Minis Hassan li menm. E mon site sityasyon Minis i dir' 'sityasyon in amelyore gras a bann desizyon responsab, disiplin e desisiv ki sa Gouvernman in pran" fen sitasyon.

Desizyon responsab, disiplin e desisiv - trwa mo kle ki rezim sa ladministrasyon. Dan tou sa ki sa Gouvernman in fer dan sa 2an, zot desizyon in responsab, disiplin e desisiv.

Sa ladministrasyon parey nou konnen in ariv o pouwar a pli move moman ki en Gouvernman ti pou anvi ganny en eleksyon. Kot pei ti dan pandemi *Covid*, erport ti'n fermen, lotel ti vid, Seselwa ti pe viv lo *FA4JR*, e lo kont Gouvernman ti annan lavalen en blok flat pou fer marse nou pei.

Me parey sanson i dir "*when the going gets tough, the tough get going*". E Mr Speaker lo nivo ekonomik, *the tough* i apel Wavel Ramkalawan e Nadir Hassan!

**(APPLAUSE)**

**HON BERNARD GEORGES**

Zot in deza dir, zot in deza tann mon dir sa fraz an koneksyon avek Prezidan Ramkalawan, “*cometh the hour, cometh the man*”. Me sa parol i kapab osi byen aplik pou nou Minis Finans. Avan ki i ti vin isi dan sa Lasanble pou ganny aprouve konman Minis, pa bokou dimoun ki ti konn Nadir Hassan.

Mwan annefe mon pa ti konn li me li ek son Prezidan e zot koleg Minis ti konmans travay le 27 Oktob. E 2mwan pli tar zot ti’n fini pran desizyon, donn vaksen tou nou pep, ouver Erport e relans nou lekonomi.

Anmezir ki en bann ti pe kriy “*Lock down!*” mon mazine Mr Speaker zot ti’n fim en pti lapay, parey en bann ti promet.

*(laughter)*

**HON BERNARD GEORGES**

Ouswa zot ti per monte desann aletranze dan *jeep* prive pandan, pandan sa letan Prezidan ek son Minis Finans ti pe travay konman en Gouvernman responsab. Fas a en sityasyon ekonomik katastroofik, zot ti bezwen pran bann desizyon responsab e desizif, e se sa ki zot in fer.

Prezidan ti al rod vaksen e boner an Zanvye 2021, nou

pep ti desann pou pran vaksen an gran nonm. 3mwan pli tar Erport ti ouver, touris ti rekonmans desann, *FA4JR* ti ganny diskontinyen, *URS* aboli, Seselwa ti retourn dan lanplwa. E la 2an pli tar nou pros pou retourn lo sityasyon avan *Covid*. Si sa pa en Gouvernman responsab o servis son pep Mr Speaker, mon pa konnen ki mannyer nou pou dekrir li !

Annou regard detrwa sif dan sa Bidze pou prouve sa ki mon pe dir Mr Speaker.

Premyerman krwasans pou sa bann, pou sa lannen ki nou ladan ti 10.6poursan - mon repete 10.6poursan. Konpar sa avek Lasin pei ki zeneralman annan pli o krwasans dan lemonn, e li son krwasans pe tourn otour 4poursan;- pou nou in ariv 10.6. R300milyon sirplis bidzeter. Defisit balans peyman in desann sorti 11poursan pou ariv 7.2poursan.

Enflasyon in kay lo 3poursan. Poursantaz det lo *GDP* in sorti par lao 100poursan pou tonm 67.9poursan. Touris in retourn a son nivo normal e sa lannen i pou desot 320mil. Sif e statistik pa manti Mr Speaker. Nenport ki fason ki ou analiz sa bann sif ki mon’n donnen, ou ava war menm rezilta.

Sa se ki sa politik ekonomik sa ladministrasyon, baze lo pran desizyon desizif, pran li boner, koup depans, ogmant prodiktivite e responsabiliz sak sitwayen pou pran son desten dan son lanmen, in marse e i pe mars tre byen.

Diferans alor Mr Speaker se enn ant de diferan filozofi politik e ekonomik. Lo en kote parey mon'n dir, se partaze, donnen, diverti- kontan, apre al rode ki mannyer ou pou peye. E la bomaten nou'n tann sa menm refren ankor enn fwa. Lo lot kote e sa se nou kote, se konstri en lekonomi solid, koup depans, redwir gaspiyaz, demann sak endividi pou pran son responsabilite pou son lekor, travay epi partaz dan sa ki'n ganny konstri.

Les mon pran de legzanp senp e topikal pou ilistre sa diferans. Premye,

Laz pansyon; Fon Pansyon pa pou Gouvernman e i pa ganny administre par Gouvernman. Fon Pansyon i pou nou tou ki kontribye ladan. I ganny administre par en *Board* endepandan ki bezwen fer sir ki tou sitwayen i pey zot kontribisyon, de sort ki ler nou ariv laz pansyon, nou ava ganny en pansyon.

Sa *Board* osi i bezwen konteni larealite ekonomik, asire ki sa fon i soutenab. Ki

ler ou ariv laz retrait, i annan ase larzan dan sa fon pou pey tou bann ki'n kontribye.

Sa *Board* i vini e i dir avek son bann Manm ki avek kontribisyon aktyel e laz pansyon 63an, sa fon pa pou soutenab. Alor, kontribisyon i bezwen ogmante e laz retrait osi i bezwen ogmante. Lo nou kote latab, nou ki bann dimoun responsab nou siport sa. Prezidan Faure li osi i ti siport sa.

Nou konnen ki sa bann dirizan Fon Pansyon se pa, se bann dimoun ki annan kapasite e alor nou aksepte sa ki zot in war dan zot lanaliz. Me lo lot kote latab zot pa war sa. Pou zot, tanpi konnen sa ki pou arive demen, kote larzan pou sorti pou pey pansyon. Zot pou fer en lamars le 26 Novanm, pou pa ogmant laz pansyon, menm si zot prop Prezidan ti deklare ki laz pansyon i bezwen monte.

Sa Mr Speaker se pa lot ki en latitud iresponsab, ki pou amenn nou dan menm fernwar ekonomik ki nou pei ti ladan le 24 Oktob 2020. Me se zot fason fer inyore larealite, fer politik bonmarse pou fer plezir zot siporter ozordi, demen - nou a *deal* avek demen.

Dezyenm legzanp - 13enm mwan saler ; Dan en fason enkilke plis responsabilite dan travayer e asire ki sa ki perform e sa ki

pa perform pa ganny trete parey, Gouvernman in *deal* avek 13enm mwan dan de fason.

Premyerman in reentrodwir sa 13enm mwan. Gouvernman ti'n kapab dir pa pou annan ankor sa lannen, parey zot prop Minis ti'n konmans prepar nou dan dernyen ladministrasyon. Akoz defi ekonomik e vilnerabilite nou pei a bann sok ekstern i ankor la.

Me non! Dan Polisi ekonomik partaz larises pei ler i permet, Gouvernman in reentrodwir 13enm mwan olye kritike silvouple annou aplodi sa desizyon.

Dezyenmman, Gouvernman in reform sa benefis pou fer ki 50poursan i ganny peye otomatikman, me 50poursan pou baze lo performans sa travayer. Lo nou kote latab, nou ki bann dimoun responsab, nou dir avek travayer ki tou travayer i kapab ganny zot 100poursan 13enm mwan. Tou sa ki zot bezwen fer se travay byen e perform alaoter ki zot in ganny anploye pou perform. Eski sa i mal Mr Speaker?

Me lo lot kote latab zot pa enterese avek performans, zot enterese avek vot, avek politik bonmarse, avek partaze san regarde kote sa pe anmenn pei. Se sa, se zot fason fer inyor larealite, fer politik

bonmarse pou fer plezir zot siporter, ozordi, demen - nou a *deal* avek demen.

Mr Speaker dan sa pei ozordi parey mon fek prononse i annan sa de tandans politik. Sa ki responsab sa ki anvi konstri en pei solid e en pep rezilyan, kot benefis i ganny partaze dapre mwayen ki i annan. Epi i annan sa ki parey bann barik vid, bann ki zis fer tapaz, pa rode ki mannyer pou konstri en pei, me zis partaze avan kree, andet pei epi al rod lasistans partou.

Mwan, mon konnen ki bor mon debout e Seselwa i konnen kote zot, zot debout. Si le 24 Oktob 2020, ti zour sanzman dan nou pei, le 4 Novanm 2022, se zour kot levidans sa sanzman in ganny demontre, e laprev ki sa sanzman ti en bon desizyon ki Lepep Seselwa ti fer in ganny war.

Dan lespas 2an, sa Gouvernman in kapab avek son seri Polisi entelizan atraver bann desizyon desizif e bril labouzi tou lannwit, in kapab pran en pei dan difikilte, a moman pli difisil dan son listwar resan, e transform son lekonomi - sorti enn kot ti annan ki ti en kales kase avek R14milyon dan kof Leta e fer ki avyon in retournen, *Air Seychelles* in pey son det, lotel i plen, touris

pe kas rikord e larzan in ganny met akote, pou kapab arive balans Bidze e partaz benefis avek Seselwa.

Sa Mr Speaker pa'n ariv dan 25an. I pa'n ariv dan 10an. I pa'n ariv dan 5an me in ariv dan 2an selman! E pou sa mon dir bravo nou Gouvernman, bravo Minis Hassan.

Mr Speaker ler ou analiz sa Bidze ou war plizyer keksoz pou souliny sa ki mon fek dir: Premye ou a krwar ki nou Gouvernman in donn avek Lepep Seselwa en Bidze eleksyon ane sa Bidze se en Bidze eleksyon.

Sa kalite Bidze ou espere ki en Gouvernman pou donner dan en lannen eleksyon. Me sa ki diferan avek nou Gouvernman se ki nou pa vey lavey eleksyon pou retourn avek nou pep bann benefis ki pei i kapab *afford* zis pou nou ganny vot.

**(APPLAUSE)**

### **HON BERNARD GEORGES**

Pa koumsa ki nou travay nou Mr Speaker. Nou fer li osito ki sityasyon i permet. Nou pa la pou anbet lepep avek en R50 a lokazyon laniverser Prezidan, ouswa avek rediksyon lo en *loan* lakaz en semenn avan eleksyon. Non Mr Speaker, en Gouvernman responsab pa

azir koumsa. I administre en pei dan lentere son pep, pa dan lentere son dirizan, ouswa dan lentere rod vot. Nou Gouvernman i travay tou dilon lannen, e i pou travay parey pandan tou sa 5an ki i la.

Lepep ava swazir ler lot eleksyon i vini si i pou vot pou sa sistenm ankor. Sa i ava son swa. Nou pa la pou anbet dimoun e aste vot atraver en Bidze se dan sa fason Mr Speaker ki en Gouvernman responsab i travay.

Dezyenm, en lot remark ki mon bezwen fer ozordi. Ou konnen Mr Speaker sa Gouvernman in fer sa travay pou anmenn nou a sa pwen kot en Bidze osi bon, in ganny prezante li tousel.

Nou pa'n ganny okenn lasistans avek okenn dimoun, sirtou pa Lopozisyon. A tou moman kot Lopozisyon *US* ti'n kapab dan lentere nasyonal, koste zepol e apir Gouvernman, swa dan son Polisi, swa dan Lezislasyon isi dan sa Lasanble, Lopozisyon in swazi pou pa siporte.

Pir ankor, zot in deside *boycott*. Nou ti pou krwar ki zot ti ava siport program vaksen zot pa'n-. Nou ti ava krwar ki zot ti pou'n siport Minister Lasante dan son program kont *Covid* zot pa'n - e zot in menm sorti lo Komite *Platinum*. Zot pa pran par dan bann levennman nasyonal, zot

pa vin montre respe a bann viziter etranze ler zot ganny envite. Zot nepli vin rankontre Prezidan ler i vizit, ler i vizit Lasanble.

Zot in menm konmans pa vin Lasanble ler Prezidan i la. Zot Dirizan i pran larzan palto li, epi zot tou zot sanz dan semiz rouz e kravats nwanr, tel parey zot ti fer avek 'larzan forgo. ' Zot dir, zot dir zot pa pou pran an piblik, epi zot pase an misouk dan milye lannwit e zot pran. La, la nivo sa Lopoziyon US ozordi Mr Speaker.

I annan en sel keksoz ki zot konn fer e zot konn fer li byen mon bezwen dir, sa se swazi zour kot lapli pou tonm pli for, pou zot organiz en rally Anse Boileau !

Lo sa nou kapab dir *full marks!* 100poursan ! Zot in apel sa en lapli benediksyon mon, mon dir tasyon sa i en lapli ki'n vin lav zot pese mon bann zanmi!

*(laughter)*

### **HON BERNARD GEORGES**

Me malgre ki in fer li tousel Mr Speaker, nou Gouvernman in kapab anmenn en Bidze pozitiv e in fer li dan selman 2an.

Trwazyenm, se en Bidze soulazman ; - en Bidze lespwar pou nou pep. Mon pa bezwen repet sa ki Minis in dir dan son

diskour Bidze, me permet mon kantmenm retourn lo detruwa mezir ki pou anmenn en benefis direk pou sak Seselwa.

Travayer Sekter Piblik, pou ganny en logmantasyon saler pa R50, pa R500, pa 5poursan parey i ti'n ganny propoze, me 10poursan zot saler, me sa apre ki zot *allowance* in ganny konsolide.

A en moman kot lenflasyon in mont par 3poursan, en logmantasyon saler 10poursan i en gran *bonus* pou sa kategori travayer.

Pansyoner pou kontinyen resevwar zot R500 par mwan *increment* lo zot sekirite. Lekol pou ganny *wifi* e zanfan pou kontinyen resevwar en *breakfast*.

Tou etidyan ki'n kalifye pa pe espere zot deza pe etidye deor Sesel, e zot *stipend* osi pou ogmante par 10poursan. Bann ki pe pran *loan* pou fer en lakaz sibvansyon pe ogmante.

Bann ki pe aste lakaz nivo valer kot napa *stamp duty* pe ogmante. *Home carers* pe al lo en nivo profesyonnel e zot lanplwa pou striktire enkli zot 13enm mwan, olye zis flote parey avan.

Nivo taks pe redwir pou benefis non-monneter ki en anploye i resevwar e ankor bokou, bokou ankor. Tou sa bann mezir pou, pou annan en



lenpak pozitiv lo sak Seselwa. Lo sakenn parmi nou e sakenn nou, nou pou war nou dan en porsyon sa Bidze. E konmsi sa pa ti ase Mr Speaker la *SEYPEC* osi in vin redwir pri lo laponp par preske R4. Nou bezwen dir Mr Speaker nwel vreman in vin boner sa lannen.

Katriyenm sa Bidze se en Bidze ki relans lenfrastruktir dan nou pei. Apre *Covid* e rediksyon dan larzan disponib, Gouvernman pa'n kapab antreprann bokou proze kapital. Lopozisyon i dir ki sa ki Gouvernman pe fer se ouver zot proze.

Permet mon Mr Speaker demann zot de kestyon. Be zot akoz zot pa'n ouver zot proze zot menm? Akoz zot pa'n ouver lekol La Rosiere par egzanp? Lopital La Digue zot proze sa?

Lekol primer ek segonder La Digue zot proze sa? Nouvo batiman *NIHSS Hermitage* ki pe fini la, zot proze sa? Nouvo lenfrastruktir pou Lopital Sesel ki'n ganny anonse, zot proze sa?

Nouvo proze lakaz, ladministrasyon distrik, *maintenance* bann lekol, bazar ki'n anonse, zot proze sa? Mr Speaker larealite se ki avek bon zesyon nou lekonomi e koup gaspiyaz dan sa dernyen 2an, i annan prezan en lespas finansyel pou ki Gouvernman

i kapab lo son prop mwayen e avek lasistans pei zanmi, re demar proze lenfrastruktir dan nou pei.

Anmezir ki zot dirizan pe get dan binok pou tyeke ki mannyer zot laplenn i été, Gouvernman *LDS* li i pe konstri nou pei e pe fer plan pou konstri ankor. Les Mamelles Mr Speaker mon fyer pou dir ki apre ki sa proze 24/24/24 ki Mr Faure ti anonse avek gran lafanfar, e ki'n prodwir selman 8 lozman dan mon distrik, sa se bon zesyon *US* sa Mr Speaker, la mon kapab dir travay in konmanse pou repar bann vye lakaz ki la depi lepok kolonyal, e donn nou zabitan bann lozman konvenab.

Avantyer menm mon ti dan distrik avek zofisyé Minister Lakaz pou met sa proze anmars. Dan sa lannen ki pe vini Les Mamelles pou kapab war travay kontinyen pou amelyor nou stok lozman. Anplis Mr Speaker apre en bann lannen promes par Gouvernman presedan, Minis in, in anonse ki konstriksyon *day care* pou nou distrik pe al konmanse. Plan in fini pare *day care* pe vini.

Senkyenm sa Bidze i en Bidze ki *fair* ki zis, ki ekitab. Lo en kote Bidze in trouv larzan pou bann sekter tel parey *sports*, ki pe ganny 37milyon zis pou antrenn atlet

pou Zwe Losean Endyen ek Zwe Lafrik.

E Kiltir pe ganny en larzan pou konstriksyon en nouvo batiman Larsiv Nasyonal, konmsa non selman nou patrimwann ekri a ganny preserve, me sa bann travayer devoue dan sa sekter, a kapab travay dan kondisyon modern.

Pou annan 9 nouvo travayer sosyal e sa i fer mon plezir Mr Speaker aköz parey mon dir tou le-z-an *social workers* se bann travayer ki pli anmas problem e ki pli ganny inyore. *Home carers* parey mon'n dir pli boner pe ganny en lankadremen legal.

Pli enportan ankor se Bidze pou bann servis ki Lazans Proteksyon Sosyal i *manage* pou sa porsyon nou popilasyon, ki bezwen en lasistans. E sa Bidze parey labitid i enn ki pli gro avek R1.2bilyon pou asire ki dan kad leve debrouye, e pran responsabilite endividyel, sa bann ki pa kapab fer li i bezwen ganny proteze e asiste zot osi.

Lo kote reveni la, osi nou war ki Gouvernman i anvi azir dan en fason *fair*, zis e ekitab. Apre lanaliz lo reveni bann lotel e avek realizasyon ki gran lotel pa ti pe kontribye lo nivo ki zot devret, de taks pou ganny propoze a en nivo ki pou anmenn en reveni signifikan san afekte sa lendistri.

Menm zafer pou logmantasyon dan *Immovable Property Tax* lo lakaz ki etranze i annan isi e taks lo *securities dealer* ki bann *exchange* etranze ki anrezistre isi Sesel. Sa enn dernyen Mr Speaker se sa lendistri li menm, ki'n propoz sa logmantasyon aköz i krwar ki sa i zis e i ekitab.

Dan son politik Gouvernman pa'n oule amenn okenn nouvo taks direk lo sekter prive. e sa se pou permet sa sekter kontinyen son krwasans e donn sa sekter lespas pou li osi ogmant travayer pou son Sekter Prive.

Finalman se en Bidze ki regard lwen. I normal Mr Speaker pou en Bidze konsantre lo zis sa lannen ki i pe regarde. Dan lepase se sa ki nou ti war dan sa bann Bidze Parti *US* e son bann predeser. Me sa se pa politik *LDS*. Prensip fondamantal politik *LDS*, se ed sak dimoun pou ed son lekor. Sa pa kapab fer lan a la fwa. I bezwen etale lo en peryod letan dan en fason byen striktire.

Dan sa konteks, sa Bidze pou lannen 2023 i regard pli lwen ki 2023. Nou war sa atraver sa Bidze an antye konmansman par reform dan Servis Piblik anba tenm "Delivre pou Seselwa". Kot pou annan en *Leadership*

Program, *program* e formasyon neser pou bann travayer Servis Piblik dan en fason ki servis pou *results-based* e rekonpans pou swiv performans.

Servis piblik e la mon pe koz avek leksperyans personnel aköz mon, mon en zanfan en papa ki'n travay dan Servis Piblik tou son lavi depi *clerk* ziska *PS*, Servis Piblik i o sant travay en ladministrasyon. E en ladministrasyon i reisi ouswa i *fail*, selon servis ki i delivre. Lo nivo lenfrastruktir e dan en bi touzour redwir depans lo pey lokasyon, sa ladministrasyon pe finalman fer sa ki bokou avan ti zis koze.

Gouvernman pe al repar e konstri batiman pou abrit bann Minister e servis Gouvernman komansman par *National Library* e Arsiv Nasyonal. Lotorite Reveni pe al fer son prop batiman li osi deryer *ICCS*.

Mazinen Mr Speaker si zis Gouvernman Mr Michel olye fer batiman *Espace* pou *JJ Spirit* ti'n fer en batiman pou Minister Tourizm dan sa landrwa, ouswa pou plizyer Minister dan sa lespas. Lalis bann plan ki devan nou - ki devan nou pei i long Mr Speaker.

I annan sa *Scheme Loan* pou etidyan ki pa'n aprann en metye. Plis akse finans

atraver Labank Devlopman pou antreprenner, plis lanfaz lo lenerzi renouvlab. E la mon profite pou akey sa parol Prezidan dan son diskour kot *COP27* ki nou pei pe al protez 100poursan mangliye lo nou teritwar, pou ede dan nou zefor pou prezerv nou planet.

Tousala Mr Speaker se politik en Gouvernman ki konstri ozordi pou devlopman demen. Ki regard lwen ki pa rod faver, ki pa aste vot, ki pa gete si nou dan lannen eleksyon ouswa non. Se en Gouvernman ki annan en sel bi pran bann desizyon responsab, disiplin e desiziv pou byennet nou Nasyon e son pep. Konstri en pei solid e for e en pep rezilyan, prepar pou demen e ler sityasyon i permet, retourn benefis avek sak sitwayen.

Minis Hassan in donn Sesel en Bidze pozitiv dan tou son laspe. En Bidze sirplis - en Bidze ki anmenn soulazman pou sak Seselwa. Mon fer en lapel alor avek tou Seselwa pou fer parey sa Gouvernman pe fer ,annou aret viv dan negativite. Annou rantre dan pozitivite. Avek lagras nou'n sorti dan bann letan dir e nou pe antre dan en moman kot lavi tou Seselwa pe amelyore.

Malgre ki Sesel pou toultan annan defi aköz nou ptipti, nou lwen e nou

lekonomi i baze lo zis de ou trwa pilye, malgre ki nou a la mersi bann gran pwisans e nou vilnerab avek sok ekstern e sanzman klima, malgre tousala Mr Speaker, ozordi nou annan rezon pou nou selebre.

Nou pe viv en moman ekstraordiner anba en Gouvernman ki pran desizyon ler sa i neser, ki ouver avek son pep, ki pe travay dan lentere tou Seselwa, aköz Sesel i pou tou son zanfan. Mon demann sak Seselwa alor, pou zis regarde kot nou sorti, kot nou ti ete 2an pase e mazin ki distans nou'n fer dan sa pti peryod letan.

E la permet mwan Mr Speaker anmezir ki mon pe konklir pou remersye Minis Hassan ek son tim ki'n travay lo sa Bidze. E remersye zot pou sa nouvo souf ki zot pe donn nou pep pou sa bann lannen ki pe vini.

Mersi Prezidan Ramkalawan pou son klerwayans e son direksyon. Mersi tou Minis dan sa ladministrasyon, pou sa ki zot pe fer pou soulaz nou pep e remet nou pei lo en baz normal kot nou'n ganny respe kominote enternasyonal.

Mersi tou travayer dan Servis Piblik malgre ki tou ki'n ariv, malgre pa tou ki'n ariv lo nivo servis ki Lepep Seselwa pe espere.

I kler ki en zefor endividyel e kolektif pe ganny fer e pe ganny fer e pou ganny fer pou deservi nou pep dan fason ki i merite. Mersi pou tou Seselwa pou zot pasyans, pou zot konprenezon, pou zot lafwa dan en sistenm ki pe delivre pou nou tou.

E finalman Mr Speaker, mon oule pran sa lokazyon pou donn en remersiman spesyal, en remersiman spesyal pou tou zabitan mon distrik Les Mamelles. Se zot ki rezon ki mon leve toulezour pou vin isi dan sa Lasanble e desarz responsabilite ki mon'n ganny demande pou desarze.

San zot mon pa ti pou la e sakenn zot i dan mon leker dan tou sa ki mon fer. Avek sa Bidze, mon de promes ki mon ti fer avek zot pe al ganny realize - nou *day care* pou ganny konstri dan sa lannen ki pe vini, e lozman pe al konmans ganny repare e rekonstri. Pou sa - pou sa bann promes pandan tou sa bann lannen, mon dir mersi ki ozordi nou annan en Gouvernman ki antann nou leokri e ki pe delivre pou nou.

Mon espere ki sakenn parmi mon bann koleg isi dan Lasanble pe enport lo ki kote latab nou asize, a kapab fer menm lanaliz, menm refleksyon e annan menm mesaz lespwar pou zot distrik atraver sa Bidze.

Dan lan Mr Speaker apre ki sa bann proze a ganny akonpli dan nou pei, e nou a rezwenn ankòr isi pou Bidze 2024, nou ava kapab nou tou ansanm get otour nou pei e war sa ki'n ganny konstri sa ki ankòr, sa ki ankòr pe ganny fer.

E sa transformasyon pozitif ki nou pei e nou pep pe viv ladan e ansanm nou ava kapab dir avek en sel lavwa "Mon manman, pa kapab getel!"

**(APPLAUSE)**

**HON BERNARD GEORGES**

Mersi Mr Speaker.

**MR SPEAKER**

Mersi Onorab. Nou a pran poz la e nou a kontinyen avek deba apre poz. E nou a regran Lasanble 11er10. Mersi.

**(BREAK)**

**MR SPEAKER**

Mersi nou kontinyen. Bann Manm a rapel zot annan 30minit pou deba. Mon apel Onorab Georges Romain pou son diskour.

**HON GEORGES ROMAIN**

Mersi Mr Speaker. Bonzour Mr Speaker. Bonzour tou koleg Onorab, tou dimoun a lekout. E en bonzour spesyal zabitan Anse Etoile. Mr Speaker Vandredi le 4 Novanm Minis Finans in vin ankòr enn fwa devan nou Lasanble, pou prezant nou avek en Bidze en pti pe plis ki R10milyon pou lannen 2023.

Mr Speaker premyerman mon ti a kontan remersye Minis Finans e son tim pou sa travay formidab ki zot in fer dan preparasyon pou sa Bidze. Si nou reflexir lo sa de dernyen Bidze ki'n pase pou nou pou war ki lanfaz avan ti ganny mete lo, lo stabiliz pei. Pou fer sir ki tou dimoun i kapab ganny en saler e pou li kapab sonny son fanmir.

Mr Speaker i pa'n fasil an vi ki pandemik *Covid-19* ti'n tap nou dan sa bann letan. E osi leta pei ki nouvo ladministrasyon ti vin zwenn an Oktob 2020, kot pei ti'n preski faid par move planifikasyon anba ansyen ladministrasyon Parti *US*.

Mr Speaker ozordi nou fyer ki sa Bidze 2023 ki'n ganny prezante devan nou, i enn ki klerman demontre ki sa Gouvernman *LDS* in travay dir pandan sa dernyen 2an. E ki'n annan bokou mezir brav ek sakrifis ki pa'n fasil ditou, ki'n bezwen ganny pran pou nou ariv lo sa pwèn ozordi.

E parey Minis in fer resorti nou bezwen montre gratitud e felisit tou Seselwa ki'n pasyante e ki'n konpran sityasyon ki pei ti pe pas ladan. E ki zot in inifye e solider avek sa Gouvernman, pou nou kapab ozordi war relansman nou lekonomi. E ozordi nou vreman fyer Mr Speaker, pou sa lakonplisman ki'n menm ganny rekonnèt o nivo enternasyonal.

Kot nou pe ganny servi konman en model lo ki mannyer en lekonomi i kapab refer, dan en moman kot i annan en kriz global. Bokou pei o monn in fer fas avek moman difisil kot en kantite dimoun in perdi lanplwa, biznes ti'n tonbe, pri marsandiz ek karbiran ti'n ogmante enormeman.

E sa in afekte bokou pei kot nou pti pei Sesel ti osi enn parmi. Me par kont Mr Speaker pa tou pei ki'n nobou rekipere parey Sesel. Lenfasyon par egzans, i enn sa bann lendikater ki pli ba dan Sesel konpare avek bokou lezot pei ki menm pli devlope ki nou.

Bokou nou pa pe realize ki Sesel i dan en pozisyon ki tre favorab ozordi konpare avek bokou lezot pei. Larive touris dan nou pei in depas target, lezot biznes in retourn lo en nivo pli favorab, pri karbiran in tonbe e sa osi i en

fakter ki pou ede soulaz nou lekonomi an zeneral.

Mr Speaker si nou'n arive fer sa lakonplisman sa i bezwen en Gouvernman ki serye, ki responsab e ki pa per pou pran desizyon ler in ariv ler pou pran. Mr Speaker pa bliye ki sa nouvo ladministrasyon i annan zis 2an o pouwar me pa 43an.

Mon dir mersi sa ladministrasyon LDS ki la ozordi, ki ozordi dirize par nou Prezidan Ramkalawan, ki'n gid nou dan sa moman tre difisil. Mr Speaker si nou onnet ek nou lekor e met politik dekote, nou bezwen dir' 'wi Sesel in fer bokou progre anba sa ladministrasyon e nou annan tou rezon pou selebre nou lakonplisman'.

Mr Speaker si nou ti pe mazin fer politik e fer desizyon pou ganny, e fer desizyon pou ganny popilarite ozordi nou ti pou enn sa bann pei ki ti pou ankor pe pas dan bokou difikilte. Malgre ki Lopoziyon ozordi pe sey fer tou fason pou senm propagann, pou esey fer Seselwa krwar ki tou keksoz dan pei pa bon e ki nou pe fer fo promes, nou anvii dir zot ki Gouvernman LDS i pa zis koze, me in prouve ki i kapab fer dan zis 2an dan son manda 5an ki in gannyen.

Konmdir Mr Louise "annou koz en kou laverite silvouple!" Akoz politik bon

marse pa pou anmenn nou lwen. Mr Speaker akòz Seselwa i en nasyon ki vremen entelizan.

Petet Lopozisyon i anbarase pou koz laverite e i santi li difisil pou aksepte larealite ki devan nou. Akòz LDS i sa parti ki pli meyer ki tou sa ki ti la avan enkli sa enn ki apel zot lekor nouvo US. Ozordi nou pep i lib pou koze, pou eksprim zot lopinyon san ki zot bezwen per pou zot lavi oubyen per pangar zot a perdi zot travay.

Loportinite i pou tou Seselwa ki anvi avanse san okenn lenterferans politik. Sa dan li menm i en, sa dan li menm se en gro lakonplisman dan la demokrasi en pep Mr Speaker.

Mr Speaker parey Minis in fer resorti enn bann lobzektif prensipal sa Bidze se pou, se pou redistribye rezilta sa bon performans. E ozordi mon kontan pou war ki Bidze pe ganny propoze pou lannen 2023 pe prevwar en sirplis ki en pti pe plis ki R330milyon. En sirplis i vedir ki nou pei pou anmas plis larzan ki nou depanse e sa i en lendikasyon ki nou, ki nou pei pou kapab atenn tou son, tou son bann lobzektif fiskal ki'n ganny prozekte.

Mr Speaker i ankourazan pou note ki bokou lanfaz Bidze 2023, pe ganny mete dan

lenfrastruktir. Nou'n war ki sa Gouvernman pe fer renovasyon lo bokou bann ansyen batiman ki ti'n ganny abandonnen, tel ki; Libreri Nasyonal, batiman Leritaz, Lekol NIHSS e lezot ankor. Nou pe war bokou proze lakaz pe ganny enplimante dan plizyer distrik, e la mon espere ki 2023 nou a kapab war devlopman proze lakaz dan distrik Anse Etoile an vi ki lontan nou pe espere.

Enn bann keksoz ki vremen ankourazan Mr Speaker, se sibvansyon ki Gouvernman pou donn bann dimoun ki pe mazin pran en *loan* pou fer zot lakaz ,e ki pe vin propriyeter zot lakaz pou la premye fwa. Pou ou kalifye fodre ou lakaz pa donn plis ki 125 met kare e la sa *scheme* pou ede donn en lasistans ki azout lo zot *loan* e ki zot pa pou bezwen rann.

E sa Mr Speaker i en benefis ki Gouvernman ankor in konsidere anvi ki kou materyo konstriksyon in monte. Nou'n menm war kontribisyon personnel ki bezwen ganny mete anba sa *scheme* pou desann pou ariv 5pousan dan plas 7poursan.

E tousala Mr Speaker, i pou ede pou amelyor kondisyon pou en dimoun ganny akse ek finansman pou fer son prop lakaz. Mr Speaker mon kontan pou war

plis proze semen pe ganny planifye. Parey mon deza dir semen i enn parmi nou bann pli gran lenfrastriktir en pei e i osi o sant nou devlopman. La nou war ki en trwazyenm *lane* Pointe Larue pe al ganny azoute e Bidze in fer en provizyon R3.5milyon pou sa. Sa i ava ede retir konzasyon trafik pou bann ki pe al travay toulezour.

Mr Speaker mon war ki Minister, ki Minister Gouvernman Lokal e Zafer Kominoter pe kontinyen benefisy e avek en Bidze 20milyon, R20milyon pou bann pti proze kominoter. Sa i ava ede pou bann distrik kapab kontinyen benefisy e avek plis bann pti proze ki tous nou bann zabitan direktman.

Mr Speaker dan distrik Anse Etoile par egzantp sa alokasyon in ede pou siport bokou pti proze dan, dan la kominote tel ki;- drenaz ek agrandi semen dan La Gogue, drenaz dan Quincy. Proze peron kot in ede benefisy e fanmir pou ganny pli bon akse ek zot lakour dan Maldive, amelyor akse dan bann pti semen dan sou distrik.

E osi proze pou agrandi bann *bin site* dan distrik an zeneral e amelyor zot striktir. Byensir i pa zanmen ase pou nou kapab fer tou sa ki distrik i anvii fer, aköz proze i koute.

Me nou kontinyen fer faz par faz anliny ek priyorite ki ganny etabliir.

Mr Speaker en kous enportan dan nou pei i nou bann zenn e i nou responsabilite pou investir dan zot devlopman, pou nou asire ki bann ki pe, ki pe monte demen i annan en bon bagaz an grandisan.

E la nou war ki Gouvernman *LDS* in rekonnèt sa. Aköz dan sa Bidze i annan bokou laspe ki tous devlopman bann zenn. Premyerman nou war ki Gouvernman pe met bokou larzan dan renovasyon bann fasilite sportiv ki'n avarye. Tel ki; *Palais de Sports*, Stad Linite ek lezot ankor. Bann *sport complex* dan bann lezot distrik osi pa'n ganny oubliye. Sa bann renovasyon i ava kapab ede pou elev nivo fasilite sportiv, an vi ki nou bann foutboler i bezwen al Moris ler pou zwe zot *match Home* aköz *FIFA* pa ti war nou laplenn lo standar.

Ou kapab krwar ki sa i larealite ozordi Mr Speaker? Tousala Mr Speaker i demontre ki sa ansyen ladministrasyon pa'n war sa konman en priyorite e zot in zis, zis les nou bann fasilite sportif abandonnen. E la ki Zwe De Zil pe aproz tou sa renovasyon i a ede pou nou bann atlet pou kapab prepar



zot. *Sport* i en keksoz ki anmenn lasosyete ansanm e redwir sans pou nou bann zenn tonm dan move lenfliyans.

Mr Speaker en lot keksoz ki tous bann zenn dan sa Bidze se dan sekter ledikasyon. Nou konnen ki en zanfan ki'n pran en bon *breakfast* bomaten i pli byen kapab aprann dan laklas. E se sa rezon akoz ki Gouvernman LDS konman enn ki responsab, in deside pou kontinyen donn tou zanfan en goute dan bomaten. Pou asire ki napa en zanfan i reste lafen pare Lopozisyon i kontan dir.

E sa a lokasyon R17.9milyon i i pou tou lekole pou lannen 2023 antye, e pa zis enn de mwan parey US ti'n konmans fer apre ti bezwen arete akoz napa transpor dapre zot.

Mr Speaker en lot bon keksoz ki tous nou bann zenn, se ki Bidze i fer provizyon R6.8milyon pou kapab donn *Wifi* gratwit dan tou lekole. E sa Mr Speaker i en keksoz ki vremen byen akoz nou bezwen bouz anver sa transformasyon nimerik e lekole i en landrwa kot zot servi *internet* pou fer bokou resers e osi servi bann resours *online* pou edik nou zanfan avek.

E la mon fer lapel avek tou bann zanfan pou servi sa resours o maksimonm dan en

fason byen, pou zot prop devlopman ki a benefisyete zot demen. Mr Speaker nou fyer pou war ki Gouvernman pe kontinyen siport bann zenn pou al fer letid aletranze e menm ogmant zot *stipend* par 10poursan po upran kont kou lavi ki'n ogmante.

E sa i osi aplik nou bann zenn ki pe swiv zot letid Liniversite Sesel. Sa i ava osi en soulazman pou nou bann paran ki pe bezwen anvoy en pti larzan pou zot zanfan tou le mwan. Mr Speaker nou pe war ankor loportinite pou nou bann zenn, ki anvi al etidye lo zot menm e ki anvi investir dan zot ledikasyon, ki pou kapab ganny akse avek en *student loan* kot repeyman a ganny fer pou en period 10an.

Ankor sa i en loportinite ki Gouvernman LDS pe donn bann zenn pou ede devlop zot kapasite e ki an retour zot a kontribye dan devlopman nou pei. Pou bann zenn ki annan problem e ki nesesis reabilitasyon, nou Gouvernman pa pe negliz zot.

Nou war R9milyon ki'n ganny bidzete pou devlopman en *Youth Hope Residential Center*, ki a kapab donn zot sipor ki zot bezwen e kot zot a kapab refer zot lavi e ganny reabilite pou re entegre dan lasosyete. En zenn ki mal pran son semen i merit ganny en dezyenm sans. Ki a kapab

ganny sa sans pou retourn lo en bon semen. Akoz apre tou si nou pa fer sa zefor la lasosyete ki pou perdi demen.

Lo lot kote lagrikiltir Mr Speaker, mon kontan pou war ki Bidze in fer alokasyon R45.5milyon pou siport bann proze kapital dan sa sekter o nivo diferan distrik. E la nou apresye e dir mersi pou war konstriksyon en nouvo bazar pou ferme, akote bazar peser La Retraite, ki lontan nou ti pe espere, an vi ki nou bann ferme i bezwen desann anvil pou al vann zot legim.

Nou osi annan bon nouvel pou peser Anse Etoile, ki byento zot pou ganny en nouvo bazar ek fasilite pou netway zot pwason atraver provizyon ki SFA in fer, an vi ki bazar in deteryore e sa i ava donn lespas peser Anse Etoile pou kapab vann zot pwason dan en landrwa pli apropiye.

Problenm delo pou ferme Anse Etoile i osi en problenm ki byento, nou a kapab rezourd anvi ki bann Lazans konsernen in fini donn zot komitman pou kapab ed sa bann ferme avek delo dan bann letan lasesres. E la mon espere ki sa i ava materialize o pli vot posibil. Sa ankor enn fwa i demontre ki sa Gouvernman LDS pe travay dir pou byennet nou lakominote.

Mr Speaker mon pa pou manke pou donn mon sipor

ankor enn fwa, avek tou bann antite ki pe ede lager kont sa fleo drog akoz sa i en keksoz ki detri nou sosyete, afekte nou bann zenn, redwir prodiktivite e ogmant krim ek vyolans dan nou pei.

Mr Speaker la mon ti a kontan remersye nou *Coast Guard* ki touzour pare e vizilan dan sa lager, pou sirvey nou lanmer pou evite ki sa drog i antre dan nou pei. E osi bann Lazans sekirite lo Erport, ki pe fer en bon travay pou kapab aret sa bann dimoun ki pe anmenn sa pwason pou detri nou zenn.

Mr Speaker mon osi le profite pou remersye tou manm piblik ki pe pran zot responsabilite, e donn sipor nou bann zofisye dan sa lalit. Mr Speaker ler nou koz rezilta partaz sa bon travay ki LDS in fer dan zis 2an, nou war ki LDS in gard son parol.

Logmantasyon saler 10poursan dan Sekter Piblik ki pou pran lefe apartir le 1 Avril lannen prosen. E osi provizyon pou en 13enm mwan saler i bann lakonplisman ki nou merit fyer.

Seselwa pa'n kapab rezouir sa pandan sa de dernyen lannen, akoz sityasyon pa'n permet Mr Speaker. LDS i en parti ki responsab e ki war lwen. Pou Gouvernman ozordi kapab

annan mwayen pou donn en logmantasyon, ti nesesit bokou bann mezir ki Lopozisyon pa'n siporte.

E la mon fer referans avek ler Gouvernman ti decide aboli *FA4JR*, retir *Scheme URS*, sispann 13enm mwan saler pou sa dernyen 2an, program vaksen, louvertir Erport e tou sa ti, ti e tousala ti bann mezir ki ti nesese pou ariv kot nou ete ozordi. Me si nou ti'n ekout sa Lopozisyon, *LDS* ti pou'n *fail* sa pei e se sa ki zot ti anvi war.

Mr Speaker Gouvernman *LDS* in pran son responsabilite serye, e i pa pou zanmen tonm dan zot bann politik bonmarse ki zot rod zis popilarite san mazin pli lwen. La mon lans en lapel avek sekter prive pou osi konsider logmantasyon pou zot travayer si zot santi zot annan mwayen pou fer li.

E mon profite dir ek tou travayer Seselwa, ki nou osi bezwen travay dir e donn plis an retour, pou nou kapab kolektivman ganny plis rannman pou nou kapab benefisye plis e fer avanse nou pei.

La mon ti a kontan felisit tou travayer Seselwa ki pe leve e donn tou dan zot travay. Mr Speaker an konklizyon, mon ti a kontan pran sa loportinite pou remersye nou Prezidan, nou Vis Prezidan ek tou nou bann Minis.

Wi nou konnen i annan defi me nou konnen ki zot pe travay dir e pe donn bokou zot zefor e letan pou delivre sa ki meyer pou Sesel. Mr Speaker en remersiman spesyal pou nou Minis Finans ki la devan nou, ek son lekip ki'n fer en bon travay lo en Bidze tre pozitiv ki premye fwa nou'n war vin devan Lasanble. I en Bidze ki donn Seselwa bokou lespwar, ki nou pei i lo bon semen e ki nou lavenir i dan bon lanmen.

Me mon pou osi fer resorti ki nou tou nou annan en rol enportan pou zwe dan transformasyon e devlopman nou pei. I enportan pou nou tou kontinyen travay dir, sanz nou fason panse e anmenn pozitivite dan tou sa ki nou fer.

Mr Speaker mon ti a kontan pas en mesaz ek pep Seselwa pou dir zot, pa les zot ganny anbetavek sa Lopozisyon ki war tou keksoz i mal ki sa Gouvernman i fer. Zot sey tou fason pou konfiz Seselwa akoz zot pa anvi war sa Gouvernman ek sa pei progrese. Me avek sipor tou Seselwa, person pa pou kapab bar nou devlopman pou en meyer Sesel Mr Speaker.

Avan mon fini Mr Speaker mon osi le remersye mon *clerk* Madanm Doreen Dugasse e *DA* Anse Etoile Michelle Mussard ek son tim, pou sipor e sa bon travay ki

nou'n fer pou nou distrik. E mon espere ki nou a kapab kontinyen fer plis pou benefisye nou kominote. Mr Speaker mon priye ki Bondye a touzour protez nou zabitan ek nou pti pei Sesel e ki an 2023 nou ava i ava en lannen ki pli meyer ankor. Mersi Mr Speaker.

### **MR SPEAKER**

Mersi Onorab. Laparol i prezan pou Onorab Doris Porice.

### **HON DOYACE PORICE**

Mersi Mr Speaker. Bonzour Mr Speaker, Minis, tou mon bann koleg *MNAs* e tou Lepep Seselwa ki pe ekout mon ozordi. Mr Speaker avan mon konmans mon lentervansyon mon bezwen dir en gro mersi mon Bondye Papa pou sa kouraz ki'n donn mwan ozordi, pou anmenn mon kontribisyon anver sa Bidze 2023, ki Minis Hassan in prezant devan nou Vandredi le 4 Novanm 2022.

E mon demann Bondye son sipor pou ki mon a kapab annan sa kouraz pou fer mon prezantasyon pandan son prezans anver nou Lasanble. Mr Speaker sa Bidze mon vreman apresye. I en Bidze ki ekstraordiner apre 2an ki nou'n pas dan en kantite difikilte, kot Gouvernman *LDS* i pran en pei avek bokou defi

par egzanzp kof vid, bokou det nasyonal e a leksteryer, lavi ser, pandemik *Covid-19*, *fuel* monte, eksetera.

Nou tou nou konnen ki 2an avek en tel sityasyon parey, i pa fasil pou sa nouvo Gouvernman atraver nou nouvo Prezidan Wavel Ramkalawan son *Cabinet of Ministers* e osi Labank Santral ki pe diriz finans nou pei. Me, avek determinasyon e avek en Gouvernman responsab dousman, dousman nou'n kapab refer en pe sa bann defi ki nou ti, ki nou ti ladan.

E nou'n war en pe sa bann fri ki nou ti pe rode ki Seselwa i kapab refer en pe zot lavi. E pou sa mon dir mersi nou pep Seselwa pou sa pasyans e konprenezon pandan sa 2an.

Mr Speaker sa i en Bidze ki nou zabitan lo zil sirtou Baie Ste Anne Praslin, pou benefisye atraver anmenn plis larzan kot lakour. Annan goute ek dezennen pou nou zanzan ler zot dan lekol, kontinyasyon bann proze ki pou benefisye ki pou benefisye nou tou.

Annan en pli bon ledikasyon pou nou zanzan, sirtou bann ki dan pos segonder ki pe fer zot desizyon pou antre dan lemon travay e bokou ankor. An gro ler mon get sa Bidze mon santi ki Minis ek son lekip, in pran en

desizyon brav parey zot in pran pandan Bidze 2020, 21 e 22 pou fer sa pei bouze.

Get lefitir, amelyor lavi nou pep par anmenn plis larzan, manze kot lakour, kontiny bann proze, revwar size lakaz, later, lasante, ledikasyon nou pep. Ler mon get lo kote lasante an zeneral son Bidze i bon, me mon ti a kontan ki i ava annan en pe pou lopital Baie Ste Anne pou amelyor son lenfrastruktir, latizann e osi lekipman pou travay avek.

Akoz dan lepase in annan landrwa dan sa lopital ki pa'n ganny touse. An plis ki sa Mr Speaker, i annan lapey pou tou travayer dan sa Bidze.

Alor mon pe demann bann travayer lasante lo Praslin pou kontinyen sa bon travay bann ki pe donn tou, me bann ki ankor pe trenn lipye silvouple sakouy zot e montre ki zot kapab travay e ganny tou zot benefis. Aret met politik dan travay e fer soufer nou pep Praslinois. Lazenés osi mon santi ki i annan bokou pou fer. Mon asire ki dan sa Bidze, i annan larzan pou plizyer program, ki pou fer nou zenn vin pli aktiv non pa zis aktivite lo nivo nasyonal me dan distrik osi mon'n etidye sa byen.

Mr Speaker mon pou osi profite pou mon koz en pe lo nou bann zenn ki'n ganny

afekte par bann move lenfliyans. Kot zot osi zot pou benefisyé dan, dan sa Bidze atraver en sant reabilitasyon lo Praslin. Ki pou donn zot en dezyenm sans pou zot kapab refer e amelyor zot lavi. Pou zot osi kapab retourn dan lemondn travay e fer zot kontribisyon anver lasosyete.

Lo nivo sport dan distrik Baie Ste Anne Mr Speaker pa'n mal ale avek sa nouvo zofisyé lo Praslin mon zanmi Nadine e *Chairperson* Lasosyasyon Sport lo Praslin Weston Joubert e pa bliy nou zanmi Jean-Marc Athanase. Zot pe fer zot mye pou anmenn *sportsmen* ansanm menm si zot in ganny en pe difikilte kot i konsern lenfrastruktir e osi lekipman.

Me avek zot leksperyans dan spor, zot latitid anver lezot e osi pare pou ekoute in ed zot pou fer sa bon travay. E la ki Bidze pe donner, mon asire ki Gouvernman atraver Minister konsernen pou siport nou *sportsmen* lo zil.

Mon konnen ki dan sa Bidze i pou anmenn en diferans ant 2022 ek 2023, pou amelyor nou bann fasilite spor lo Praslin. Nivo ledikasyon mon santi ki avek nouvo devlopman pe mars ase byen.

Nou bann *heads* e *teachers*, pe fer zot mye avek sa ki zot annan pou donn letid

nou zanfán. Lagrikiltir lo Praslin pa'n anmenn bokou. Nou ankor pe pouse pou anmenn plis, me fermye ki deza annan later, fodre zot travay en pe pli dir parey zot konnen ki lo nou zil i annan bokou touris. E osi nou zabitan pe agrandi e nou bezwen prodwir plis.

E la parey nou'n tande dan sa Bidze pou Minister konsernen, pou kontinyen siport e ankouraz sa bann fermye pou prodwir de kalite, e anmenn plis la ki byento zot pou ganny zot nouvo bazar dan Baie Ste Anne ansanm avek lapes, ki zot osi pe anmenn bokou devlopman pandan sa 2an kot zot pe ganny lofis pou travayer *SFA*, *cold storage* eksetera.

Pou nou bann peser ki byen lontan zot ti pe espere. E byento peser zot osi pou annan zot panton e landrwa pou desarz zot pwason dan sa dezyenm faz sa travay.

Tousala Mr Speaker in en devlopman ki Praslinois pe byen apresye, aköz byen lontan in zis desen lo papye, me nanryen pa'n ganny fer. Mon kontan sa nouvo Gouvernman atraver sa Minister konsernen, pe fer rev nou peser vin vre, avek larzan dan sa Bidze pou ede fer sa travay pli vit.

Osi parey nou tande, peser e planter pou benefisyè

atraver pa pey taks ziska 2026. Alor mon pou demann zot pou zot osi partaz sa benefis avek nou zabitan, kot nou kot pou ed, pou ede fer pri lavi vin pli meyer. Lakaz ek later i ankor en defi pou nou lo zil. Kot bokou nou zabitan i ankor pe lwe lakaz. En bon pe letan nou distrik pa ankor donn lakaz oubyen en bout later e la mon kontan ki Gouvernman pe fer zot mye pou revwar nou zil.

Mr Speaker ennler oule pa retourn dan lepase. Me lafason ki serten politisyen i koze, ou a krwar zot pa ti la, zot fek desann sorti dan en plannet. Ouswa dan en lot pei kot zot pa ti konnen ki mannyer keksoz ti deroule Sesel.

Me lo nivo lasistans sosyal Mr Speaker sa in amelyor bokou e i annan en kontrol lo lesefer. Zabitan pe travay, menm fer plis ki en louvraz pou zot kapab ganny en pti pe plis pou amelyor zot lakour. E nou lo nou zil nou zabitan pe konpran ki sa Gouvernman pe fer. Zot pe konpran ki nou bezwen travay pou reisir, non pa depan lo Gouvernman. Zot in osi konpran ki zot bezwen pran zot responsabilite pou zot ariv kot zot merit arive.

Kot i konsern Minister Gouvernman Lokal sirtou i konsern Ladministrasyon

Distrik, i annan ki'n ganny fer byen. Atraver Ladministrater Distrik Denis Antat avek son OM Miss Chantal Laure, in annan en bon kolaborasyon travay. E sa de travayer pe fer zot mye. Me lezot travayer Mr Speaker mon pa war nanryen ki pe ganny fer, koze i annan me aksyon zero!

Nou ankor annan trenn lipye dan Ladministrasyon Distrik. Sirtou kot i konsern regroupman bann program diferan laz sa i vremen manke atraver - sa i vremen manke. Travayer i ankor krwar ki travay i zis dan lofis;- wi zis dan lofis

Mr Speaker sa i mon lobzervasyon pandan sa 2an ki mon en Manm Lasanble, me 4an ki mon la, ki mon lo sa zil dan sa distrik. Imen, imen menm si zot ganny dir pa zis sa i ankor annan lezot travayer dan lezot departman gouvrenmantal osi ki parey.

E ki nou zabitan pe konplent fason travay san realize ki zot lapey i dan sa Bidze ;- pa zis lapey i osi annan 13enm mwan saler ek logmantasyon. Mon pou felisit Minister Transpor pou sa travay ki'n fer lo nou zil kot byento, nou pe ganny nou nouvo lasose ek son lenfrastruktir pou tir en pe konzasyon ki'n annan kot sa por aktyel. Wi ti annan plan me en plan ki'n dormi.

Menm si nou ti annan en problem finansyel, me nou Gouvrenman in sey zot mye pou get lo nou zil. Par kont kot i konsern semen in osi annan en amelyorasyon me in annan bokou pou fer. Kot la nou pe demann sa Minister pou annan en nouvo masin koltar, pou ede fer travay vin pli vit. Pou ki nou a kapab ganny en sirfas semen pli zoli, ki pou fer nou zil vin sa bizou ki mon'n toultan pe demande Mr Speaker.

Mon konnen ki Minis Finans in aranz Bidze sa Minister konsernen. E ki byento nou pou annan lezot devlopman byen enteresan lo nou zil kot pou angaz nou bann pti *businessmen* ki anvi bouz pli devan oubyen agrandi zot biznes pou benefis nou zil Gouvrenman e osi zot menm.

Avek devlopman Kato Nwanr Ile Eve, vremen nou pou war nou distrik Baie Ste Anne enteresan. Ler nou get pandan sa dernyen 2an, nou pe al ganny plizyer kado nwel ek lannen. Ki byen lontan Praslinoise pa'n zanmen trouve. Mon santi ki Gouvrenman atraver Minis Finans pe fer zot mye, pou siport bann devlopman neser lo nou zil. Zis fodre zabitan nou zil fodre sanz zot *mindset*;- tir politik dan travay, aret les serten dimoun dan

serten lofis anbet zot pou nou pa progresse.

Zabitan Praslin get nou de konman Onorab Churchill Gill ki mannyer nou travay ansanm.

**(APPLAUSE)**

**HON DOYACE PORICE**

Ki mannyer nou travay ansanm san melanz nou lopinyon politik, akoz nou tou lede nou santi ki nou pe viz ver menm semen, pou siport nou Gouvernman pou anmenn plis devlopman lo nou zil. E osi re anmenn nou zabitan ansanm. Nou fer sir ki tou bann Minister i vin get nou siporte, amelyore kot i konsernen. Rod larzan ek Minis Finans ouswa lakonpanyen prive ki lokal ou enternasyonal.

Mwan avek mon koleg Onorab Churchill, Onorab Woodcock, Vincent Cedras reprezantan Gouvernman, e osi nou de *DA* Denis e Michael, se sa fason ki nou travay. E akey nou bann Lazans e gouvemantal ...

**(APPLAUSE)**

**HON DOYACE PORICE**

... e osi lorganizasyon prive lo nou zil.

Politik i annan son letan e son fason fer, me ler in ariv ler travay nou travay, e nou met politik de kote. E nou

konnen ki nou, nou osi annan nou lapey e benefis dan sa Bidze. Alor nou bezwen get devlopman dan nou zil ek son zabitan premye. Mon pou ankouraz e enplor avek nou travayer - sirtou bann ki travay dan Gouvernman, pou zot osi fer parey nou de.

E anmenn sa bon servis pou nou zabitan lo nou zil Praslin. E sa Mr Speaker pou anmenn nou lwen, koz kot nou pou konpran kanmarad pli byen. E fer nou distrik vin sa pli meyer ki lezot distrik.

Ler nou pou met diferans de kote e annan sa lazwa parey nou ti ete pandan nou lanfans. Pa konpran kanmarad pa pou anmenn nou okenn par. Minis Finans ek son lekip pa'n kit person deryer. In en Minister responsab. In ekoute, in delivre, zot in travay dir pou tou pou nou benefisye parey nou'n war ki lannen 2023 pou pli byen ki 2022.

Me menm si nou ti a kontan war plis, me avek plis zefor, avek lankourazman plis biznes dan nou pei Sesel, nou pou arive. La mon pe get nou *home carers* ki zot osi zot benefisye avek zot 13enm mwan saler.

Bann pansyoner;- bann pansyoner pe kontinyen ganny zot R500. Bann zabitan semen *PUC* pe al ganny zot konpansasyon. Tousala i pe fer tou byen, sa Bidze in



anmenn bokou soulazman pou nou pep, sirtou nou bann travayer sekter piblik ki pe al ganny 10poursan logmantasyon lo saler.

Me mon sipli avek lakonpanyen prive pou zot osi fer parey e get dan *welfare* zot travayer soulaz zot osi pou zot kapab donn sa, sa servis pli bon dan zot lakonpanyen. E la mon pou demann Minis Finans ek son lekip pou ki ler nou'n ganny plis larzan, *please* kontinyen pou get dan *welfare* nou travayer sirtou bann ki pe ganny pli ba saler.

Kontinyen partaz sa bann benefis lo nou pep, me osi kontinyen anmas en pe pou letan dir. Annou fer sir ki nou kontinyen ki kontinyen sa Gouvernman responsab pou li pou ki lemonn i kontinyen war nou pe fer pli byen e anmenn plis zot soutyen anver nou pti pei Sesel. La, mon asire ki sa pou arive. Me, demann i toultan la pou siporte. Mr Speaker in montre sa pep ki atraver *tourism*, nou'n ganny vole dan le pase.

Sa i montre nou, ki zis pandan sa 2an ki benefis nou'n resevwar atraver touris, ki'n vin Sesel, in montre nou ki *tourism* in en Minister ki responsab e onnet, pou fer nou pei benefisyen atraver zot *marketing* ki zot in fer. E kontribisyon anver sa Bidze.

E sa in ede osi, pou anmenn plis larzan *tax* kot lezot *businessmen* dan letablisman touristik. Mr Speaker avek sa Gouvernman responsab e determinen a ker, a ker pou tou son pep.

Nou Praslin, nou pe benefisyen atraver bann nouvo proze parey nouvo stasyon teste transpor. En baz lakot, *Marina*, devlopman kot nouvo lasose, kot bann *businessmen* pou benefisyen bann nouvo proze lo zil Eve.

Nouvo *roundabout*, semen *Pasquere*, bann proze devlopman lakot Baie Ste Anne e plizyer ankor. E sa pou fer nou zil pli zoli, e pli akeyan kot bokou viziter, pou admir nou distrik. Mon pou osi profite pou koz en pe lo zil vwazen La Digue.

Kot zot osi pe benefisyen atraver bokou proze. Lagrandisman lasose, nouvo lopital, lekol primer e segonder, re aranz landrwa sportif, *Old People's Home*, Kordgard, drenaz e lezot pti proze.

Si Gouvernman *LDS* pa ti met son lipye ater, e pa aksepte sa petisyon ozordi, zot pa ti pou ganny tousala Mr Speaker. Sirtou, sa nouvo lopital sofistike ki pe ganny fer. La Digue i dan bon! Granmersi *Liaison Officer* pou Gouvernman Mr Loncy Micock

ki pe debourye pou fer avanse sa bann proze lo sa zil.

Mon pou koz en kou lo 13enm mwan lapey, ki serten politisyen dan *US* pe fer zot politik bonmarse, ki fodre 13enm mwan lapey i ganny donnen plen. San realize ki zot prop Gouvernman anonse par zot *ex Minister* Finans Loustau-Lalande, ti dir dan enn son lapres, kot 13enm mwan saler fodre ganny re etidye.

Pou sorti 13enm mwan saler plen, e pou bouz lo performans. Me, nou kantmenm nou Gouvernman in anons sa, i *still* annan sa 13enm mwan saler plen dan tou sekter Gouvernman. Me zot pou ganny 50poursan e 50poursan pou performans.

Menm parey laz pansyon, ki Gouvernman lepase ti mansyonnen, par son prop Prezidan Danny Faure, ti dir ki zot pe al revwar laz pansyon. Pou fer li sorti 63an pou vin 65an. Sa ti ganny dir avek son prop labous.

Akoz zot ti konnen ki Fon Pansyon ti pou kapab tenir peyman, selman ziska 35an. Prezan ozordi serten dan parti *US*, zot krwar ki zot ki pou dir nou ki pou fer, e zot bliy vitman. Ozordi parti *US* pe dir nou donn tou larises ki nou pe gannyen, san mazine ki ler zot ti la, zot in kit en ta det ki

Gouvernman in bezwen re peye avek son lentere.

Mr Speaker, mon ti a kontan demann Minis Finans atraver ou, pou azir fran e fer lepep konnen ki kantite det, e konbyen ki nou'n ramase letan ki Gouvernman in antre dan lofis 2020. Ki'n ganny servi pandan sa 43an.

Ki kantite balo lenz sale ki Gouvernman *LDS* in anmase, ki swadizan nou ti pe ganny led. E osi ki kantite vol ki'n pase pandan sa letan! Sa pou ed Seselwa reflesir avan zot azir. Avek sa bann larzan, ki nou pe re pey det Sesel, ti pou ede fer pri bis vin pli bon marse.

Nou ti pou annan plis larzan dan Fon Pansyon, fer kou lavi vin pli meyer. E sa mon ti ava kontan ki Minis i fer kler dan son repons. Pour ki Seselwa pa ava dir ki nou pe kasyet keksoz. Si fodre mansyonnen non, sa ki koupab mansyonnen, akoz Ankour pa kasyet naryen ler ou fer lofans.

Mr Speaker, dan lavi pa tou lizye ki ouver parey. E pa tou zorey ki tann byen, pou kapab konpran ki Gouvernman *LDS* pe fer. E la Minis, mon ti a kontan ki ler ou ganny en pti Bidze an plis, pou donn Minister Lasante, en bon pe linet sofistike, e *hearing aid*, pou ede pou le fitir. Parey i annan serten politisyen dan parti *US*, ki'n

dir ki Prezidan i *travel* dan *jeep* prive.

Mon ti a voudre konnen Minis, konbyen ti koute sa *jeep* prive?

*(laughter)*

**HON DOYACE PORICE**

En *jeep* ki ti napa drayver, e la i annan en laplikasyon pou en drayver Mr Speaker. Alor, anvoy enn ki bon pou ki zot a konnen kote i ale. Sirtou enn ki bril byen lapay ...

*(laughter)*

**HON DOYACE PORICE**

... me i depan ki kalite lapay.

Dan lavi par ler serten politisyen dan *US*, pa konnen ki zot rabase! Mon konnen Mr Speaker, ki sa Bidze 2023 in sok zot!

***(APPLAUSE)***

**HON DOYACE PORICE**

Wi, in sok zot e fer serten zot derobe, e pa konnen ki pou fer, ki pou dir zot siporter.

Olye dir mersi sa Gouvernman *LDS*, pou tir sa pei ki nou tou nou konnen, ki manner ti avan 2an.

**MR SPEAKER**

30 minit Onorab.

**HON DOYACE PORICE**

Logmantasyon pou Minis e larzan palto ki *US* ki tou lazournen i koz lo la. Be Minis mon ti a kontan ki ou fer konnen Lepep Seselwa, konbyen ki serten *Leader* dan *ANUS* i gannyen, menm si zot pa pe travay pou sa pep?

E osi konbyen *Leader* Lopozisyon i gannyen, si i napa larzan palto ladan? Mon pou demann Lepep Seselwa pou aret viv dan negativite, annou pran nou responsabilite e met pozitivite premye dan nou lavi.

Avek en Gouvernman responsab e determinen, e pare pou pa kit okenn son zanfan deryer, ki ou dan ble, rouz, zonn oubyen nenport larelizyon, ou ganny aksepte pou ki ansanm nou a kapab avans pli devan.

Seselwa, Seselwaz annou kontinyen bril nou labouzi ...

**MR SPEAKER**

Onorab Terminen silvouple.

**HON DOYACE PORICE**

... wi, mon pe terminen. Kontinyen bril nou labouzi avek nou Bondye Papa, pou ki Sesel i reste sa bizou dan Losean Endyen. E osi pou lemonn, ki i a kontinyen ed Sesel. E ki nou osi vin sa pep ini ansanm, akoz ede detri nou pei par bann mansonz, pa pou anmenn okenn par.

Pou terminen Mr Speaker, mon pou tir sapo avek Minis Finans - Mr Hassan ek son lekip, pou sa Bidze ekstraordiner ki zot in prezant avek Lepep Seselwa.

Mon pou dir osi en gro mersi nou Prezidan Wavel Ramkalawan, son bann Minis, Gouverner Labank Santral Mrs Caroline Abel ek son *staff*, ki'n ed nou pandan sa 2an. Pou amelyor lavi nou pep Seselwa, par donn nou bann konsey ki'n ed nou annan pasyans, ek perseverans. E osi fer nou pep konpran larealite lavi.

**MR SPEAKER**

Mersi Onorab.

**HON DOYACE PORICE**

Dernyen Mr Speaker. Pli gro mersi i al pou nou Bondye Papa, ki'n ed nou, e pou kontinyen ed Sesel ek son pep, pou sanzman ki'n anmennen anver pei, aköz nou *LDS* nou touzour krwar dan li - *God is good all the time!* E nou *LDS* nou pa pou zanmen les tonbe! Mersi.

**(APPLAUSE)**

**MR SPEAKER**

Mersi Onorab. Mon ava donn laparol avek Onorab Audrey Vidot.

**HON AUDREY VIDOT**

Mersi Mr Speaker. Bonzour Mr Speaker, Bonzour Minis, Bonzour tou Manm Onorab. Bonzour zabitan Roche Caiman e bonzour tou dimoun ki a lekout.

Mr Speaker, ou konnen ler en dimoun i komans dekrir Seselwa koman en lisyen, konmsi nou lisyen ki'n benny avek *shampoo*, mon demann mon lekor si sa dimoun pa'n fimen, kot in al misouk-misouk dan lapay.

**(APPLAUSE)**

**HON AUDREY VIDOT**

Mr Speaker atraver ou ler mon koleg lot kote lata pe dir, aste linet pou donn nou dan *US*. Nou dan *US* nou avar aste nou linet nou, nou pa bezwen Gouvernman donn nou *allowance* pou nou aste nou linet. Me par kont mon ti krwar Onorab pou dir avek son koleg Minis, pran sa larzan *allowance* linet, met dan fon Leta. Donn sa bann pansyoner ki pa pe ganny son R500.

**(APPLAUSE)**

**HON AUDREY VIDOT**

Akoz pa zot tou ki pe gannyen.

Mr Speaker, *United Seychelles* i remersye tou sa Seselwa ki'n pran sa desizyon

brav, pou zwenn nou dimans pase le 6 Novanm 2022, dan nou gran *rally* lo laplenn Anse Boileau. Se avek fyerte ek determinasyon, ki nou'n prouve ki nou ankor en lafors politik, kot ni lapli, zekler ek loraz pa pou fer nou per.

Nou pou konvenki e nou konvenki ki napa naryen osi, ki pou bar nou. Prezans nou bann zenn zonn, fanm ek dimoun aze, Seselwa in anvoy en mesaz tre kler avek sa Gouvernman. *United Seychelles* i sel opsyon pou Sesel!

Mr Speaker dan prezantasyon Bidze 2023 ki'n prezante semenn pase, Minis ti dir ek sa Lasanble, mon site "ki lannen pase dan en fason fran e onnet, nou sityasyon ti kritike menm ki nou ti o bor en presipis." Fen sitasyon.

Me apre ki nou'n vwar, son koleg Minis Mr Antony Derjacques i vin devan nou Lasanble, e konfirman ki zot in byen aranz zot avek zot logmantasyon larzan, *allowance* palto, ledan, linet, lakaz e lezot ankor. E menm in ganny sipor enn zot Manm Parlman, LDS kot in dir zot pou pran tou sa ki pou zot. Swivi par en lot koleg Minis, ki li dan son leloz i zis *empowerment*. Me selman realite naryen pa pe ganny fer pou lafanmir Seselwa.

Alors mon bann kestyon pou Minis. Eski sa ki ou a pe vin fran avek onnet, avek pep Seselwa? Eski sa i bann kalite en Gouvernman responsab? Eski sa ki zot apel bann desizyon brav, e pa popilis?

Eski sanmenm sa ki zot apel nou o bor en presipis, ouswa avek bann desizyon mal kalkile ki zot pran, ki zot pou zet mazorite Seselwa dan en presipis? Seryezman LDS, konmsi pou ki zot pe pran travayer Seselwa la deor?

Mr Speaker rikord LDS dan sa dernyen 2an, i montre klerman ki zot en Gouvernman - non, selman ki zot napa en plan, zot pa enterese, e pli serye zot pa kapab dirize.

Pandan sa dernyen 2an Seselwa in kapab konstate, ki anba zot mankman direksyon, kou lavi i kontinyen monte, e pou kontinyen ogmante. Minis dan ou prezantasyon Bidze, ou'n vin avek en logmantasyon 10poursan lo saler tou Seselwa. E sa pe komans avek depi anler latet ziska lipye.

Dan labsans lamannman Lalwa, Prezidan Larepublik i ankor en travayer servis piblik, ki li i pe tous li en saler R80mil zis sa logmantasyon, i preski deza par lao *minimum* saler.

E ou sa travayer Seselwa ou pou benefisye zis ek R1000 logmantasyon, depandan lo ou

saler. Eski sa i zis? E ou sa travayer dan sekter prive, ki pe travay dir, e pe donn lanmen kontribye dan lekonomi, ou'n mank sa bis, i tre tris ou'n ganny kit ater avek Gouvernman LDS.

Mr Speaker Seselwa i bezwen konpran ki logmantasyon saler, i annan serten lenplikasyon ki vin avek. Nou'n vwar bokou fwa e nou ankor pe eksperyanse, ki avek logmantasyon ki swa saler, e de baz ou *allowance*, i annan en group dimoun ki espere a sak fwa, ki sa logmantasyon i ganny donner, pou zot rod zot logmantasyon zot osi. E ou sa travayer ki pe travay dir, ou pa vwar ou benefis. E la mon pe koz pou sa bann marsan, ki pe abiz lo marse lib.

E la mon egalman koz lo Gouvernman Minis, ki letan i donn avek lanmen drwat i fer sir ki lanmen i pran de fwa plis ki in donner.

Mr Speaker mon'n koz avek mazorite dimoun Roche Caiman, konsernan sa Bidze e *voila* ki zot annan pou dir;

Akoz eski ou ek ou bann koleg pe benefisye 100poursan *allowance* pou lakaz? E ki bann ki pe lo *part rental* li i pou kontinyelman ganny 60poursan kontribisyon, menm si i pe vwar difikilte pou fer debout zwenn, kontrerman avek ou Minis, tarif delo ek

elektrik i kontinyelman ogmante. E ou Gouvernman i met mezir an plas, ki pa ni menm tou travayer Seselwa ki pe benefisye. Eski sanmenm sa ki zot pe dir pa kit personn deryer?

Minis, ek sa *safety net* ki ou avek ou bann koleg i annan, e la mon pe koz lo *allowance entertainment*, palto, linet, lakaz lezot ankor, akoz ki ou Gouvernman pa kapab montre menm konpasyon, avek sa fanmir ki pe sey rod en led avek Lazans Proteksyon Sosyal?

Nou'n tann bokou koze lo pri karbiran. Seselwa pe demande ki pri bis i desann imedyatman!

**(APPLAUSE)**

### **HON AUDREY VIDOT**

Akoz Roche Caiman mazorite dimoun i servi bis pou li deplase.

Mr Speaker Gouvernman LDS ek son bann manm Lasanble i sitan dekonekte, avek pep Seselwa ki i pa pe santi vre sor, e soufrans sa pep la deor.

Mr Speaker nou'n tann bokou koze parmi LDS dan sa Lasanble, ki travayer Seselwa, pa oule vin anrezistre pou travay. E i menm annan ki'n dir, ki Seselwa i zis asize o bor semen. Ki mannyer ou espekte sa Seselwa fer zot

konfyans, ler pe fer fas avek labi dan travay?

E nou vwar Prezidan ek son bann Minis, pe fer festen dan sa menm landrwa travay. Kote sa Seselwa pou ale pou plenny son sor? Sa pa apel koripsyon sa? Prezan ou a dir avek li ki i pou ganny zis 50poursan son 13enm mwan saler. E lot 50poursan i pou bezwen prouv son lekor pou li kalifye!

Be Minis ou avek ou bann koleg, ki pandan sa dernyen 2an zot in zis koup riban, e zot in donn zot lekor logmantasyon *allowance*, ou pou kalifye ou gratwite plen ou, eski kantite fwa, ki zot in koup riban i fer zot kalifye pou zot ganny zot gratwite plen? Mon poz sa la Minis pou ou.

Minis koman nou pe koz lo sityasyon lanplwa. Zot leker pa fermal, letan zot pe get poursantaz Seselwa ki pa dan lanplwa. E ki pa ankor ni menm ganny en lanplwa la. E i pou komans en nouvo lannen san en lanplwa, zot leker pa fermal?

Mr Speaker, i tris pou ekout piblik kot i kritik efikasite nou sistenm Lasante. Ler bann dirizan *United Seychelles* i kestyonn Minister Lasante, pou ede montre defayans i ete pou amelyore, si mikro pa ganny koupe, nou ganny dir kestyon i tro bokou pou Minis fini reponn.

Be akfer i Minis? Zis pou li vin pran son *allowance*? I pou get zis son lekor ki i aranz son lekor li? Alors, Minis sey dir nou ki mannyer zot ekspekte, efikasite nou sistenm lasante, si zot pa ekout konplent ek konsern sorti kot piblik?

Zabitan Roche Caiman in donn mwan en repons pou sa. Zot dir avek mwan” Onorab mwan ek ou nou pa en priyorite pou sa Gouvernman *LDS*. “

Dan en letan kot i annan en kriz ekonomik, Minis ek ou Gouvernman zot deside montre Seselwa e menm bann profesyonnel lasante zot vre kouler. Eski servis lasante i sitan pa bon pou zot, ki zot bezwen *allowance* spesyal pou test zot lizye, aranz zot ledan, e fer lezot tes ankor?

Si nou sistenm lasante in ariv sa staz se gras a zot. La nou bann dimoun aze pe ganny pini pou naryen ditou. Lo sa pti larzan pansyon, kote zot pou gannyen pou pey dimoun pou vin fer *physio* kot zot? Akoz zot ganny en swen en fwa par mwan? I annan menm ki pa ni menm gannyen. La randevou i ganny anvoye parey lavant later. Ozordi zour dan Lopital napa latizann, menm bann avek maladi kronik napa. E zot bezwen fer Seselwa fer vini latizann.

Travayer lasante menm pe ganny dir napa resours pou travay, avek en mazore pe bezwen tir dan zot pos pou kapab fer marse nou sistenm lasante. Se pourtan i annan ki'n fer travayer lasante fer lamars, e la ozordi, zot dan bann pozisyon pou fer sa diferans. Ni tann zot pa tann zot, zis *US* ki annan lavwa pou koze. Alors, mwan mon dir travayer Lasante desann zwenn nou pou nou la mars ler nou fer.

Mr Speaker lenfrastruktir 43an i la, i regretab profesyonnel pe pran retret. E i annan mankman ansenyan Seselwa kalifye lo tou nivo. Menm si nou ankor annan ansenyan ki la e ankor pe donn tou pou ledikasyon nou bann zanfan, sa Bidze pa adres bann defi e defayans. I regretab ki fristrasyon i kontinyelman ogmante, e sa i enpakte lo nou bann etidyan ki fitir nou pei.

Minis zot dir ki zot en Gouvernman responsab, wi, zot responsab pou sa bann ansenyan ki pa ankor ganny zot *long service allowance*. Zot responsab wi, pou pa donn logmantasyon bann etidyan pos-segonder zot *allowance*. Wi, zot responsab pou destabiliz standar lavi, Seselwa ki'n viv pandan sa dernyen 2an ki zot la.

Gouvernman i konnen, e i konn tre byen ki bann etidyan pos-segonder i bezwen aste *uniform* e lekipman travay, depandan lo zot lekol. Ek sa pri lavi, kote sa bann etidyan pou gannnen? I annan lenstitisyon ki mank resours, lekipman travay, e la aktyel i annan en kantite renovasyon ki merite, dan sa bann fasilite kot etidyan i servi.

Pa vin dir nou 43an, akoz ki la ki pe travay. Zot ki pe *rule border*, akoz ler zot ti demann pouvwar, zot pa ti dir okenn kondisyon. Akoz ler ou ganny pouvwar ou aksepte li parey i ete. Zis parey proverb Kreol i dir, ou aksepte bef ek son korn. Tou sa bann defi pe akimile e Gouvernman pa pe fer naryen pou adrese. Zot pe penn en portre ki tou keksoz pe mars tre byen. Me realite la deor etidyan, paran, ansenyan, i vwar tou lekontrer.

Zis parey bomaten mon'n tann Onorab George dir pou dir, pou ganny *internet, Wifi*. Atraver ou mon oule dir Mr Speaker, mon oule dir avek Onorab George zis ale al kot etidyan *SIT*, bann ki pe fer zot *National Diploma in Information System, Engineering*, i a dir ou problem *internet* zot gannnen.

Mr Speaker, nou dan *United Seychelles* nou oule



enform Prezidan ek son bann Minis, ki Seselwa la deor pe kont zour pou 2025 arive. Parey Onorab Naidu ti kriye dan Lasanble "*Enough is enough I can't take it no more*" - Seselwa osi la deor pe soufer, bokou plis dan sa lespas 2an. Zot osi zot in dir '*Enough is enough I can't take it no more*'.

Seselwa i vwar zot dan kler. Ler zot pe ran kredi lo travay zot kanmarad. Prezidan i debout *State House* i dir en parol, apre son Minis i vin kon tradwir e dir lo medya, oubyen devan nou Lasanble en lot. Zis parey Onorab George atraver ou Mr Speaker, ler i pe koz lo *Espace* pou bann Departman Touris ti merit ladan, dan Sizyenm Lasanble ki son bann koleg ti dir, al tir *STB* laba dan *Espace Building*.

Sey dir nou, ki mannyer zot ekspekte Seselwa pou kontinyen krwar zot dan sa *LDS*? Alors kestyon ki plizyer Seselwa la deor pe demande, se ki Sesel ki sa ladministrasyon *LDS* ek son bann *MNA LDS* pe viv ladan?

Akoz i kler ki zot pe viv dan en lot Sesel, kontrerman avek realite sa pep ki'n elekte zot la pou vin fer pli byen. Menm si zot rod tou mannev pou vin anpes nou koze, Seselwa la deor i vwar e tann zot!

Akoz sa vilen manni anpes Lopoziyon koze, ki zot

in pran pou blok nou, pe filtre parmi zot prop aktivis e siporter. Kot pe ganny anpese pou kritik dan zot prop serk.

Mon felisit bann ki rezilyan e pa per pou vin dan piblik, pou dir ki zot pe ganny bloke e maltrete aköz zot pe kritik zot prop Gouvernman, ki zot in lite dan sa dernyen 30an pou met o pouvwar. E ozordi pe monte zot, zot larogans pouvwar.

Mr Speaker *United Seychelles* dan son minorite pou kontinyen met presyon lo sa Gouvernman. E koz lo soufrans sa pep. Zot kapab mangonnen lot kote, kontan pa kontan nou pou kontinyen koz lo soufrans sa pep!

**(APPLAUSE)**

### **HON AUDREY VIDOT**

Seselwa i konnen ki *LDS* i ankor pe zwe sourd e pa enterese avek zot. Wi, Onorab Georges i konnen ki bor i pou debout. Menm apre diskour Minis, Bidze semenn pase Seselwa Dimans le 6 Novanm 2022, dan *rally* lo laplenn Anse Boileau, zot in prouv sa! Seselwa in pas zot en mesaz tre kler, ki lekip *United Seychelles* i sel opsyon pou Sesel!

**(APPLAUSE)**

### **HON AUDREY VIDOT**

Nou konvenki ki Seselwa in fini fer son desizyon. 2025 zot in dir fodre tir li! Mersi Mr Speaker.

**(APPLAUSE)**

**MR SPEAKER**

Mersi Onorab. On pa pou tro pres Onorab ki pe swiv pou koup son diskour. Alor nou ava pran poz la, e nou ava re pran deba 2er. Mersi.

**(BREAK)**

**MR SPEAKER**

Bonn apre midi tou dimoun. Laparol pour Onorab Michel Roucou.

**HON MICHEL ROUCOU**

Mersi Mr Speaker. Bonn apre midi tou mon bann koleg Onorab. Bonn apre midi Minis. E bonn apre midi spesyal Mr Speaker i al pour bann zoli dimoun ki zabitan Mont Fleuri e bann zabitan ki vreman lwayal, vreman debouryer Mr Speaker.

Mr Speaker mon vreman ozordi annan en lakontantman dan mwan. Akoz ler mon'n get sa Bidze ki Minis in anmenn devan nou, e ler mon'n ekout diskour sorti kot Onorab Vidot, ki son distrik i baliz pa tro lwen avek pour mon distrik Mont Fleuri.

Espesyalman ler in demann nou ki ler nou

Gouvernman in vin o pouvwar, se ki i annan bann lenfrastriktir ki bezwen aranze. E si nou, nou anmas bef nou bezwen anmas li ek son korn. Be mwan mon anvi dir ek Onorab Vidot, atraver ou Mr Speaker, ki ler nou'n vin o pouvwar ni bef, ni korn ti napa! Zot in pran preski tou. E nou aprezan nou'n bezwen fer sir pour nou al rode e anmennen pour nou re batir nou pei Mr Speaker.

E osi i annan sa zafer kot zot pe dir bann trwazyenm-az ki pa bezwen pe fer sa kontribisyon Mr Speaker. Bann ki pe reste dan en *Home*. E mwan mon annan en zanmi ki reste dan en *Home* i vreman kontan in ganny en pti landrwa reste. E en pti landrwa vreman formidab.

E i dir mwan se ki laba zot pe ganny delo ek elektrik pour nanryen. E osi zot ganny sekirite, ki fer sir pou dir napa person ki vin fer okenn bann akt vandaliz laba.

Mr Speaker Bidze ki Minis in prezant ek nou Lasanble mon'n ganny sans pour mwan ekout en pti pe bann deba deor. Espesyalman enn ki ti pas – mon ti vwar dan nouvel kot en zanmi ti pe koze, Mr James Govinden. Kot li menm li ou ti vwar sa lazwa dan son leker Mr Speaker. Pourtan i pa en dimoun ki anploye. I en dimoun ki

debourye dan son *pick-up* fer son pti kours Mr Speaker. Kot in menm dir nou pou dir sa Prezidan ki la i annan en Bondye avek li, ki mars avek li Mr Speaker.

E tou laprev i la Mr Speaker. Zis 2an apre ki nou ti bezwen al dan *lockdown* pour en pe letan. Apre re ouver pou rekonmans re pran nou lekonomi. Nou'n vwar ki benefis ki in anmennen avek bann desizyon Mr Speaker - bann desizyon, en Gouvernman ki pran desizyon ki mannyer lekonomi pe re batir. Pe re bouze kot menm sekter prive li menm li zot war kot zot biznes pe fer progre.

E bann ki ti deza dan en lot biznes zot pe re antre Mr Speaker dan en lot biznes. Akoz atraver *Covid* zot in war ki mannyer zot kapab lans dan lezot biznes ankor.

Mr Speaker dan Bidze li menm li mon'n kapab asize pas lo 2, 3 pwen ki Minis li menm li in prezant avek nou. E in koz en pti pe lo remaniman tasyon saler Mr Speaker. E la kot nou'n war se ki kot i annan sa diskisyon ki Minis ti mansyonnen dan Bidze 2021, kot zot pe revwar en pti pe bann saler pou fer sir pou dir se ki bann dimoun ki petet li pe ganny en *allowance*, kot demen si zot al rod en *loan* malgre ki zot saler i ba, ki laba

sa i kapab ganny pran an kondisyon.

Mwan menm mwan Mr Speaker ler mon ti pe – mwan ek mon fanmir nou ti pe ganny nou lakaz en pe letan pase, ler nou ti ale pour nou al siny nou Lagreman, fer nou bann formalite, nou ti ganny dir pou dir se ki nou *allowance* pa ganny konte, i get zis nou saler. Kot sa i pa ti ede, akoz i ti annan sa de balansman lo nou plan ki nou ti'n fer mwan avek mon *partner* sa letan.

Be Mr Speaker be ozordi ler nou pou war pou dir se ki bann *allowance* pou ganny met ansanm, e en dimoun ki petet son saler pa ti lo sa nivo, i kapab ale pran li en *loan* pour li kapab fer son devlopman. Menm pou aste en keksoz ki petet i bezwen.

E ler nou pe get lo kote ogmantasyon saler Mr Speaker, ki saler minimonm ti 5mil 485. Ek sa ogmantasyon ki pou donner i pou vin 7mil 641.25 Mr Speaker, kot sa osi i pou donn en – ou kapab dir pou kapab ed bann ki zot saler ti en pti pe pli ba osi.

Akoz mon dir sa Mr Speaker? Mon'n ganny sans pour mwan koz avek detrwa bann drayver. Mon'n swazir drayver espesyalman akoz zot, zot saler petet ti en pti pe pli ba kot zot travay. Mon'n ganny sans pou koz avek en drayver

ki anploye dan en Departman en Minister.

In fer mwan ganny en konpran pou dir li son saler li i apepre dan 6mil. E ler mon'n koz avek lot drayver ankor Mr Speaker, ki li i tonm dan en parastatal, li son saler i en pti pe pli o. Li i pe tous li apepre en 10mil. E en lot drayver ki li i dan en lakonpanyen prive, li i pe tous li 9mil. E ler i fer son *overtime* i tous li apepre R14mil Mr Speaker.

Be la en dimoun ki dan Gouvernman li menm li - en dimoun ki dan Gouvernman en drayver espesyalman, e i annan son *overtime allowance* ki i gannyen - son *commuted overtime allowance* ki zis R1000. Ek sa ogmantasyon saler ki i pou gannyen la, sa pour kapab ed li pour li kapab mont en nivo li osi Mr Speaker.

E mon osi parey tou bann larestan Manm, Mr Speaker ki'n koze avan - zot in koz en pti pe lo bann travayer prive, ki petet zot pe santi zot, zot konsernen aköz petet zot pan ganny touse espesyalman lo nivo saler.

Mr Speaker ordinerman ennler prive pa toultan ki prive zot saler i mars parey pour Gouvernman. I annan landrwa prive ki li son saler - petet son saler minimonm i en pti pe pli o ki pour Gouvernman.

Ler mon'n koz avek en zanmi ki annan en biznes

prive i ti fer mwan ganny en konpran pou dir li i ti pe zis esper Gouvernman anonse ki mannyer sa zafer saler pou marse. Pour li gete ki mannyer i kapab balanse. Aköz i annan nouvo travayer ki in fek anploye ki i pe ganny menm saler avek en dimoun ki'n la pour en bon pe letan, kot li i kapab revwar.

E mon'n demann li, mon'n dir ek li, mon dir "be dizon en konparezon Gouvernman ki'n vini ti'n dir sekter prive parey Gouvernman donn en ogmantasyon. I dir mwan anefe ki i ti pou bezwen fer, i ti pe kalkil lo la. Aköz i ti pou bezwen donn sa ogmantasyon, be selman an menm tan fer son prodwir ki i pe vann monte, kot la aprezan sa ti pou reflekte lo bann dimoun dan kominote.

E osi Mr Speaker sa ki'n fer mwan ganny en konpran se ki dan zot *package* ki zot, zot donn en zot bann *overtime* souvandfwa i pa mars parey Gouvernman. Gouvernman petet zot pou donn ou en *allowance overtime* ki *fixed*.

Be selman kot zot sa dimoun i kapab travay lo son - apre son *working hours* i kapab ganny li en *allowance* ki baze lo kote erdtan konbyen ki li i fer. E mwan mon dakor avek Minis se ki n ou bezwen nou - e mon demande ki *SBC*

osi tou i ede, pour nou kapab ankouraz bann prive.

Bann ki ti napa okenn plan petet pour donn en ogmantasyon. Get ki manner zot biznes pe fer. Parey Minis in dir pei in ouver lekonomi pe konmans refer e sa kot zot, zot kapab vwar pour zot kapab donn en ogmantasyon zot bann travayer. E parey Minis in dir se ki li i prepar bidze pour Gouvernman.

I pa kapab ale dir ek en biznes ki i pa konnen ki manner sa biznes pe performen. Ki zis donn en ogmantasyon. E nou, nou osi tou lo sa kote latab nou anvi ankouraz bann biznes zot osi, pour zot antre pou gete ki manner zot bann travayer pe fer, pour zot bann ki ti napa plan gete revwar. E bann ki ti'n deza pe fer li nou dir zot mersi, aköz zot pe get zot travayer.

Mr Speaker en lot pwen ankor ki mon le tous lo la i sa 13enm mwan saler, ki in annan en gran diskisyon dan Lasanble. Kot nou'n vwar pou dir se ki Gouvernman la in met en alokasyon 114.19milyon pour sa trez mwan saler pour la 2022.

E osi pour lannen 2023 ki pou ganny donner anefe an Zilyet 2023. E en lot sonm 143.4 milyon ki osi in ganny prozekte pour 2024 Mr

Speaker. E ler nou pe koz lo kote performans Mr Speaker, ou konnen tou dimoun ozordi ler i al dan en biro, ler i sorti dan sa biro i dir ou i fristre, aköz in pas dan en serten sityasyon.

E nou Gouvernman i en Gouvernman ki pran desizyon Mr Speaker. Gouvernman pe sey rod tou bann lezot alternativ pou sey ankouraz nou travayer pour zot donn maksimonm. Ki pou ede demen kot nou kapab demen ou leve bomaten ou konnen pou dir ou pou annan en *performance* la ki ou pa pou ganny 100poursan.

Aküz mwan mon'n travay dan Gouvernman mwan osi, mon konnen manner i marse, mon konnen manner i ete. E si mwan ozordi bomaten mon vini mon vin travay. Mon koleg ki li osi tou nou travay ansanm nou pe fer menm louvraz li i pa vini. Tanzantan ouswa i dan koze dokter. Swa tanzantan i annan bann leskiz, i pe trenn lipye Mr Speaker. Kot sa i ava ankouraze ki demen ler bann dimoun i al dan kek lofis, i ava kapab vwar pou dir i annan sa.

E sa dimoun ler i pou desann i konnen pou dir e mon konnen pou dir mon bezwen donner pour mwan kapab ganny sa lot 50poursan. Fodre nou koman

bann *Leader* nou edik nou pep pou fer zot travay.

Akoz tanzantan menm dan Lasanble ou tande, ouswa dan piblik ou tande kot dimoun pa pe ganny sa servis ki zot, zot oule. E Mr Speaker i annan bann landrwa prive ki mwan mon'n koz avek en *HR*, en madanm dan en landrwa prive, in dir mwan zot en bann letan zot pe fer sa zafer *performance*. Ki zot donn sa 50poursan.

E li in dir mwan souvan fwa i annan letan kot zot pa fer li lafen lannen. Zot fer li petet en kar lannen, kot la zot get performans zot travayer Mr Speaker. Pou gete ki mannyer sa i kapab ede.

I dir mwan ennler sa i mars lo tou lede kote. Akoz ennler petet en travayer i war li dan serten sirkonstans akoz- Be solman sa *performance* Mr Speaker, mwan osi tou mon pou donn mon sipor lo la. E akoz nou war pou dir se ki sa pou ed nou bann travayer pou *improve* lo kote servis ki zot donner.

E Mr Speaker ler nou pe koz lo kote depans li menm li, dan Bidze, mon vwar poudir i annan en 50 milyon ki Minis in dir sa i pou bann depans enprevi. Parey i annan polisyon kot *PUC* kot Baie Ste Anne Praslin. E osi i annan

bann dimoun ki'n ganny afekte dan leparse avek *fungus*.

Mr Speaker mwan dan mon distrik mon konn de zabitan ki zot osi zot in ganny afekte avek *fungus*. Ki pe espere pour bokou letan. Mr Speaker i annan madanm Charles Sinon. Li malgreman defen madanm Sinon i ti en dimoun ki ti travay *La Bastille* pour en bon pe letan. Li osi i ti ganny afekte Mr Speaker.

Kot mon'n ganny sans pour mwan koz ek son koleg, kot in eksplik mwan pou dir ler zot ti konmans ganny afekte avek *fungus* Mr Speaker, zot ti konmans santi zot grate. Zot ti al kot zot siperyer akoz zot ti dan en biro zot tousel. Zot ti al kot zot Siperyer pou fer konnen be selman sa letan zot pa ti pe pran li serye.

Be sa in afekte zot kot sa madanm i dir mwan i annan letan kot ler zot ganny grate zot pa gete kote zot ete zot bezwen tir zot lenz lo zot. Mr Speaker zis mazine en madanm i pe ganny grate devan bann msye pe tir son lenz Mr Speaker. E madanm Madelene in fer mwan ganny en konpran poudir i soulaze ler i tann sa lanons Mr Speaker. I soulaze akoz ler i vwar poudir i pou ganny sa konpansasyon pe vini Mr Speaker. (*Yes Onorab Rocky*.)

Aprè ou ava ganny ou sans ou pou koze aprè ou.)

E Mr Speaker i dir mwan i pou soulaze akòz in bezwen aret travay aprè ki in ganny afekte avèk *fungus*, Mr Speaker kot i war li pe fer bokou depans. Bokou depans Mr Speaker pou li kapab aste bann tretman, latizann. Swa bann lakrenm pour lapo Mr Speaker.

Mon'n al vizit sa madanm mon'n vwar li e souvandfwa ennler ler mon al kot li son msye pe ed li pour petet pou pas bann latizann lo li. Lo son latet partou, dan son seve. Kot sa pou kapab soulaz li pour li pa ganny grate.

E Minis sa anefè bann dimoun ki pe espere pour sitan bokou letan. Zot vreman zwaye akòz zot vwar pou dir *by* lannen prosen i pou annan en peyman ki pou kapab ganny fer.

E Mr Speaker lo kote Lasante;- Lasante parey Minis in dir e mon'n tann Onorab Vidot in koz en pti pe lo kote latizann ki manke boner. E la lo kote latizann nou war pou dir pou annan 70milyon.

E lo kote tretman dyaliz Mr Speaker pou annan 76milyon dan Bidze. Ki sa pou kontinyen avèk bann tretman e provizyon pour bann materyo medikal Mr Speaker. I pou annan 98.1milyon. E

tretman spesyalize 70milyon ankor.

E osi la ler nou pe get dan Bidze pour Lasante. Lotorite Lasante Piblik li i pou ganny li 10milyon ki sa pou ede pour li aste bann lekipman pour laboratwar, ki sa i ava ede pour *deal* avèk sa zafer *Covid* la Mr Speaker.

E osi Gouvernman Ope investir pour lenfrastruktir pour Minister Lasante. Nou vwar poudir i annan en Bidze 118.8milyon. E la osi Mr Speaker mon konnen avèk re devlopman nou klinik Corgate Estate anefè i pa deswit la dan plan pour refer li dan sa lokasyon ki ti'n ganny idantifye.

Be selman mon'n ganny sans ganny en koze avèk Minis Vidot, kot mon'n dir li i annan en pti pe konsern atraver bann zabitan ouswa nenport dimoun ki deservi klinik. Kot i annan sa *waiting area* la kot zot pou get en fason pou aste bann lekipman ki pou ede. Parey bann gro fan. Pou tir en pti pe lasaler ki bann dimoun pe konplent.

Mr Speaker dan Bidze osi tou nou war pou dir i annan en *Health Information System* ki pou kout 27.13milyon. E Lopital La Digue osi tou ki pou ganny 40milyon. Ki sa osi tou i avèk en don. E renovasyon diferan lenfrastruktir lasante 25.2milyon.

Mr Speaker ler mon pe get lo kote lasante li menm li i pou annan en larzan ki in ganny mete. 140.1milyon, sa i pour nou fasilite Lopital. Ki ladan pou annan bann – ki pou annan diferan servis.

Akoz pour bokou letan Mr Speaker nou'n tann koz lo nouvo Lopital. E la nou Gouvernman i en Gouvernman ki aktiv. Ki pran desizyon ki pa zis asiz dan en kwen koze fer bann promes. I pe mete la, aköz sa i pou tonm dan en *Mid-term Review* sa larzan. Pou gete pou kapab fer re aranz nou lopital ki bokou letan in ganny neglize.

Mon mazine tousala i pre kre sa fristrasyon dan bann travayer lasante. Aköz ler ou sorti kot ou, ou vin travay dan en landrwa ki ou a dir in tonn dan en fason - dan en depi li menm li. Ki ansyen Gouvernman ki ti la i pa'n donn sa latansyon. Ou marse dan lopital i annan landrwa kot *tiles* pe leve. I annan landrwa kot ou war pou dir i annan bann mwazi ki'n leve lo miray Mr Speaker, kot sa i a donn en lespwar ou kapab dir bann travayer lasante li menm li.

Lo kote ledikasyon Mr Speaker parey nou'n ganny dir lo komansman - e mon'n tann Onorab Vidot osi tou in tous en pti pe lo kote *Wifi* dan bann lekol. E nou war pou dir i

annan 6.8milyon dan Bidze pour 2023. Ki negosyasyon nou Gouvernman. En Gouvernman aktive, en Gouvernman ki rod solisyon Mr Speaker ki pran desizyon, in kapab ganny en negosyasyon avek bann sekter prive, ki byento nou bann etidyan i a kapab benefisyé.

E osi Mr Speaker, Minis in dir pou dir se ki gadyak dan bann lekol primer ek segonder pou kontinyen. Sa kot nou pou war pou dir se ki in annan en – Gouvernman in met 17.9 milyon ki sa i pour ki i pour sa trwazyenm term la pour 2022.

E osi i annan en lot ki zot in mete ki 20.1milyon Mr Speaker, pour nou kapab kontinyen - kontinyen donn nou bann zanfán. Get nou bann zanfán fer sir pou dir bann zanfán kot lekol zot kapab konsantre byen dan zot lekol Mr Speaker.

E lo kote bann zanfán, bann zenn ki anvi kontiny zot letid avanse, nou'n war pou dir Gouvernman in met 205.1milyon Mr Speaker. Ki sa i asire ki bann etidyan i kontinyen avek zot letid Mr Speaker.

E pa bliye nou bann lekol osi tou i annan ki nou bann lenfrastruktir i bezwen kontinyen avek renovasyon ouswa menm pou fer bann nouvo *block*. E nou lekol Mont Fleuri mon'n kapab ganny en



koze avek Mr Anerphy kot Minister Lasante.

Kot zot pou fer par faz sa *technical block* kot i annan bokou problem. E menm si mon pa tronpe Lotorite konsernen pou bezwen pran en desizyon, si sa lekol pou bezwen kontinyen servi sa blok akoz i pa *safe* – i pa *safe* pour bann zanfan oubyen pour bann *teacher* laba.

Mr Speaker mwan mon vreman ankouraze ler mon vwar poudir mon Gouvernman - mon Gouvernman i pe determinen pou bouz Sesel devan. E pour bouz tou nou zabitan ansanm. Zis parey nou war, taler nou pou tann Onorab Uranie pe koz bann sikse ki nou Gouvernman pe fer lo La Digue - konstriksyon nouvo lekol primer. Kot segonder avek primer Mr Speaker kot i annan 131.2milyon Mr Speaker. Zis La Digue sa. Pour batir 2 nouvo lekol ki bann zabitan laba.

E mon swete ki bann zabitan pe ekout nou vreman byen akoz nou Gouvernman pe travay pou lev zot pti zil pou fer sir pou dir zot osi zot pa ganny kit deryer.

Mr Speaker e mon Distrik. Mon konnen mon letan pe aprobe, mon al en pti pe vit - mon distrik osi tou pe ganny li apepre 16 *unit*. Sa i de *block flat* Corgate Estate. Ki i

tonm anba sa redevlopman ki pe kout Gouvernman 17.5milyon.

E sa pou ankouraz sa landrwa. Nou konnen pou dir ler nou nonm Corgate Estate dimoun i toultan mazin bann keksoz negativ. Mr Speaker Mont Fleuri i en distrik ki baliz avek lavil. Konmela tou dimoun i anvi vin reste Mont Fleuri. Lekol, lekol Mont Fleuri. Travay Mont Fleuri menm.

E avek sa re devlopman la i pou ede pou anmenn en nouvo souf dan sa pti sou-distrik la kot bann zabitan. E la mon anvi lans en lapel ek bann – nou konnen poudir i annan zot ki'n bouz Perseverance tanporerman, pou ede ki sa landrwa i kapab ganny re devlope.

Nou dir zot annan en pe pasyans akoz i annan en rezon akoz Gouvernman ti bouz zot Perseverance. Se ki pou kapab ed fasilite teren. E sa nou konnen pou dir i pou pran en pe letan, pour tou dimoun kapab tourn an menm tan.

Be selman nou dir zot tenir. Nou konnen poudir ek re devlopman Corgate Estate pou vin en zoli sou distrik. Kot bann larestan Distrik byento pou zalou zot. E nou Gouvernman ki la i en Gouvernman ki ou kapab dir i en Gouvernman ki fer aksyon Mr Speaker.

Lo kote *sport* Mr Speaker, Mont Fleuri parey ou konnen nou en lafors dan *sport*. Nou vwar pou dir se ki i pou annan en larzan. En larzan ki pou ganny mete pour lenfrastruktir 1.5milyon Mr Speaker.

Nou swete anba sa 1.5milyon kot nou laplenn foutbol, nou kort *basketball*, kort *volleyball* ki ganny deservi menm par bann dimoun ki pa reste Mont Fleuri. Ki sa osi tou i kapab ganny konsidere ladan. Ki sa i ava ede Mr Speaker pou donn plis lankourazman pou tir nou bann zenn dan bann move frekantasyon.

E osi nou war pou dir se ki ler mon ti pe koz avek Mr Kilindo kot *NSC*. In fer mwan ganny en konpran pou dir la zot preski pe ariv lo finisyon lo kote *Palais des Sports* kot ti pe kouver. Akoz pour sitan bokou letan Mr Speaker, sa bann lenfrastruktir *sport* in ganny abandonnen.

Kot menm ti annan serten landrwa lo stad kot ti pe ganny dir pa kapab servi, akoz i pa an sekirite. E la nou war avek nou Gouvernman, en Gouvernman determinen ki pran desizyon ki rod solisyon Mr Speaker, nou war poudir i annan en Bidze ki'n ganny mete. E byento nou a kapab desann al get nou *sport*. E menm si i annan bann lekip ki pou vin zwe avek nou tim isi

Sesel, nou ava kapab nou tou en pep desann al get nou bann tim mannyer pe deroule Mr Speaker.

Mr Speaker avan mon fini mon anvi tous en pti pe lo mon distrik Mont Fleuri. I annan bokou devlopman ki'n arive tou dernyerman kot bann proze;- bann proze pe ganny bouze Mr Speaker. Sirtou bann pti proze dan kominote, espesyalman lo kote semen. Nou pe rod tou fason *liaise* ek bann zabitan - bann dimoun ki annan bann propriyete pou sey gete ki mannyer nou kapab fer bann semen transpor ariv kot bann lakour Mr Speaker.

E la nou vwar poudir se ki menm malgre ki souvan fwa, nou pe ganny en pti pe problenm akoz *wayleave*. E ler nou zwenn ek bann dimoun dan kominote, bokou i apresye ki bann devlopman pe al vitman.

E nou pou war la i annan semen Oreddy ki desann kot Tracy Moustache ki pou al lo son 2zyenm faz. Semen Dan Gale ki deza kot *Planning* la, ki bann zabitan in espere pour bokou letan. I annan menm ki'n dir mwan ki ansyen *MNA* Mr Gopal ti fer en komitman, en promes ek zot ki nou aprezan nou'n vini pou pe al konmans sa proze Mr Speaker.

E osi Mr Speaker nou pe revwar en pri pou bann peron ki la pour bokou letan. Pour nou kapab fasilite nou bann zabitan pou gete ki mannyer nou kapab ed zot pou fer zot lavi vin en pti pe pli meyer.

Mr Speaker mwan mon pou donn mon sipor sa Bidze. Pour mwan fini mon anvì dir Minis avek ou lekip mersi. Nou konnen poudir zot pe travay dir. E nou konnen poudir zot pe met Sesel avan tou. E nou konnen poudir se ki ou annan en lekip solid.

Nou dir mersi nou prezidan ki i annan sa *spirit* pour li gid sa pei Mr Speaker. Ki Bondye osi i kontinyen gid zot. Bann dimoun kot distrik. *DA* ek son lekip osi tou mon le dir zot mersi. Bann travayer dan diferan Minister ki tanzantan ler nou vin tap zot laport zot pare pou fer bann keksoz bouze. Nou konnen pou dir pa tou keksoz ki bouz parey nou, nou anvì.

Mon ti annan bokou pwen ankor pour mwan touse. Me selman malgre mon letan pe arive Mr Speaker mon bezwen termin la. E mon anvì dir mersi zot tou, pour sa sipor ki zot pe donn nou distrik. E Minis kot lo nou pour nou kapab donn ou sa sipor. Mersi.

### **MR SPEAKER**

Mersi Onorab. Laparol prezan pour Onorab Andy Labonte.

### **HON ANDY LABONTE**

Mersi Mr Speaker. Mr Speaker, Minis, tou Manm koleg Onorab, zabitan La Rivière Anglaise e pep Seselwa, bonn apre midi.

Mr Speaker permet mwan pour avan tou remerisi Bondye Papa kreater lesyel ek later, liniver vizib e envizib pour donn gidans, lasazes ek lentelizans sa lekip Minis Finans, anba direksyon Minis Naadir Hassan, pour ki zot in kapab prezant Lepep Seselwa avek en Bidze lespwar pour en meyer demen.

Bidze 2023 i enn ki byen striktire baze lo travay dir, rezilyans e enn ki anmenn lapartaz ekitab dan en fason disiplinèn. Kot i pe osi responsabiliz pep Seselwa dan sa transformasyon apre ki pei in fer fas avek en peryod pli difisil ki in deza konnen.

Mr Speaker en Gouvernman ki responsab, set en Gouvernman ki ekout son pep, pran bann desizyon brav, fer lenvestisman e distribye larises ki dan lentere son pep. E se sa lafason ki kominote enternasyonal parey *IMF* e reprezantan Labank Devlopman. Kot Komers *TBD* pe dekrir lekonomi e performans Gouvernman Sesel konmela.

E parey Minis in fer resorti sa konfyans ki

Kominote Enternasyonal i annan dan lekonomi Sesel, in osi demontre par revu *Fitch* ki'n konplete ver lafen Oktob 2022. Sa revu i amelyor ran Sesel pour ariv *BB minus* sorti *B plus* avek en previzyon ki stab.

Sa ladres Bidze 2023 pe vremen anmenn bann solisyon detaye pour sityasyon ekonomi nou pei. Fer lenvestisman dan nou bann zenn e bann lenfrastruktir esansyel, tel ki ;- fasilite sportif, lasante e lekol kot pour plizyer lannen in ganny neglize anba Gouvernman presedan.

Parey Minis ti dir dan son lentroduksyon Bidze 2023, i fer 3em Bidze ki i prezant ek Lasanble Nasyonal. E sa Bidze 2023 i reprezant en kontinyasyon sa 2 Bidze presedan.

Mr Speaker dan son ladres Minis in rekonnet sakrifis ek pasyans pep Seselwa. E osi remersye zot ki an atandan ki nou'n konsantre lo stabilizasyon e relans nou lekonomi pandan sa 2an. Ki ozordi nou'n kapab sirmont pli gro kriz ekonomik ki sa pei in deza fer fas avek dan son listwar.

Mon pou osi zwenn avek Minis e ansanm dir en gran mersi mazorite pep Seselwa, pour sa konfyans ki'n met dan Prezidan Ramkalawan ek nou

Gouvernman *LDS*, pou diriz nou pei dan sa moman difisil. E pour sa rezon mon pou dir byen for, nou annan tou rezon pour selebre aköz Sesel i pour tou son zanfän.

Mr Speaker bann lobzektif prensipal Bidze 2023, se pour distribye en pye rezilta sa travay dir e sa latitud disiplin ki Seselwa e Gouvernman in obzerve pour sa 2 dernyen lannen. Envestir plis dan lenfrastruktir. E finalman pour nou osi akonplir en siplis Bidzeter an mwayen term. E sa ed nou pour asire ki det Gouvernman i reste soutenab.

Minis in osi asir pep Seselwa ki sa konsolidasyon fiskal tre anbisye ki Gouvernman ti'n konmanse depi 2021, i lo bon semen. E sa in kontribye ki pour det Gouvernman in sorti 92.2poursan prodwir domestik brit ver lafen 2020. E prozekte pou ariv 64.6poursan ver lafen 2023.

Mr Speaker Gouvernman pou kontinyen son travay pour enplimant devlopman stratezi nasyonal, pou kouver 6 sektor priyoter konmsi swivan ;

Premyerman en servis piblik pli modern e efikas. En azanda transformasyon dan 5 pilye enportan pour nou lekonomi. Sa i enkli ;

*Tourism*, Lagrikiltir, Lapes ek Lekonomi Ble,

Lekonomi Nimerik e Sekter Finansyel;

Modernizasyon e efikasite dan sistenm lasante;

Promouvwar lord e lape;

En sistenm ledikasyon pli modern ki anliny avek bezwen pei pour lavenir. E soutenabilite nou lanvironnman e plis rezilyans kot sanzman klima. Sa bann sekter priyorite i lakle pou anmenn sa sinerzi avek Bidze mwayen term. E bann stratezi dan bann *portfolio* administrasyon.

Minis in osi dir ki plis ki sa 6 sekter priyoriter, Gouvernman pou kontinyen envestir dan bann program sosyal avek bi donn sipor tou san cours popilasyon.

Mr Speaker Minis in dir labaz depans Gouvernman an 2023 i reste enn ki responsab, pridan e disiplin. Lanfaz safwasi pe met lo depans dan bann nouvo lenfrastruktir oubyen bann ki'n ganny neglize pandan plizyer lannen. E lezot in avarye e osi ogmant sa saler dan servis piblik.

Pli gro sonm dan Bidze 2023 i pour en total 3.62bilyon, ki pe ganny prozekte anba byen e servis. Sa i reprezant 11.8poursan prodwir domestik brit konpare avek 12poursan prodwir domestik brit an 2022.

Sa prozeksyon i osi en ogmantasyon 293milyon

konpare avek Bidze revi an 2022 ki pou en sonm 3.33 bilyon. Par kont pli gran ogmantasyon i pou en total Bidze 1.4bilyon ki ganny prozekte pour lannen 2023 dan program lenvestisman kapital, ki reprezant 4.6poursan prodwir domestik brit.

Sa i reprezant en ogmantasyon 608.9milyon ouswa 76poursan letan ou konpar avek Bidze revi an 2022. Sa i reflekte priyorite Gouvernman, pou met an plas nouvo lenfrastruktir pou ede agrandir nou lekonomi e byennet nou pei.

I annan osi annan en sonm signifikan pou repar bokou lenfrastruktir ki pan ganny mentenir pandan plizyer lannen parey in ganny dir. La mon mazin parey *Palais des Sports* ki pou kout 3.3milyon ler reparasyon i konplete. Stad Linite 6.9milyon. Renovasyon lo bann diferan sant lasante atraver pei a en sonm total 25.2milyon. Enkli 6milyon ki pou al anver *Health Centre La Rivière Anglaise* ki zabitan La Rivière Anglaise lontan pe demande.

Premyerman lenfrastruktir pour kiltir ek leritaz nasyonal. Lenvestisman dan kiltir ek leritaz nasyonal i reste enportan pour nou pei. An

2022 Gouvernman in konmans travay renovasyon lo sant kiltirel nasyonal. E parey Minis in dir sa proze i eksepte konplete ver milye 2023.

Enn fwa konplete i ava ganny servi non selman konman en sant aprantisaz pour nou popilasyon, me osi annan lofis pour lenstiti kiltir ki ozordi pe depans omwen 15milyon dan kou lwe lofis.

An 2023 en sonm inisyale 5 milyon pou konmans preparasyon pou batiman larsiv nasyonal in ganny Bidzete. Akoz ozordi nou napa en Larsiv Nasyonal ki gardyen nou bann dokiman istorik e enportan.

2023 pou isi annan travay renovasyon lo lezot batiman pour kiltir. Parey Teat de Palm pour en sonm 3 milyon. Batiman Karnegi pour en sonm 4.1milyon. Lofis Ladministrasyon pour Lenstiti Kiltir a en sonm 6.4milyon.

Mr Speaker dezyenman les mon elabor lo Sekter Ledikasyon. Minis in dekrir ledikasyon konman en sekter kle dan sa transformasyon ekonomik e sosyal ki nou pe rode. Permet mwan sit enn de sif. Avek en ogmantasyon R218.5 milyon ki reprezant transfer fon letid sorti kot ansyen Lazans Devlopman Resours Imen (ANHRD) en sonm R6.8milyon ki pou ofer

servis *Wifi* dan lekol parey Minis in anonse dan son Bidze 2022. E onor son promes atraver Bidze 2023, me pa parey Gouvernman avan ki ti promete pou donn *data* dan *TATA* me pan zanmen materyalize.

En lot sonm R17.9milyon ki pou al anver provizyon goute. E 20.1milyon pour dezennen tou etidyan dan lekol Leta, depi primer ziskan segonder.

Letid avanse ;- R205.1milyon enkli ogmantasyon 10poursan dan *stipend* pour tou etidyan ki pe etidye dan 17 pei aletranze. Enkli sa ki pe etidye kot Liniversite Sesel. A en valer R2.5milyon pour sa ogmantasyon.

E pour la premye fwa dan listwar Sesel en Gouvernman *LDS* ki annan lentere lazenes aker, pou pli byen ankadre letid avanse anver nou popilasyon. Gouvernman *LDS* in finaliz diskisyon avek Labank Komersyal lo en lankadremman pour en *Scheme Loan* edikasyonnel. E ankor enn fwa parey Minis in dir sa *scheme* pou en lot opsyon pour bann endividi ki anvi devlop en lot *skill* baze lo demann pei. E avek bann paramet swivan ;

Sa *loan maximum* pou R800mil. Gouvernman pou donn en sibvansyon 4poursan lo sa bann *loan*. Term

repeyman pour en *maximum* 10an. Gouvernman pou donn en garanti lo sa bann *loan*. Pou napa kontribisyon personnel lo sa bann *loan*.

En moratwar pandan letan ki sa etidyan pe etidye pour peyman kapital. Me Gouvernman pou re pey sibvansyon lentere. E bout lentere ki sa i bezwen re peye pou ganny *capitalised* e anvii ki Gouvernman pe donn en term repeyman 10an, sa i ava donn letan pou bann etidyan fini pey zot *loan* e apre sa zot kapab dan en pozisyon pou zot pran en *loan* pou batir zot lakaz.

Mr Speaker en tel desizyon pou asire ki pei pe depans larzan dan en fason pi efikas e osi vize ver en stratezi a en long term. Sa i montre vizyon e komitman Gouvernman *LDS* pou lavenir e fitir nou bann etidyan.

Lo kote bann proze dan Sekter Ledikasyon, en sonm R89.8 milyon pe ganny bidzete an 2023 anba Bidze, Minister Ledikasyon. Ki pou osi enkli finansman pou serten proze dan Sekter Ledikasyon ki'n ganny bokou retar pou enplimante, menm si bann proze ki ti dan Bidze pandan sa bann dernyen lannen.

Gouvernman *US* pa'n zanmen annan sa volonte pou enplimante. Se sa ki nou apel "gran prometer me pti

donner." Bann proze pou sa lannen i konm swivan;- Lekol La Rosière Primer ki pou plizyer lannen ti'n ganny promete par Gouvernman presedan me zanmen delivre. Akoz? Mal planifikasyon e plan lekol ti pli gro ki teren. Me finalman Gouvernman *LDS* in kapab met en sonm R19.3milyon pou konstriksyon en nouvo blok laklas e osi renovasyon lo en blok laklas ki deza annegzistans. Byento nou bann pti trezor dan rezyon santral ava kapab retourn kot zot lekol.

R31.2 milyon konstriksyon nouvo Lekol La Digue Primer e Segonder. Digwa, Digwaz ganny sa byen kler, se Prezidan Ramkalawan ki konsernen avek zot letid. Zot *MNA* i enterese zis avek petisyon pou met retar devlopman lo La Digue.

**(APPLAUSE)**

### **HON ANDY LABONTE**

R8.3milyon renovasyon lenfrastruktir pou Lekol Ortikiltir ek Lagrikiltir. Ankor i montre ki mannyer *US* pa anvii investir dan sa bann sekter sitan enportan.

R4milyon konstriksyon sant *day care* Les Mamelles ki lontan son *MNA* pe demande me finalman in ganny mete.

R5milyon pou *Laptop Scheme*. R27.6milyon pou *Day Care Scheme*. R1.6milyon dan *CCE Trust Fund* pou bann *Day Care* ek *Childminder* ganny asiste atraver laplikasyon pou lekipman. Ki a met zot lo standar ki Lenstiti Devlopman Pti Anfans (*IECD*) in etabli.

Zis regarde konbyen Gouvernman *LDS* pe investiran plis dan ou ledikasyon pou ou dan lekòl Leta, konman en lazènes ek bann lenstitisyon pos-segònder i konm swivan. Pou ou sa etidyan ki dan lekòl primer e bann lekòl formel an 2022 pe kout 42mil 242.71sou par etidyan par lannen.

An 2023 sa sif pou monte pou ariv 42mil 914.08sou par etidyan par lannen. Pou ou sa etidyan segònder an 2022 pe ekout Gouvernman 57mil 290.16 sou par an par etidyan.

An 2023 sa sif pou monte pou ariv 61mil 264.91sou par an par etidyan. Pou ou sa etidyan ki dan lenstitisyon pos-segònder pe kout Gouvernman 57mil 240.387sou par an par etidyan an 2022.

An 2023 pou kout Gouvernman 57mil 878.44 par etidyan par an par lannen.

Mr Speaker wi sa i se larzan *tax payers* e i bann sif ki vreman signifikan parey Minis in dir. Alors se pou sa rezon ki i ekstrememan enportan pou tou etidyan pran

zot letid o serye pou en lavenir briyan pe nenport ki sekter ou swazir.

Mr Speaker mon zis anvi dir lazènes Seselwa pou pa les de ros katar met ou dan sa laferm kabri, ki Gouvernman *US* pa'n zanmen kapab delivre avek fermye pandan 43an. E le zot anvi vwar li ganny materyalize dan 2an.

Menm Prezidan son parti ti bezwen get dan sa gro binok pou war larealite ler delo lapli ti'n ranpli son tren e war ki napa siporter. I kriy, "Mon manman!"

*(laughter)*

### **HON ANDY LABONTE**

E lakoral Parti *A New US* i reponn "Pa kapab gete!" Akoz? Ti annan plis delo ki dimoun ki ti dan sa tren.

*laughter)*

### **HON ANDY LABONTE**

E sa lapli ti pe lav disan bann Seselwa inosan ki Parti *SPUP*, *SPPF*, *US*, la prezan *ANUS* ti fer zour Koudeta an 1977.

Eski en benediksyon sa oubyen en malediksyon? Mon poz sa la. Me Lepep Seselwa pe dir avek Minis Hassan Bidze 2023 tou byen! Pli bon ki sa i ava gate!



**(APPLAUSE)**

**HON ANDY LABONTE**

Ler *Leader* Lopozişyon ki pa'n zanmen partisip dan okenn eleksyon i deklare ki se li ki siny Pillay e dir avek Prezidan ki personn pa pou pil lo li. Wi son sinyatir i Pillay, me zabitan Glacis i dir li met en kou son kandidatir e zot ava pil lo dan bwat vote!

**(APPLAUSE)**

**MR SPEAKER**

Arete!

**HON ANDY LABONTE**

Akoz malgre ki loto ki *Chairman FPAC* in lir odit e i dir ki i ti satisfè la i dir ki *staff* medikal pa satisfè. Be Mr Speaker atraver ou lekel ki konfize se li konman en 'loto' avek en move *alignment* ki pe rate, e pa pe ariv ver son destinasyon an 2025? I osi en enportan pou *remind* Lopozişyon, ki an Oktob 2020 *LDS* ti prezan pep Seselwa avek en Manifesto, e se sa ki pe osi gid nou travay konman en Gouvernman ki gard son promes.

Alors parey Prezidan Parti *US* in deza dir pa zanmen *undermine* Polisi en Gouvernman. E la mon anvî dir *US* ki Gouvernman *LDS* i en Gouvernman ki rod

solisyon ler zot lo kote *US* zot zis konplent, konplent e konplent!

Mon dezyenm pwen se 13enm mwan e ogmantasyon saler. Gouvernman avan an 2019 zis avan zot ti perdi eleksyon 2020, ti ofer en provizyon pou enplimant en logmantasyon 5poursan lo zis saler debaz, san pran kont bann diferan *allowance* ki ti pou osi pran lefe apartir Avril 2019.

E la ler nou dir pou pran lefe an Avril zot annan en problem. Me Minis Hassan apre ki in konsolid tou *allowance* ansanm in propoz en logmantasyon dan saler servis piblik. E sa i enkonparab avek sa ki Gouvernman *US* ti propoze sa letan.

Akoz logmantasyon saler apre ki tou *allowance* in ganny konsolide i pou pli fasil ki sa travayer i kalifye ek en *loan* pli releve. Ansyen Minis Finans Mr Loustau-Lalanne ki ti dan Gouvernman *US* sa letan ti osi dir ki byento son Gouvernman pou revwar e re-etidye sa 13enm mwan saler lo en baz performans. E lo rannman ki en anploye i gannyen avek son travayer aköz i pa merit otomatik.

Me ozordi *US* i vin dir nou tou lekotrèr. Mr Danny Faure ki li osi ti form parti Gouvernman *US* sa lepok ti dir

dan enn son bann *speech*, ki dezormen pou rezon soutenabilite laz Pansyon pou bezwen ganny revize sorti 63an pou vin 65an.

La ozordi nou tann Prezidan Parti *US* i dir tou lekotrè e zot menm anvi fer lamars le 26 Novanm pou proteste. Dokter, Dokter me kote ou'n al mal?

*laughter*)

### **HON ANDY LABONTE**

Mr Speaker pep Seselwa pe demande be lekel ki napa ni en devan e ni en deryer, *LDS* oubyen *US*? ki pe fann rankin e laenn dan sa pei. Apre zot oule fer Seselwa krwar ki soley i tap dan milye lannwit e lalin i kler pandan lazournen.

Me nou konman en Gouvernman responsab ki koz laverite, pran bann desizyon fran, onnet e dan lentere lepep, avek lespri amelyor servis piblik, transform servis piblik e fer li vin pli efektiv, pli efikas e motiv travayer pou reganny zot dinyite e re-donn travayer servis piblik zot vre valer. Pou ki zot delivre en servis a en nivo lekspektasyon pep Seselwa, i enportan ki i annan en sistenm evalyasyon konpreansiv, rezonnab e realis parey enplimantasyon *RBM* ki baze lo performans sak endividi.

Mr Speaker atraver ou les mwan rapel Lopozisyon ki se zot ki pa ti vote pou fer sir ki pep Seselwa i ganny 13enm mwan saler. Me nou lo sa kote latab nou'n touzour siport travayer Seselwa e nou pou touzour kontinyen. Minis in dir ki anvi sa bon performans ekonomik ki pei pe eksperyanse Gouvernman in fer provizyon 114.19milyon pou peyman en 13enm mwan baze byensir lo performans sak travayer.

E peyman pou ganny fer milye Zanvye 2023 avek en lot sonm 143.4milyon ki'n ganny prozekte pou 2024, pou peyman 13enm mwan anvi lenpak ogmantasyon saler an 2023.

Mr Speaker i enportan ki pep Seselwa i realiz en keksoz enportan e met sa byen antet. Akoz ler *Covid* ti'n tap nou, e lekonomi ti lo son zenou, avyon pa ti pe anvole, touris pa ti pe antre Sesel, se Prezidan Ramkalawan ki ti pran sa bann desizyon brav, riske me byen kalkile.

Se Prezidan Ramkalawan ki ti al rod vaksen pou nou pep, menm ki sa 3 mousketer ki pe *boycott* e dekouraz pep Seselwa pou pa pran vaksen. Ler nou *Airport* ti'n fermen, Prezidan Ramkalawan ti decide re-ouver nou lafrontyer, lekip Prezidan ti al negosye en det pou nou laliny

*Air Seychelles*, pou sov nou laliny *Air Seychelles*. Pandan ki sa bann letan serten ti pe priy lisifer pou *Air Seychelles* fermen e aret anvole.

Gouvernman *LDS* ti erit en kof avek zis 14.9milyon e saler pou travayer servis piblik ti an kestyon. Ler *US* ti pe dir aret tou proze kapital pou Prezidan, nou Prezidan ti dir non. Fodre nou kontinyen avek bann proze, me dan en fason byen kalkile. Prezan zot dir nou pa koup riban.

Be Mr Speaker be atraver ou mon bezwen dir Onorab Vidot, me se Gouvernman *LDS* ki ti pran son responsabilite e al rod finansman, pou termin sa bann proze e demar sa bann nouvo proze. Nou annan tou drwa pou nou koup riban e nou pou kontinyen, akoz nou en Gouvernman ki responsab determinen, e la pou rod solisyon pou problem sa pei.

Speaker avan mon terminen mon anvi reasir Minis Finans ek Gouvernman Sesel ki mon pou siport sa Bidze a en valer 10bilyon 495milyon 149mil 665 ki'n ganny prozekte pou lannen 2023. Akoz tou zabitan La Rivière Anglaise e pep Seselwa pou benefisye ladan.

E pou terminen mon pou premyerman remerisi Bondye Papa pou mon lasante, benediksyon e gidans dan mon lavi, pou mwan kapab

kontinyen desarz sa responsabilite e mon rol koman en Manm Elekte pou Distrik La Rivière Anglaise.

Mersi Prezidan Ramkalawan avek ou Kabinet Minis enkli Minis Finans. Mersi ou menm Mr Speaker, Depite Speaker ki pa prezan ozordi, *Staff* Sekretarya, tou Manm koleg Onorab e tou travayer Lasanble Nasyonal.

Mersi sa lekip solid kot Ladministrasyon Distrik La Rivière Anglaise sa i en enkli mon *clerk* Ms Florry Rosette e mon *DA* Ms Jency Volcere, Ms Mary Morel, Ms Anette, Ms Kathleen, Ms Ethel, Ms Stephie, Mr Georgina, Mr Michael, Mr Lavigne, Mr Roddy, Mr Charles e Mr Dalton.

Bravo sa lekip dinamik, determinen ki pe fer sa travay remarkab e formidab anver sa transformen dan nou distrik e pei an zeneral. Me en pli gro mersi i al pou tou zabitan La Rivière Anglaise ki touzour pozitiv, rezilyan. E la pou siport nou pandan sa 2 dernyen lannen difisil anver sa transformasyon. Ki benediksyon divin Bondye Papa Tou Pwisan i kontinyen renny lo nou tou. Mersi Mr Speaker.

### **MR SPEAKER**

Mersi Onorab, mon pas laparol Onorab Rocky Uranie.

**HON ROCKY URANIE**

Mersi Mr Speaker. Minis, Koleg Onorab, zabitan Zil Pros, tou Seselwa ki lekout en bonn apre midi pou zot tou. Mr Speaker permet mwan atraver ou pou pas en pti lenformasyon avek Onorab Doyace Porice.

Lopital La Digue *GICC* ki pe fer larzan finanse par *tax payers money* e dapre Minis en bout finanse par don. Laba zot annan zot *Project Manager*, zot *Liaison Officer* ki fer zot travay pa Loncy Micoock.

*(laughter)*

**HON ROCKY URANIE**

Proze *Sewage* pe fer par lakonpanyen *Earth Development* dan kote nor e *Ascent Project* dan kote sid. *Tax payers money* ki pe peye pou sa. Zot *Liaison Officer* i Ms Jeva Pool pa Loncy Micoock.

***(APPLAUSE)***

**HON ROCKY URANIE**

Proze *UCPS* ki pe fer lasose e sa zot annan zot *Liaison Officer* e zot annan zot konsiltan ki donn bann rapor *weekly* e *monthly* pa Loncy Micoock. Byento Lekol La Digue pou osi ganny fer, i pou annan son *Project Officer* ki pa pou Loncy Micoock e sa pou ganny

fer par *tax payers money*. Ki Mr Loncy Micoock i fer?

Annefe Digwa i konplent i dir ki i four son nennen dan tou keksoz, e menm bann dimoun kot proze zot konplent li akoz i enterfer dan tou keksoz. E mwan monn dir ek Digwa, mon pou kontinyen met presyon lo Mr Loncy Micoock ek son Gouvernman.

**MR SPEAKER**

Onorab-Onorab, eskiz mwan mon pa krwar i prop ou target en zofisye.

**HON SEBASTIEN PILLAY**

*(Off-Mic)*

**MR SPEAKER**

Onorab Pillay ou ava reste trankil silvouple e permet mwan koze. *Ok*, ou'n fer komanter lo sa ki Onorab Porice in dir i byen. Me selman ou kapab arete prezan avek en zofisye Gouvernman ki pa dan Lasanble e i pa konsernen avek Bidze. Mersi Onorab ou a kontinyen.

**HON ROCKY URANIE**

Mersi Mr Speaker e mwan mon la pou kontinyen met presyon lo zot tou pou zot kapab donn La Digue sa ki apel pou La Digue.

***(APPLAUSE)***

**HON ROCKY URANIE**

Mon'n deza dir zot pa'n vin vakans isi zot e mon pou repete. Mr Speaker la mon oule profit lokasyon pou remersye tou bann siporter *United Seychelles* ki'n tenir for. E menm bann ki'n retournen pou ranpli sa tren Anse Boileau!

**(APPLAUSE)**

**HON ROCKY URANIE**

E byento nou pou ranpli La Digue! La Digue Desanm vey pou nou, nou pou ranpli!

**(APPLAUSE)**

**HON ROCKY URANIE**

Nou pa pou bezwen pran en *Cat Cocos* pou rod dimoun dan 3 distrik *still Cat Cocos* pa plen menm pou al Mahe. Mr Speaker, Minis li menm in sanble pa tro sir e konfize ler i ti pronons son lekor lo sa Bidze. I ti demontre mank konfidans e konfyans dan sa ki li menm i ti pe dir.

Mr Speaker, Minis in dir ki nou'n reisi sirmont pli gro kriz ekonomik ki nou pei in deza fer fas avek dan son listwar. Sa kriz byensir pa ti ariv zis Sesel e sa nou tou nou konnen. Si Minis in kapab dir ki in stabiliz e relans nou ekonomi parey in dir nou, mon pou dir li en keksoz;

Set akoz nou Gouvernman in kree e met an plas plizyer bon sistenm parey bann sistenm sosyal, en bon baz ekonomik for. Zot in kapab zwenn la pou kapab servi pou zot kapab mont lo la. Mr Speaker, Minis i devret dir nou Gouvernman mersi.

Mr Speaker alors sa i en rezon prensipal, akoz ki mon krwar Nouvo *United Seychelles* i reste sa parti politik meyer e pli for dan Sesel, e Dimans Anse Boileau nou ti prouv sa.

Minis ti dir ki sa Bidze i en kontinyasyon sa bann avan kot i ti koz bokou. E nonm plizyer proze ki ti pou ganny fer finanse par *Grant* e mazorite pa'n ganny materyalize.

Plizyer sa bann proze ti pou ganny fer sa lannen an 2022, me pa'n vin en realite. Mr Speaker i annan plizyer pti proze distrik ki nou dimoun i bezwen dan zot lavi toulezour, pou amelyor zot sityasyon lavi kotidyen, ki apenn si zot in ganny fer oubyen konmanse. Ki mwan ler mon gete tou le lannen *DA*, *MNA* i ganny demande pou asize e fer lalis sa bann pti proze, ki'n akimile me finalman nou vwar ki preski nanryen pa'n ganny konplete.

E rezon ki zot donn nou se toultan ki kontrakter pe *bid* tre o. Tro o e mwan mon ti a kontan konnen eski zot

vreman get rezon pou sa bann sityasyon e kwa ki pe fer sa bann kontrakter *bid* o dapre zot? E kwa ki zot pe anmennen pou soulaz sa bann kontrakter? Eski vreman zot pe pran kou materyo konstriksiyon lo La Digue?

Mr Speaker larzan i ganny vote isi anndan pou fer sa bann proze, me ki nou vwar tou larzan i retournen proze pa ganny fer pou benefis lepep. Me par kont Mr Speaker mon vwar bokou lanfaz pe ganny mete lo proze kapital lo La Digue plis ki tou distrik dan Sesel. Ennler mon ti oule krwar sa Bidze ti'n fer prezizeman pou La Digue e bliy tou lezot distrik.

Menm si nou bezwen sa bann proze, i annan dimoun ki santi serten keksoz e zot in demann mwan si sa pa en manev politik ki ganny fer pou destabiliz nou bastyon? Mwan konman en *MNA* mon dir zot ki tou keksoz i posibil. Me pa bliye Zil Pros ti elekte mwan pou reprezant zot, koz pou zot e met presyon lo Gouvernman pou delivre lo tou promes. E dir ek tou bann proze. E sa ki mon'n fer e sa ki mon pou kontinyen fer.

**(APPLAUSE)**

### **HON ROCKY URANIE**

E la letan monn nonm sa mo promes e proze kapital Mr

Speaker, i annan zofisye Lapolis e *SFSRA* ki'n fer resorti avek mwan ki annan Kordgard e fasilite landrwa pou reste, pou zot zofisye Lapolis zot menm e *Firemen*, ki letan vizit ti ganny fer tar an 2020, zot ti ganny promet ki sa bann keksoz pou ganny fer.

E la ziske la zot pa'n tann nanryen dan Bidze e zot vwar zot pe travay en kantite sirtou avek sa kantite *rescue* ki zot bezwen fer avek bann kliyan ki perdi.

Mr Speaker ti deza annan en plan vitman ki zot ti fer pou en nouvo Kordgard La Digue, ki'n pas anba, anba finalman personn pa konnen ki'n arive avek. Ziska le zot pa ankor vin kler avek Digwa, Lepep Seselwa kote ki Kordgard La Digue pou ganny fer.

En zour zot dir enn en lot zour zot dir en lot. Sa bann desizyon ozordi pou demen i montre klerman mank konpetans e desizyon par brav. Mon'n deza dir e mon pou repete ankor, tou sa ki zot pe fer pou La Digue zot bezwen fer pou La Digue, aköz zot pa'n vin vakans! Vin kler avek sa pep. Me tou fason Digwa i war lwen, Digwa i war zot e Digwa pa tann zot. Digwa in dir 2025 *United Seychelles* i zot sel opsyon!

Mr Speaker pou 2an nou lo sa kote latab nou'n kriye,

nou'n sipliye pou sa Gouvernman get nou dimoun. Ed nou dimoun ki pe soufer la deor, sirtou lo Zil Pros me ki zot in fer laba lot kote latab? Ti annan ti riye, gognarde lo soufrans sa pep.

Mr Speaker lapovrete in ogmante. Zot in sey kasyet li anba latab finalman ler zot in vwar ki zafer pa bon, zot baz politik dimoun pe konmans kile zot in dezapwente. Alors zot pe sey taye pou aranz keksoz.

Mr Speaker, dimoun in dezapwente avek zot. Avan nou ti lager pou donn tou zanfan en goute, ler nou ti war poudir keksoz pa ti byen. Oparavan bann paran ki manner nou Gouvernman ti fer, mazorite ti kapab *afford* donn zot zanfan en goute. Zot ti fyer. Zis en pti group, Mr Speaker ki ti ganny ede avek *Dedicated Fund* ki la pou le moman - la pou le moman nou vwar ki *LDS* pe donn tou zanfan en keksoz. Ki ler nou ti pe esey fer pou en pti group, zot ti trouve ki nou pe gat *tax payers money*.

Me la ozordi zot pe donn *across the board* menm bann ki kapab *afford* pe *still* gannyen. Ankor en desizyon ki ozordi zot dir enn demen zot dir e fer en lot.

Mr Speaker *Youth Hostel* isi lo Mahe i landrwa kot etidyan la Digue e Praslin i

reste pou zot kontiny zot letid pos- segonder. Vizit, rapor ek bann rekomandasyon in ganny fer pou amelyor e donn pli bon kondisyon bann etidyan pou zot devlope, e aprann byen dan karyer ki zot in swazir. Me eski sa bann rekomandasyon in ganny pran? Akoz Minis pa'n pronons son lekor lo nanryen kot i konsern *Youth Hostel*.

Paran Digwa i depans bokou. Paran etidyan pos-segonder ti espekte en logmantasyon dan zot *allowance* akoz fasilite *printing* e lezot depans sa *allowance* in fini fay. La ozordi mon profite lans lapel avek serten konplent ki mon'n gannyen sorti kot bann paran e bann etidyan ki pe reste *Youth Hostel*. Mwan mon demann zot pou viv byen antre zot e siport kanmarad. Pa perdi zot bann bon valer Digwaz e Pralinwaz ki zot paran, ansenyan e kominote in montre zot.

Mr Speaker provizyon in ganny fer pou donn konpansasyon relye avek *fungus* pou Minister Lasante ek Ledikasyon. Me kot Kiltir dimoun dan mon distrik pe demann mwan oli zot konpansasyon. Kantmenm en pti keksoz tou le lannen ti ava soulaz zot. Me zot pa vwar nanryen dan sa Bidze.

Mr Speaker nou'n ganny fer kler anba sa revi saler ki

premyerman zot in konsolid bann *allowance* dan sa saler debaz, e dir ki sa travayer laba deor ti deza pe anmenn kot li depi avan son saler ek son *allowance*. La zot in met ansanm, savedir ou pa ankor donn li plis larzan.

Prezan dezyenmman la ki ou'n kalkil sa 10poursan pou ou donn li en pti logmantasyon. Ler ou gete si sa logmantasyon i tonm par anba R1000 ou'n deside fer li vin R1000. Me Mr Speaker ler ou gete pansyon pou monte pou vin pran son 5poursan.

E bann ki pou tonm dan kad kot ou bezwen pey pansyon e osi zot *income tax*, ler zot ou'n pey tousala ek sityasyon pri lavi, ki mannyer pe monte, zot vwar ki sa logmantasyon in ganny donnen zis ek labous, oubyen in ganny donnen ek lanmen drwat e pe ganny pran avek lanmen gos.

Mr Speaker nou bann *home carer* ki rente pou pran swen ek nou bann dimoun aze ki bezwen sipor. Nou vye manman, nou vye papa, nou tantin, Madanm Ernesta, Madanm Fanchette La Digue. I annan *carer* ki pa ni menm kapab pran zot konze anyel, akoz zot pa ganny ranplasan. E zot perdi zot konze, zot pa ni ganny peye kantmenm zot plennyen personn pa tann zot sor. Mon pa pe envante Mr

Speaker sa zot ti fer resorti pandan vizit avek *First Lady* lo La Digue.

Mr Speaker zot in ganny dir bann *Carer* ki zot pou ganny zot sa R500 ki zot pou kapab met ansanm ek zot saler, ki sa i ava ed zot ganny en *loan* labank. Mr Speaker ler ou get sa pti saler ki sa bann *Carer* pe gannyen ek sa R500 lo la, zot pa pou kapab fer en gran keksoz avek. Ki kantite *loan* labank pou kapab donn zot Mr Speaker?

Mr Speaker ler nou get nou bann pansyoner. Mr Speaker ler nou get nou bann dimoun envalidite, dezabilite kwa ki vremen zot pe gannyen an plis dan sa Bidze? Akoz zot osi zot pe al laboutik parey nou, zot pe rod komisyon parey nou.

Sa logmantasyon i vize ver travayer dan servis piblik. Me mon pa vwar kote sa lot pli gran group travayer ki Sekter Prive i santi li byen garanti en logmantasyon dan sa Bidze akoz napa lobligasyon lo okenn sekter prive pou donn sa logmantasyon saler. Mon rapel Mr Speaker nou Gouvernman ti oule donn logmantasyon an servan poursantaz *across the board* baze lo saler. Zot ti dir nou donn tou dimoun parey e la zot vin avek menm keksoz.

Sa letan zot ti anvi zis met retar dan saler serten



group dimoun e kre konfizyon. Sa i klerman montre zot prensip pa for, ozordi zot dir enn demen menm zafer zot dir e fer en lot. Zot napa en plan e zot bann desizyon pa brav, i montre ki zot pe zwe avek Seselwa.

Kliyan pe deza dir ki Sesel i ser toudmenm zot sakrifye bokou pou zot vin dan nou zoli pti pei. Mon zil plis ki 90poursan dimoun i travay dan sa domenn. La zot pe demann touris pou pey ankor en lot larzan pou sak nwit, pou sak lasanm, ki pou fer zot sit destinasyon vin pli ser ankor.

Pli ou sarz zot pli zot vin pli egzizan pou met presyon lo nou bann travayer dan sa lendistri. Ki pa ankor asire si zot pou ganny en logmantasyon vi ki zot dan sekter prive.

Pou en pe letan la Mr Speaker nou bann tim futbol pe bezwen zwe tou zot *game* Praslin. E Digwa pa pe vremen ganny sans war zot tim. Bann paran pa pe ganny sans vwar zot zanfand zwe. I annan en larzan ki'n ganny mete dan Bidze pou renovasyon *Sport Complex*.

E mwan mon pe demande si sa larzan i pou ase pou osi mentenans laplenn e *track* atletik, oubyen zis pou striktir. Plis larzan ti devret pe ganny mete pou *Sport Complex*, La Digue pou ki nou

bann *game* i kapab ganny zwe lo nou zil. Nou annan atlet ki tre performan dan foutbol e osi atletik.

Nou ti fer tre byen dan Sanpyonna Atletik bann lekol me selman nou bann atlet in ganny kit ater, sirtou Tifano ki'n defet tou sa bann atlet dan son kategori, me pa'n ganny swazir pou al fer Konpetisyon *CJSOI Weekend* ki'n pase in vin *compete* e in prouv son lekor ankor. Kot in defet tou sa bann atlet ki pe ale, par gran zistans me pou nou zis en fiy La Digue ki'n ganny swazir.

Federasyon fodre get nou plis. Fodre ed nou bann tim e ed nou bann atlet. Nou depans bokou avek pasaz transportasyon avek bann lezot nesese ki nou bann zwer e atlet i bezwen.

Mr Speaker i annan en zimlaz ki nou'n sinyen avek Lavil Petit Co an Frans e sa bann dimoun in vin La Digue zot in byen kontan lakey ki nou'n donn zot. E alors pou sa mon remersye Komite ki'n fer sir ki sa aktivite i vin en sikse. E zot in dir mwan demann Gouvernman pou donn zot plis sipor finansyel. Pou ki nou kapab soutenir sa aktivite, e fer sir ki i marse.

Alor mon enplor Gouvernman pou met larzan pou ede ki sa lesanz kiltirel sportif e edikasyonnel, e lezot

domenn i vin en sikse vremen, ki nou a rekolte sa fri pou nou zil La Digue.

Mr Speaker konstriksyon Lopital La Digue ki mon troun ankor lo la in konmanse e byensir i bezwen fini. Digwa pa les Onorab Labonte atraver zot Mr Speaker anbet zot avek sa zafer petisyon. Zot konn tre byen zot menm pou ki rezon zot ti fer petisyon. Pa aköz zot pa oule lopital me ti rezon lokasyon. Alors pa les person vin anbet nou eksepte les Onorab anbet son lekor.

Mr Speaker mon swete ki ler sa lopital i vin operasyonnel, i annan ase *manpower*. E sirtou latizann e ki mon'n ganny bokou konplent avek Seselwa ki sistenm lasante pe deteryore e plizyer mankman, sirtou latizann pe annan.

E mon vwar dan Bidze Mr Speaker i annan en 70milyon pou latizann. Eski sa i vremen ase pou fer sir ki napa mankman latizann dan pei? 70milyon mon fer en pti kalkil nou annan apepre 100mil zabitan ler ou divize par lannen par *tête d'habitant* i R700 par *tête d'habitant*. Me si ou pe diviz li par mwan pou en dimoun i tonm R58 pou en dimoun pou en mwan.

Alors zis fer sa kalkil gete si i vremen ase ki nou pa ganny mankman latizann.

Mon dir sa aköz La Digue pou depan lo santral pou li ganny latizann. E alors vi ki nou lwen avek dokter prive e nou annan zis en *pharmacy* alor nou ti a kontan ki zot sey fer sir ki nou pa ganny sa mankman.

Avan terminen Mr Speaker mon bezwen tous ankor pri komodite ki nou La Digue i bokou pli ser ki Mahe. Zot ti piblikman frem STC La Digue e Praslin, e apre ti trankilman reouver sa enn lo Praslin.

Me nou zot in ferm pou nou net e apre anba, anba donn privez serten zot siporter. STC nou bezwen lo La Digue, e aköz sa se nou Gouvernman ki ti kree pou ed nou ganny komodite a en pri pli meyer marse.

La dan *pipeline* mon tande zot pe pas par laport deryer pou fer STC antre dan laboutik L'Union Estate. Vin fran reouver STC byen piblikman parey zot ti ferm li. En Gouvernman ki desizyon e fizyon pa kler kot ozordi i dir enn, e demen i dir en lot. Zot pa responsab e klerman zot bann desizyon pa brav.

Finalman silvouple Mr Speaker donn Seselwa sa bon *deal* parey ki zot in ganny promet. Mersi Mr Speaker.

**MR SPEAKER**

Mersi Onorab. Nou a ekout prezan Onorab Sathya Naidu.

### **HON SATHYA NAIDU**

Mersi. Mr Speaker, Minis Hassan tou Manm Onorab enkli *Staff* Lasanble Nasyonal bonn apre midi. E byensir en bonn apre midi spesyal pou zabitan St Louis. En group zabitan ki toultan rezilyan e ki pa'n zanmen les tonbe in fidel ver nou parti atraver tou bann formasyon ki'n pas ladan.

Ozordi zour vin *LDS*, sa parti o pouwar, sa parti avek sa manda pou delivre en Sesel ki pli meyer pou tou nou zanfan. Set en loner en privez pou mwan prezant mon trwazyenm repons lo Bidze nasyonal. Vandredi pase ler Minis Hassan ti'n delivre son diskour. Mon ti'n perdi kont lo la kantite fwa mon ti'n aplodi. Sak fwa en mezir ti pe ganny anonse e pou pran lefe.

Mon'n perdi kont senpleman akoz in en Bidze ki'n vreman pozitiv Mr Speaker. Apre 2an nou pep in ganny sa lespwar e sa lankourazman ki zot ti vreman bezwen. Si Minis Hassan ti dan en pozisyon ou prezant en Bidze ki ti sitan pozitiv, nou bezwen realize sa in posib gras a en Gouvernman ki'n annan kouraz pou pran desizyon.

Desizyon ki par fwa pa'n fasil, ki pa'n popiler me selman bann desizyon ki'n

bezwen ganny pran dan lentere nasyonal. Andotmo nou annan en Gouvernman ki responsab. En Gouvernman ki responsab ki premye fwa dan nou listwar apre 43an ler sa sanzman in arive byensir, zot in bezwen asize analize regarde kwa ki nou'n erite.

E nou'n bezwen koup nou latwal dapre nou mwayen nou bezwen. E nou'n bezwen fer sakrifis. Non selman lo kote Gouvernman, nou osi demann pep Seselwa pou fer sa sakrifis pou asire ki nou pei i reste a flot. E i pa koule.

Annefe Mr Speaker ler Minis ti'n prezan son premye diskour e i ti'n dir sityasyon parey ti ete, sityasyon ekonomik pa ti vreman bon. Ti dan rouz. Me selman i ti'n etabli en *roadmap* pou dir ki direksyon nou pou kapab ale.

E si mon pou fran e onnet ler mon ti pe reflexir dan en konversasyon avek Bondye mon ti'n demann li en kestyon. Mon'n dir apre 43an finalman ler nou'n fini fer sa sanzman get sa sityasyon ki nou ladan. Nou'n erit en kales kase. E enn bann sityasyon ekonomik pli pir ki pei ti pe fer fas avek listwar nou pei.

E repons ki Bondye ti'n don mwan se," tou keksoz i ariv pou en rezon mon piti. " Mon'n anvoy zanfan Bondye *State House* pou diriz Sesel. E

atraver en Minis Finans ki konnen ki savedir responsab, bann desizyon responsab e ki pridan. Si nou ti napa *leadership* dan sa pei ki ti responsab, mon krwar pa ki nou ti pou dan sa sityasyon ki nou ladan ozordi.

Tou bann sif relye avek lafason ki nou lekonomi pe performen pe ganny rekonnet par nou bann *stake holders* enternasyonal tel ki *IMF* avek *AfDB*. Kot menm enn son reprezantan dan nouvel 8 er ti'n fer resorti ki Sesel non selman pe fer byen i pe menm sirpas bann target.

Malgre lager Ikrenn avek Larisi ki'n kree en lensertitid lo kote lekonomi global, Sesel pe fer byen Mr Speaker. Si nou pe fer byen se gras a en desizyon ki nou ti bezwen pran le 25 Mars 2021, pou ouver nou frontyer. Ansanm avek en kanpanny vaksinasyon ki'n ase agresiv ki'n permet nou *jump start* nou Sekter Tourizm ki pilye nou lekonomi.

Sesel ti pe ganny vann konman en *destinasyon which is safe and the highest in terms of people* ki'n ganny vaksen. Sa in ede pou nou kapab kree bann *corridors* - kot bann touris ti'n kapab vin ver Sesel. Dimoun a sa letan ki a ti dan lanplwa ti pe ganny rekrite dan bann letablisman touristik. E sa sekter ti pe

ganny son lavi. E sa in ed nou dan en fason ki vreman imans.

E pou sa mon le remersye tou bann *stakeholders*. Swa lo kote Gouvernman depi Minis Radegonde ek tou son bann teknisyen. E sekter prive vizavi tou bann endividi ki involve dan sa sekter ki'n fer zot bout kolektivman pou nou anmenn nou sekter tourizm kot i ete.

E mon pa pou kapab bliy bann travayer lasante ki'n dedye en kantite letan. Kot zot in donn tou zot lenerzi pou nou kapab konbat kont viris 2019. E mon swe se ki nou pa devret pe servi lanmor inosan konman en pwen politik. Ler nou pe regard tou sa milyon dimoun ki'n mor atraver lemonn, atraver *Covid*. Sesel osi in arive. I pa en leksepsyon. Tou pei kot in annan *Covid there has been a loss of life*.

Alors annou rekonnet zefor ki nou bann travayer lasante in mete pou nou kapab sorti dan sa staz. E ler nou pe regard bann sif vizavi tourizm ki pe ganny prozekte pou lannen 2023. Nou pe dir nou pou retourn dan *2019 levels*. Sa en keksoz ki vreman ankourazan. E i anmenn en sourir lo mon figir.

E mon konnen pou Seselwa ki pe travay dan sa sekter, zot osi zot konnen

manner sityasyon 2019. E si dan 2an nou pou kapab anmenn nou pei - redres nou pei avek tou sa bann move desizyon dan lepase ki zot in pran nou bezwen korize pou nou kapab dres nou pei, eski sa i pa en keksoz ki pozitiv?

Mr Speaker ler nou pe regard bann mezir fiskal lo kote koleksyon taks, 2poursan lo reveni pou mwayen e bann gran lotel, se en bon desizyon. Ankor en fwa pei ki pou benefisye si nou pe ganny 18milyon ki pe al ganny kolekte sa *environmental levy*. 162milyon. Eski nou pa pou kapab servi sa 280milyon pou depans ver bann proze? Pa neserman faver politik.

Ler nou pe koz 280milyon mon pe mazin en proze parey en proze semen Belonie ki pou enpakte lavi pros 300 dimoun. Be ler sa proze pou demare dizon atraver sa koleksyon, ou krwar zabitan St Louis pou dir sa i en faver politik? Non. I pa en faver politik. Se larzan ki pou ganny met akote pou nou lavans bann proze. Ki zot gouvènmàn dan lepase in *fail* pou fer okenn keksoz ver ladan!

Ler nou pe regard Sekter Tourizm nou bezwen rekonnet ki marse global i vreman konpetitiv *and we need to have an edge*. Valer azoute I pou vin en konponan kle ler nou le

ki touris I depans zot larzan ler zot pe pas zot vakans.

Enn bann legzanp k mon ti'n servi dan mon dezyenm diskour dan Bidze se dimyel par egzanp. Mon ti'n fer referans ki nou dimyel, kalite dimyel ki nou annan dan Sesel i pli bon kalite o monn. E mon ti'n dir nou ti kapab servi sa konman en *selling point*, pou bann investiser vin pli inovativ. Vin en pe brav. Vin devan avek bann nide.

Lalis i long lo lafason ki nou kapab apard byensir vann Sesel pou sa zoli lans, kato nwanr, koko de mer, i pou bezwen annan bann lezot eleman kot nou pou bezwen antre ladan pou nou vann Sesel konman en prodwi.

Dapre tradisyon Bidze ler pe ganny prezante pou Ledikasyon 1.34bilyon i anler. *It is amongst the top*. E i kler ki nou Gouvènmàn i pran lentere nou bann zanfan a ker. Pou asire ki nou annan en fitir ki prometan.

Bann nouvo eleman tel ki breakfast avek dezennen nou tou nou konn lenportans. E pa zis sa, i pou tir en fardo lo bann paran ki trouv li difisil. Lot kote latab zot koz lo pri lavi, selman ler nou pran bann mezir zot pa pare pou rekonnet. E avan ou ti bezwen pas atraver *Dedicated Fund*. Fer en laplikasyon atraver *Welfare*. Ti annan tro bokou

demokrasi. Set fwasi lekol pou annan en rol pli prominan vizavi sa provizyon.

Pri lavi I en problem global. I pa zis Sesel kot nou annan en sityasyon vizavi pri lavi. E Minis Finans in rekonnèt sa kot i pou annan en logmantasyon 10poursan pou *stipend* dan 17 pei enkli Sesel. Eski sa i pa en bon desizyon?

*Loan* ledikasyon pou bann zelev ki pa'n kalifye atraver sistenm pwen i donn zot en sans pou zot pa perdi lespwar. Pou zot swiv sa rev ki zot annan. E baze lo mekanizm ki an plas i pa pou vin en fardo ankor en fwa lo en paran. Akoz *NHRD* zot ti annan *part finance*. E *part finance* 50poursan wi Gouvernman ti kouven. Lot 50 sa paran ki bezwen vini.

E si sa paran napa le mwayen sa zanfan son laplikasyon i ganny zete. E parfwa dan lepase ti ganny zete baze lo politik. Dan Sesel ozordi kot nou'n arive tou son zanfan i kapab vin devan. Otan ki ou travay dir ou pou ganny ou sans. E bann kondisyon ki vin avek i ekstrememan favorab. Ou pou peye apre ki ou'n fini ou kour.

E i enportan pou bann zelev fer refleksyon. Ou pa pou kapab vin en pilot. Mon krwar nou annan ase pilot dan

pei. Ou pa pou kapab kontinyelman swiv *Bachelors in Business Administration*. Mon krwar se la kot *manpower resource planning* ler nou pe koz lo sa size, nou pou kapab donn en lendikasyon byen kler. Ki direksyon nou bann zelev i kapab ale pou asire ki ler zot retournen zot pou vin dan lanplwa.

Akoz enn bann keksoz ki nou'n rekonnèt dan Staz Komite Bidze ki nou vwar? Toultan i annan en mankman travayer. Be zanmen dan lepase in annan en linisyativ ki'n pridan pou nou kapab adres sa. So ler mon'n tann Minis dir ki pli tar zot pou vin devan avek sa plan, i kler ki nou annan en Gouvernman ki responsab.

E sa retonbe ki pozitiv nou pou vwar li a long term. Nou pa pou vwar li demen me selman nou pou vwar li a long term. E *Wifi* ankor en bon desizyon. Nou tou nou konnen ozordi zour kot pei lafason ki i pe evolye internet in vin en keksoz ki ekstrememan esansyel. E pou bann ansennyan mon krwar i pou ankouraz zot vizavi preparasyon zot bann materyo. Osi edik nou bann manmay dan lekol.

E ler nou pe fer referans avek sa i en keksoz pou le fitir ki nou kapab mazin en kekfw pa neserman la konmela.

*Maybe in 2026 perhaps if not later, tou bann zanfan i annan en tablet zot konekte avek learning management system. Rezon mon pe fer referans avek sa se Covid in montre nou ki e-learning is the way to go. So Wifi i en konmansman e nou kapab bouz de lavan.*

Ler Minis ti'n fer resorti bann sif relye avek la kantite larzan ki nou depanse lo sak etidyan, i enportan ki nou edik nou bann zelev, swa lo nivo primer, menm segonder pou dir konbyen eski nou pe investir. E kwa ki nou ekspekte an retour. Nou ekspekte ki ou pran ou letid o serye.

E pou ou sa paran fodre ki ou swiv sa ki ou zanfan pe fer dan lekòl. Menm si ou pa konpran sa size montre lenter. Fer sir ki ou asiste bann *Parents/Teachers meeting*. Se la kot i annan responsabilite non selman lo kote sa zelev me osi paran.

Me, mon oule osi rekonnèt ki i enportan ki bann zelev i konpran ki *knowledge is power. Without knowledge you are powerless!* Pou bann ansennyan mon salye zot pou tou sa bann linisyativ ki zot pe fer, kot parfwa zot al par lao sa ki Departman Ledikasyon i demande.

I kler ki sa i dan zot sa. Baze lo natir zot vokasyon zot vin en dezyenm paran. E

parfwa inevitableman zot vin bann *social workers*. Malerezman sa se larealite ki nou pe viv ladan.

E ler nou pe koz 9milyon the *Youth Hope Residential Centre* ki pou adres bann problem delenkan ki bann zanfan i annan. Sa i en pa de lavan. Ler nou pe koz plis kapital ki pou ganny enzekte lo kote *recruitment* pou bann travayer dan Departman Sosyal, sa i en par de lavan. Ozordi nou annan en Gouvernman ki pe sey fer son mye pou reponn a bezwen nou pep Mr Speaker.

Ler mon pe fer referans avek bezwen, mon rapel en sityasyon La Rosière. 2014 *Kuwait* ti annan en fon ki ti'n ganny *assign* pou sa proze, pa'n vremen demare, pa'n vremen fer zot bout ki zot ti'n devret fer. Finalman ou a krwar sa fon ti en fon ki ti envizib.

Aprè tou sa lannen ler Minis ti'n fer sa lanons pou dir pou annan 19.3milyon ki ti pe ganny bidzete pou konmans sa proze, mon garanti ki non selman Onorab Henrie ki a plizyer repriz in fer tande son lavwa lo non lekòl La Rosière, mon konnen ki menm *Management Lekol* ki pe *deal* avek 1034 zelev a diferan lokasyon - zot deplase partou kote zot in fer en travay

merveye. E zot pou bezwen kontinyen fer.

Me selman sa nouvel i en bon keksoz. I en keksoz ki pozitiv Mr Speaker. E setfwasi mon swete ki – mon krwar pa anba nou Gouvernman nou pou tann sa bann zafer plan i pli gran ki later. Non!

E toulezour ler mon dray an montan Royale Street mon vwar en zoli batiman. Belonie Segonder. E 2023 zot pe al bouze. Eski sa i pa bon nouvel Mr Speaker? Ler nou pe fer referans avek *curriculum review*, mon konnen i form parti reform dan ledikasyon. E *it is not something* ki pou ariv dan en lespas 24 erdtan. Me selman mon swe se ki Minis Ledikasyon I pran sa size *PSCE* konman en size ki enportan. Konman en size ki lakle.

Se atraver sa size ki ou kapab enstil bann valer moral dan nou bann zanfan. Fer nou bann zanfan vin bann sitwayen responsab. Planifye nou fanmir. E wi planifye nou fanmir. Dan lekol ou bezwen mazin ledikasyon, be osi ou bezwen mazin bann keksoz ki vin apre lekol dan sa lemonn ki nou pe viv ladan.

Fodre zot konpran tou bann vis ki egziste dan sa lemonn pou pa tonm dan sa bann latrap. Tel ki adiksyon lalkol ek drog Mr Speaker. Nou bezwen osi menm kapab

donn zot ledikasyon nesese lo ki mannyer sistenm *housing* i marse. Pou zot kapab fer en kontribisyon nesese a en tre zenn-az. Moman ki zot ganny 18an zot bezwen pe kapab antre dan sistenm.

E an relasyon avek *housing*, malgre lakaz, malgre ki Gouvernman in trouv li dan en sityasyon ki pa'n neserman favorab, zot in konstri 82 *unit*. E in enpakte lavi 400 endividi. Eski sa i pa en keksoz ki pozitiv Mr Speaker? Nou annan 127 *unit* ki anba konstriksyon. St Louis pe resevwar 6.

Zis vizavi lekol Belonie segonder e nou ekspekte ki travay pou konplet dan mwan Zen. E pou le moman Lotorite Distrik nou pe fer en *assessment* kot nou pe pous ka bann endividi devan avek Minister Later ek Lakaz., pou fer sir ki ler i konsern alokasyon proses i byen defini.

La kantite aplikan ki nou annan dan *HSS*, kan eski zot in konmans kontribye? Konbyen eski zot in kontribye? Eski zot in konsistan? Apre nou regard lo kote sistenm pwen e sityasyon sosyal. Akoz mwan mon fermeman krwar ki nou bezwen fer konnen kote eski en dimoun i debout lo lalis.

Lontan lenformasyon pa ti ganny partaze pou dir kot



zot debout. E mwan mon fermeman krwar ki dan en tel prozesis, i bezwen annan latransparans Mr Speaker. Mon'n osi note dan *budget breakdown* pou Departman *Housing*, i annan en alokasyon apepre R18milyon pou 16 *unit Waterloo*. Sa i vin konman en sours lankourazman pou mwan mon *clerk* ek mon *DA*.

Vi ki nou'n travay ekstrememan dir. Pou fer sir ki non selman nou kapab ganny korperasyon bann rezidan ki pe reste kot sa proze pou kapab demare, me nou'n osi fer tou sa ki nou kapab malgre ki St Louis i ganny dekrir konman en landrwa kot i annan mankman later. I annan.

E nou'n osi dekouver bann lezot sit, kot nou pou kapab fer bann devlopman otan ki nou kapab annan finansman osi a la porte, pou kapab promouvwar sa bann devlopman.

Ler nou pe koz lo *mid-range* condo ti en nouvo prodwi ki ti'n ganny lanse dan letan Semenn Labita. E i tonm anba kad *self-financing*. Parey son non i sizere se sa endividi ki finanse. E Gouvernman i konstrir e zot ganny zot lakaz. E lafason ki i ete nou pe fer nou pep vin pli endepandan.

Nou pe tir fardo lo Gouvernman dan en sans finansyel. E zot pou kapab

servi sa larzan ki la pou lezot proze, pou lavans bann diferan prodwi ki konsern *housing*. E relasyon avek *loan HFC* I byen ki bann term ek bann kondisyon pe ganny revize. Pou asire ki zot pou kapab adres sa eleman kou konstriksiyon. E bann dimoun zot kapab konstrir dapre ki pe ganny *allocate*.

Me selman baze lo mon leksperyans personnel, sa ki mon'n rankontre se I annan pa mal dimoun ki rankontre difikilte ler i konsern akse avek sa fasilite. Alors mon santi i annan lespas pou nou amelyore. E mon oule eksprim mon gratitud ver korperasyon ki mon'n gannyen, atraver bann zofisye relevan, pou adres konsern mon bann zabitan.

E ler mon pe fer referans avek bann zofisye i fer mwan rapel nou *civil service*. Nou *civil service* i en sours fristrasyon pou en bon pe nou bann dimoun. Dimoun i oule ki nou *civil service* i delivre en servis ki efektiv e efikas. E konman en reprezantan pou zabitan St Louis lo mon kote Gouvernman, mon pe fer mon mye pou kolabore avek diferan gouvènmantal, pou nou kapab rezourd problem en dimoun.

E i annan zour keksoz i al byen. *Everything flows*, me selman i annan zour kot mwan

personnelman mon vremen fristre. E i annan bann moman kot en dimoun i vin kot ou, zot dir “madanm entel, msye entel”, me zot pa pe kapab met en non avek sa dimoun. Mwan mon krwar lo kote *civil service* kot nou’n arive, *everyone should have a name tag and the designation*.

Sa i pou fer li pli fasil pou nou kapab idantifye sa dimoun. Sey angaz avek sa dimoun direktman dan plas i annan serten lenstans kot nou bezwen *micro manage*. E problemn osi ki nou annan avek *civil servant* se pa tou ki pare pou pran responsabilite. Zot say responsabilite. Zot anvoy lo en lot endividi oubyen en lot Departman. Malgre ki zot annan memwar enstitisyonnal kot zot pou kapab komunik ek sa Departman.

Mon krwar in plis ki ler pou nou aret travay dan *silos*. E parfwa en sityasyon i kapab aparet enposib. *And the easy way out to say* i pa pou marse. Me selman zot bezwen realize dan ‘enposib’ i annan sa mo ki apel ‘posib’. *You have to be solution oriented. You have to think outside the box and you have to act like leaders*.

E mon swe se ki sa program *RBM* ki dan son staz lanfans. Ki pe ganny enplimante i vin enn ki efikas. E mon’n vwar ki i annan

9.2milyon pou en sistenm *human resource* pou kapab asire ki nou *Human Resource Department* dan tou bann *MDAs* i kapab fer en analiz kler lo kote *result-based management*.

E pou en *civil servant* ganny son larzan i bezwen fer sir ki in travay pou sa larzan. 2.5milyon lo en *training* kot Guy Morel. E en bon korperasyon ki annan avek Gouvernman *UAE* pou partaz lekspertiz, se bann desizyon dan en bon direksyon.

E mon konnen ki bann travayer dan Gouvernman ler zot in tann sa nouvel, kot saler pe met ansanm, sa i permet zot ganny akse avek en *loan*. Ouswa sa 10poursan logmantasyon i devret kapab ankouraz zot pou fer pli byen. Akoz ozordi nou annan en Gouvernman ki pe rekonnet zot zefor e pe rekonpans zot.

E largiman ki pe ganny avanse lo kote sekter prive. Si nou pou ensiste ki sekter prive i donn en logmantasyon sa i pou annan en *ripple effect*. Enflasyon pou mont par lao. E ki zot pou vin dir? Pri lavi i ankor en problemn. Parfwa nou bezwen reflexir avan nou parle osi.

Ou konnen e sa bann largiman ki pe ganny avanse lo sekter prive se bann largiman ki zis popilis Mr Speaker. Dan en konteks ekonomik i pa fer

sans pou enpoz parey Lopozisyon pe sizere. E sa filozofi 13enm mwan baze lo performans ansyen Minis Finans parey in ganny dir, nou bezwen *remind* zot.

Minis Loustau-Lalanne ki ti dir ki krwar ki *it has to be performance based*. E ozordi zour ler Gouvernman pe bouz sa de lavan, mazine pli boner Onorab Pillay ti dir nou zot pe servi nou Polisi. Be si nou pe servi ou Polisi ozordi, nou pe met li an plas, be *come on!* Ar? So pa zis sa, 65an annou *remind* nou lekor kwa ki Prezidan Danny Faure ti'n dir. Selman le 26 zot le al fer en lamars. Aret fer bann keksoz ki vreman popilis silvouple.

Alors mon en pe konfize kote *US* i ete ozordi. Ou konnen baze lo bann sakrifis ki Gouvernman ansanm avek pep Seselwa in kapab fer, se sa ki pe permet nou donn en 13enm mwan sa lannen e lannen prosenn. Sa lannen 50poursan garanti. Sa lot 50 fodre ki ou travay. Alors oli problenm? Zot pa le en *civil service* ki pe performen? Zot pa le en sekter prive ki pe performen? Zot pa le ki i annan progre dan nou pei?

Wi mon'n fer en pe kritik lo nou *civil service*. Me mon osi rekonnet poudir ki i annan *civil servant* ki donn 110poursan dan zot louvraz. Ki kit zot lofis tar. Ki menm

pran sa travay kot lofis al kot lakaz. Fer bann sakrifis ki parfwa pa tou dimoun ki rekonnet. Me mwan mon rekonnet ou e mon dir mersi. Ou pe travay pou nou pei!

E wi bann dimoun aze osi zot in travay pou nou pei Mr Speaker. Gouvernman i le pran swen avek nou bann dimoun aze. E wi in annan kritik pou dir ki zot devret ganny en logmantasyon. E mon serten poudir ki Gouvernman pou regarde ki mannyer eski nou pou kapab adres sa bezwen a en moman apropiye.

Antretan bann *carers* ki annan manda pou pran swen avek nou bann dimoun aze, zot pe al ganny plase dan en *framework* ki soutenab e apropiye. Kot zot pou resevwar en saler e menm en 13enm mwan. E dan sa saler ki zot pe resevwar zot pe ganny R500 an plis. I touzour keksoz Mr Speaker.

E atraver sa *Bill* ki pou vin devan sa Lasanble pei pou annan en limaz pli kler. Pou dir ki mannyer eski sa Lazans pou fonksyonnen. E mon swe se ki nou pou kapab regard plis kot *the more care you are giving* - aköz *care* i annan diferan kategori. Si i pli entans ou bezwen kapab ganny en rannman ki en pe plis.

Me selman sa i en keksoz ki nou bezwen regard an long

term Mr Speaker. Me selman i kler ki nou annan en Gouvernman ki rekonnèt defi ki i annan. E nou pe montre nou lanvi pou adres sa bann problem. E nou pe pran swen avèk nou bann dimoun aze. I annan en bon pe dan sa 16675 ki'n benefisye on *temporary salary support* ki'n vin permanan, ki senpleman resevwar sekirite sosyal.

Zot pa resevwar pansyon avèk sekirite sosyal. Zis sekirite sosyal. Alor sa 500 i touzour en keksoz Mr Speaker. Pa tro bokou letan pase mon ti'n tann en dimoun aze e i fatig mwan. Kot i ti'n dir mon viv an izolasyon. Ouswa nou bann dimoun aze i ganny neglizè. Be atraver bann *Elderly Home* ozordi kot zot pe zis senpleman fer R1000mil kontribisyon. An konparezon avèk *rent* normalman i R12mil ozordi pou sa kalite fasilite ki zot pe resevwar. Eski sa i pa en keksoz ki pozitif?

Mon pa vwar en dimoun aze dan tou bann *Elderly Home* Sesel a sa moman aktyel pe fer en *riot* pou dir zot kont sa desizyon. Non. In annan konsiltasyon. In annan en desizyon ki nou bezwen pran. Nou bezwen fer si ki keksoz i soutenab. Annou aret zis mazin dan en konteks ki popilis Mr Speaker.

Ler nou pe koz byennet nou bann dimoun aze mon poz en kestyon, oli zot zanfan? Zanfan kwa ki zot pe fer anver zot paran? Se sa paran, sa dimoun aze ki'n anmenn nou dan lavi kot nou'n arive ozordi. E ou pa pe pran sa responsabilite?

Me selman i annan serten zot ler zot paran in mor la ki pou annan lager ki pou ganny deklare Ankour pou demande lekel ki pou ganny par! I pa akseptab! I kler ki dan en serten sans i annan en kous nou popilasyon kot zot in perdi zot konpa moral. *The moral compass*.

E ou konnen ki mannyer eski nou kapab *reverse* sa *trend*? PSCE Mr Speaker. An relasyon avèk nou bann zanfan ek nou bann zenn. Spor. Spor i en eleman vremen enportan dan zot devlopman. Spor i montre ou en kantite keksoz. E i kler lo kote lenfrastruktir - pa zis lenfrastruktir lo kote sportif *across the board* zot in *fail*.

E ler ou regard nou bann lenfrastruktir sportif lo en nivo nasyonal, i drol Onorab Vidot pa'n mansyonnan nanryen lo sa size, kot son distrik pe ganny plizyer benefis. Selman in pas trwa minit pou koz lo '*mwan*' dan en diskour 18 minit. Seryezman?

Mr Speaker i kler ki nou bann *venue* sportif i bezwen lo

en bon standar. Mon swe se ki sanpyonna atletik pou bann lekòl ki pou ganny fer lannen prosenn i pou kapab bann fer dan en stad linite. Kot sa *track* i annord. Sa *AstroTurf* zot pe al re aranz li pou apepre lavalè 6.9milyon. Bann ekip foutbol ki pe itiliz li. Sa i devret vin konman en lankourazman pou zot.

E an plis ki sa lo kote apart lenfrastruktir, nou pe osi envestir 15milyon dan *professional development*. Eski sa i pa en keksoz pou montre ki nou pe pran bann *high level athletes* seryezman? 37milyon in ganny bidzete pou konpetisyon *L’Afrique* ansanm avek *CJSOE*. Eski sa i pa devret vin konman en lankourazman pou nou bann *sportsmen* ek *sportswomen*?

E mon bezwen servi sa moman pou eksprim mon dezapwentman pou dir lo kote distrik *NSC* pa’n vreman zwenn zot lobligasyon. Malgre ki ti’n annan en sonm ki ti’n ganny bidzete.

E lo kote distrik St Louis nou annan en bon plan.

### **MR SPEAKER**

Onorab ou pe al dan 30 minit la.

### **HON SATHYA NAIDU**

Ok. Lo kote distrik St Louis nou annan en bon plan pou

kapab aranz nou lenfrastruktir sportif. Larzan pou sorti dan fon Gouvernman Lokal. E mon ekspekte *NAC* pou kapab donn nou lankourazman neseler.

E mon osi servi sa moman Mr Speaker pou lans en pledwari avek kominote biznes, pou vin devan. I aparet ki zot pa vreman konnen ki mannyer, eski zot kapab ganny en benefis ler zot pe ed kominote. An retour i annan en seksyon dan *Business Tax Act schedule 5’ approved gifts’* kot ou kapab *claim up to about 125 percent*.

E se la kot mon krwar Minister Finans atraver zot teknisyen i fer ledikasyon neseler, pou garanti ki nou kapab *tap into the business community* pou zot kapab donn nou en led. Mon rekonnèt ki i annan plizyer dimoun dan kominote biznes ki’n donn mon distrik en koudmen. E pou sa mon dir mersi.

E devan nou se en fitir anba Gouvernman *LDS* ki briyan. E pou tou bann dimoun ki pe ed mwan dan sa parkour pou nou kapab anmenn St Louis de lavan, e osi Sesel de lavan, mon dir mersi Mr Speaker.

**(APPLAUSE)**

### **MR SPEAKER**

Mersi Onorab. Bon nou a permet en pti letan pou *reboot* e nou a rebran 4er en kar. Mersi.

**(BREAK)**

**MR SPEAKER**

Laparol i pou Onorab Waven William.

**HON WAVEN WILLIAM**

Mersi Mr Speaker. Mr Speaker i vre ki zonm pa viv par zis dipen tousel. Me i viv par tou parol ki sorti dan labous Bondye Tou Pwisan. I evidan ki son lagras e faver i lo nou.

Napa lapay brile, zis li i sifi. En mo sorti kot li i ase. Not sa byen li ki la aköz liniver antye ek tou sa ki ladan i pou li. I fer sa ki i oule e ler i anvi. Son laglwar i pa partaz ek personn. Mr Speaker son laglwar i pa partaz ek personn.

Mr Speaker sa Bidze i en zoli Bidze. I en bon Bidze e Seselwa in ganny mete a ker ladan. Konman Manm Elekte distrik Gran Anse Mahe parey mon ti dir, ki mon pou siport tou mezir pou redres lekonomi Sesel. 2an apre mon vwar fri e mon vwar plis lespwar dan sa Bidze pou Grand Anse Mahe.

Oparavan pep in ganny dir ki i o sant devlopman kan an realite pep ti pe pas o bor devlopman ek limitasyon. E

zot ti fer sir ki pli lwen ki sa pep i gete, se pa pli lwen ki son bout nennen. An term politik Mr Speaker nou dir "*control the people to stay in power.*" En kalite filozofi politik Kominis, ki ti ganny pratike dan serten parti lemonn. Ki *LDS* in zet anba par demaske tou zot mansonz!

Gran mersi miltiparti e pli tar 15 lo 10 ki Seselwa ti konmans liber son lespri, pou mazin lo li menm, konn debout lo li menm, konn organiz li pou konmans pran responsabilite pou epanouisman. San reste depandan lo Gouvernman. Sete sa distorsyon. Anpes sa pep konn laverite par fer li krwar ki i pa pou kapab egziste san Gouvernman.

Mr Speaker Seselwa i en nasyon ki rezilyan. E pandan sa 2an nou'n temwanny sa. Sa kriz pa ti zis nasyonal parey an 2008. Sa kriz pandan sa detrwa dernyen lannen, in enpakte lavi imen nasyonalman e enternasyonalman. I montre nou ki nou bezwen pridan e saz pou fer fas ek lavenir, ek evantyalite enprevi sa monn deplizanpli enserten.

Pli ou pasiv, pli ou *careless* e pli ou les zot kontrol ou i resipi pou zot manipiliz ou e kasyet ou larealite. Sa i fason fer serten dimoun. Zot konnen lekel zot. Mon aret la

pangar mon ava *out of order*. Serten dirizan zot apel sa bann dimoun malere.

E olye tir zot dan trou zot fouy trou pli fon pou sa menm malere, dapre zot desann pli profon sa presipis. Pou pli tar redi zot e fer sa ki zot oule ler zot vin o pouvwar. Sa letan in fini Mr Speaker. Sa Gouvernman aktyel pou konble sa ban trou ki zot in fouye pou sa bann dimoun. Pou fer sir ki zot epanouir dan lavi ek zot fitir zenerasyon.

Mr Speaker mon lans en lapel zeneral zanfan pran zot ledikasyon serye. Veye dan kwa zot pe enplike e investir zot letan. Pa briz zot lavenir. Akoz serten parmi sa zenerasyon aktyel, i malere Mr Speaker i ras ker ki zot pe pas atraver. Zot paran, serten zot partner e zot zanfan pe viv anba bokou presyon ek larm dan lizye. Pa konnen ki pou fer.

Ki ler serten lord pe ganny mete e etabli par sa Gouvernman, serten zot kontinyen rouspete Mr Speaker. Get mannyer ki nou kontan zot. Get sa groser Bidze ki pe ganny investir dan ledikasyon pou asire ki zot ganny pli byen ankadre.

Mr Speaker set ek en gran plezir ki mon pou aprouv sa propozisyon Bidze 2023. Dan sa Bidze nou vwar devlopman kapital ki

Lopozisyon ti pe opoze lebra kase pandan sa 2an ek politik bon marse. mon a nonm enn de;

Fame Lopital La Digue,  
Proze lo bann por,  
Laranzman bann  
fasilite sportif,  
Nouvo kordgard,  
Nouvo batiman  
Ladministrasyon Distrik,  
Plis lakaz e plis semen  
ankor.

Mon lans en lapel avek bann zabitan Grand Anse Mahe nou pou ganny nou 40 *social house* an 2023. Mon demann zot bann fanmir pou pa aret peye. Pou kontinyen fer zot peyman ki a lavenir zot kapab benefisye en lakaz.

Mon apresye lanons Minis Finans ki la zabitan Grand Anse Mahe. E travayer e viziter ki'n ganny afekte ek delo polisyon La Misère e Barbarons, zot ava annan lespwar ki an 2024 si tou i mars byen pou ganny zot konpansasyon. Mon demann Minis Finans pou met en lekip an plas enkli reprezantan distrik, pou asire ki sa lalis final i kredib.

Mr Speaker si nou ti'n ekout zot nou ti ava pe ede touf pep Seselwa. Parey zot ti anvi touf mwan ek mon koleg Onorab Zialor.

*(laughter)*

**HON WAVEN WILLIAM**

La en keksoz ki zot kontan dir dapre zot pou met presyon dapre zot, “*to press for action.*” Si nou ti’n ekout zot sa manman de piti, sa malere e dimoun ki pe ekoute deor ki bor zot ti pou ete la Mr Speaker? Ou vwar Mr Speaker pa tou konsey ki ou ekoute e ou azir lo la. Mr Speaker se lavenir pep Seselwa ki zot ti pe toufe pou touye.

Mr Speaker atraver ou mon anv i ek Onorab Uranie ozordi in byen abiye e pe solider avek nou. Mon demann nou pou zwenn ek nou pou ‘pile’ pou keksoz arive. Mr Speaker la mon pa pe dir pil lo dimoun parey *United Seychelles* i sey *distort* realite. Si zis ou rise, ou bose, epi ou sey fer red pou fer Sesel monte, tro bokou prosedir la Mr Speaker.!

*(laughter)*

**HON WAVEN WILLIAM**

Ek sa ou bezwen apiye tou pou Sesel monte. Mr Speaker sa fason pa ditou *ease of doing business* sa. Sa se bann prosedir rentan ki nou pe pil lo la Mr Speaker. E pou kontinyen fer. Nou zis nou pile. En kalite pile pou menm rezon pou fer Sesel transformen Mr Speaker. Ek sa nou pe atak sa louvraz ek menm rezon nou tou ansanm.

***(APPLAUSE)***

**HON WAVEN WILLIAM**

Mr Speaker nou, nou serye. Nou en parti nou parol, nou pa pou egzazere me nou pou delivre. E in prouve dan sa 2an e pou kontinyen fer li pou Sesel. Eski sa Gouvernman pa pe perform pli byen ki sa lot Gouvernman oparavan?/ Ki ti annan otan plis resours e letan Mr Speaker. Me pa’n kapab fer parey *LDS*. La dir mwan lekel ki novis?

Seselwa ki pe ekoute si vre i konpran lekel ki mon pe dir Mr Speaker. Mr Speaker desizyon Gouvernman pa *blurry* parey zot in fer krwar lo zot zimaz remersiman pou zot katastrof le 6. Menm zot siporter pe dir ki la zot pe al tro lwen ek kasyet realite. Sa bann siporter in dir mwan pa nonm zot non.

Mr Speaker sa Bidze i transparan e napa fer krwar ladan. Tou i kler e detaye akoz i realis. Mr Speaker leksperyans i montre nou kot en match futbol dimoun pli konn tou se spektater ki pe gete. La si i en match pou nanryen pou annan plis zot. I a debout lo graden e dir ou tou sa ki ou devret fer e vey tou sa fot. Envit li pou zwe ouswa partisipe i kapab kit graden e taye e donn tou sort leskiz.



(laughter)

**HON WAVEN WILLIAM**

Mr Speaker foutbol pa zwe ek labous foutbol i zwe ek lipye.

Akoz ou ledan ek ou lalang pou reste lo laplenn si ou vin zwe ek labous !

(laughter)

**HON WAVEN WILLIAM**

Sirtou letan ou pe zwe ek en tim ki manbre. Konm dir zot menm olye prezant plan alternativ Bidze 2023 en sizesyon ek en sizesyon realis, zot konklizyon “se Bidze pa realis. Bidze pa pe isi e pa pe fer laba.” E zot kontradir zot prop lekor par demann ankor plis dan sa Bidze dapre zot “ki pa realis” Mr Speaker. Kan sa pep in note ki zot pa’n ede pou fer travay sa Gouvernman fasil.

Pou li donn sa pep sa pli meyer *deal* posib. Ler zot pa oule kanmi zot distort zot prop konfizyon. Ki ou espekte ek zot? Pep pe note sa lakanmizri lasos tomat. Mr Speaker sa Gouvernman responsab malgre tou lesey pou derout li, in swivre konsern sa pep pandan depi ler in ganny elekte.

Sa Gouvernman in pran aksyon e fer desizyon sarz e pridan dan Bidze 2023 in get priyorite pei e met sa pep a

ker. I pa pe fer krwar e fer ou sant “pti leker gro leker” dan sa tren nanm ek envizib.

(laughter)

**HON WAVEN WILLIAM**

Mr Speaker Bidze in prezante i pa mon lentansyon koz lo tou bann alokasyon la. Staz Komite pou permet nou depouy enn par enn. Mr Speaker prezan mon pou fer serten bann komanter ki mon santi i apropiye.

Mon obzerv pandan sa 2an se ki tro bokou letan pe ankor ganny pran pou en larepons. Zot pran tro bokou letan pou *deal malpractice*. I annan dimoun ki odasye ki dan plas 3mwan pe pran 6mwan pou donn en larepons Mr Speaker.

Serten i lav lanmen parey Pilat konmsi i pa travay dan sa sekter. Eskan ki tan ki nou pou kapab toler sa bann zafer Mr Speaker ? La mon demann Gouvernman pou *hands on deck* lo sa size par egzanp ki en *bedsitter* ki vid, pa pran plis ki 1an pou inisye prosedir pou repare e donner. Sa pa akseptab!

Nou bezwen etabli e mentenir lefikasite. Kordinasyon ant bann Minister devret pli frekan annou pa kontinyen travay

dan *silo* dir pou sanze me pa fer nanryen apre.

Mon apresye sa logmantasyon saler dan sekter piblik. Mon anvi lans en lapel avek Gouvernman pou revwar osito posibilite ki lekonomi i permet minimonm *wage* dan pei. Mon satisfè ki desizyon pe ganny pran pou anploy bann travayer *Cleaning Agency* dan sekter piblik. I pou fer ki Gouvernman i ava pli an kontrol mentenans e netwayaz dan sa bann diferan lenfrastruktir dan sekter piblik.

I pou osi donn sa bann travayer en pli bon sekirite lo zot saler le mwan e bann lezot benefis tel parey 13enm mwan saler. Mon demande ki travayer dan sa sekter i kontinyen donn zot tou, pou asir zot bann benefis ; - parey bann travayer *URS* zot kondisyon i pli favorab ozordi e zot konn zot kapasite ozordi Mr Speaker. E gras a Gouvernman *LDS*.

Mr Speaker mon osi kontan ki nou bann *carer* pou ganny en pli meyer *deal*. Anba en Lazans zot pou ganny formasyon e ganny evalye pou ankor plis benefis lo zot performans dan travay. Mon osi demande ki Gouvernman i war ki fason i kapab aziste saler bann dimoun aze ki malgre zot pou ganny sa R500 konpare ek bann ki pou tous

larzan sekirite sosyal e osi larzan pansyon, prenan kont ki letan sa logmantasyon saler i pran lefe, otomatikman pou osi fer monte kou lavi ankor.

Sa en laverite Mr Speaker. Lopozisyon pa pou oze dir Seselwa dan zot fer krwar, ki zot pe lager lebra kase pou malere. Si Seselwa pe pey 300 - R1500 pou tiket pou anmize, Lopozisyon pe anvi fer sa pep krwar ki i vreman pov. Sa ki zot pa ase brav poudir ek sa pep, se servi larzan logmantasyon ek lasazes e konn swazir zot priyorite pou depanse.

Mr Speaker sa ki sagrinan, se ki letan Lopozisyon zot depriv zot laservel pou fer sa ki byen, refize solider ek sa ki byen e aksepte larealite sa pei konman en pti leta zil, ek bokou limitasyon resours ki fek re balans son lekonomi, zot kontinyen kontrol laservel bann ki pli feb ensit zot pou desann lo semen. Parey zot ti fer serten met latet kabri e dans lo beton, be pa in ler pou zot fer enn dan zot *size* e dans lo sa beton zot tousel?

*(laughter)*

### **HON WAVEN WILLIAM**

Mr Speaker zot kontinyelman distort zot lentansyon si zot napa nanryen poudir pa dir nanryen. La mon *challenge*

zot pou pa vot lo sa Bidze zot ava war pli tar.

Mr Speaker mon lans en lapel ek Gouvernman pou rode idantifye e *welcome* bann nouvo lide. Bokou zenn e Manm piblik deor la, zot annan kontribisyon valab pozitiv, pou ed Gouvernman anmenn pli meyer solisyon ankor.

Annou regard ankor dan ki domenn kot Seselwa i kapab investir son larzan, par donn plis *shares* tel parey dan bann proze *IDC* parmi lezot, pou Seselwa asir plis sekirite e kreasyon larises personnel kot i posib. Mon repete kot i posib.

Nou bezwen eksplwat sa lendistri *blue economy*, *agroforestry*, servi plis teknolozi modern pou ankadre e ogmant abilite rezilyans pou sekirite alimanter. Mon apresye nouvo regar ki pe ganny vize ver sekter agrikol e valer azoute. Seselwa i en Nasyon ki pa kontan keksoz ki sonm, i kontan klarite pou sey anbet li kan in war pou li menm. E ozordi i kapab *google* e war ek son de lizye. Pa sey modifye pou fer krwar. I kontan klarite, lonnekte e lafransiz e i kler ki sa Bidze pe redonn plis konfyans avek realite.

Mr Speaker pou fer en bilan bref an, an bref Bidze

2023, Mr Speaker mon annan sa pou dir ;

Sa Bidze pe montre disiplin dan depans larzan piblik konpare ek oparavan. Sa Bidze pe ganny fer ek responsabilite ek latransparans. Gouvernman pa pe vin fer krwar parey ler lekonomi ti dan problem, zot ti kontinyelman dir nou ki tou keksoz i *ok*, dan lepase.

Mr Speaker, in montre en Gouvernman ki dan letan difisil in pran aksyon neserer ki ansyen Gouvernman pa'n oze pran, akoz i pa ti popiler e zot in trenn lipye lo la.

Mr Speaker Bidze i kler ki ler moman n'arive pou distribye larises rezilta sakrifis e travay dir sa pep, sa Gouvernman i fer li dek ki loportinite i donner. Mr Speaker i pa esper lavey eleksyon pou donner.

Mr Speaker, sa Bidze pe siport transformasyon ekonomik e transformasyon dan servis piblik pou anmenn efikasite ki ansyen Gouvernman pa'n oze met lord me zis konplent lo Komite Santral e kontinyen *business as usual*.

Mr Speaker mon konn sa tre byen. Mr Speaker sa Bidze pe amelyor lenfrastruktir ki'n ganny neglize e les avarye par ansyen ladministrasyon, ki zot zwe oubliye ki sete nou bann

aki sa, ki ozordi sa Gouvernman bezwen repar lamazorite.

Mr Speaker bokou lenvestisman pe ganny fer pou lazenes, pou realiz zot rev pou fer zot *think outside the box*, sorti dan sa bwat ki serten ti krwar pou kontinyen fer nou reste ladan Mr Speaker.

Plis lenvestisman dan servis sosyal e lasistans pou bann ki merite e bezwen, kontrerman ek en prensip Lopozisyon dan en fason iresponsab zot anvi nou fer depans tou la ozordi e pou pli tar dir si mon ti konnen. Mr Speaker bokou lenvestisman dan lenfrastriktir pou byennet nou dimoun e ki pou permet kreasyon plis larises ankor dan bann fason pli inovativ dan lankadremman pli efektiv e lib. Konpare anba en sistenm baryer olye en vre, en vre e fran fasilite.

Mr Speaker sa Bidze pe asir lenvestisman i al dan sekter kle e priyorite pou anmas plis larzan pou redistribye ek sa pep ki ti, ki ti pe ganny peze e meprize. Mr Speaker mezir pozitiv pou nou dimoun dan revizyon *income tax* e benefis taks non monneter.

Mezir ki pou ed bann aplikan ed zot lekor pou konstrir zot prop lakaz e fasilite zot letid avanse, ki si nou ti'n ekout sa bann fo profet avek

zot vye rikord lo sa vye granmofonn, Mr Speaker pandan sa 2an nou ti pou fouti.

Serten pou tant poudir mon ki mon'n benefisyé otan anba sa Gouvernman. Mr Speaker wi mon paran ti anvoy mon lekol pa pou sof sez !

*(laughter)*

### **HON WAVEN WILLIAM**

Pozisyon Anbasader Onorab *Leader* Lopozisyon, ti parmi enn stratezi pou retir tou bann ki en menas potansyel politik. Anvoy zot aletranze pou zot pa vin sa menas. Mr Speaker ozordi nou'n demaske tou zot bann mansonz.

Mr Speaker se atraver bann tel aksyon pridan e sarz ki Prezidan ek son lekip ki'n ganny rekonnet par lorganizasyon enternasyonal ki'n toultan reste disiplin e responsab dan son aksyon. Letan ki pep Seselwa in konfyé li pli o responsabilite posib dan pei, pou sirvey e administre byennet sa pei.

Mr Speaker ki anmenn mon anver konklizyon mon diskour poudir ek zot lot kote latab koze dir pou rebran Baie Lazare, Anse Boileau e Grand Anse Mahe, i rezonn byen dan zorey dan *rally* anba soley, sa *burger* e de labyer sa lasos tomat.

(laughter)

**HON WAVEN WILLIAM**

Anbet sa pep e dir li ki ANUS i sel opsyon pou Sesel. Serten bann ki'n swivre sa teat le 6 byen, sirtou bann ki reste Grand Anse Mahe, ki zot in fer ozordi mon zis anvi dir zot, zot pou toultan kriye" ipipip ek en ver vid."

Seselwa in demaske zot mansonz la. La pli pir zot in sey anbet zot prop siporter ek sa lavertisman remersiman, ki zot in aranz zimaz pase lo SBC, pou fer krwar ki sa tren ti ranpli, kan ni en toktok zot in preski pa kapab ranpli!

(laughter)

**HON WAVEN WILLIAM**

Mr Speaker diskour Bidze Minis Hassan in donn zot en pti latak laservel maske par en pti *flu*. Olye lans zot nouvo avyon *jeep* prive Erport, sa *jeep* in *overshoot* lo *runway* Anse Boileau, *burger* i lasos tomat savire, e sa ki ti la pa'n war sa tren aköz i ankor envizib Mr Speaker. I ankor envizib.

Sa ki vre se ki wi zot in ganny en bon *shower* parey dan eleksyon zeneral 2020, pou koz mansonz! Bomaten parey son Doktora ki i annan konman en ansyen ansenyan, ki pa anvi personn donn li

leson, in ankor enn fwa distort lenformasyon.

Sa se met keksoz an deor konteks ;- kasyet realite sa pep konm dir Vicky 'pep in demaske zot mansonz, mon manman sa en vre Papa Disik!"

(laughter)

**HON WAVEN WILLIAM**

Mr Speaker pou terminen mon remersi Minis Hassan ek son zenn lekip pou sa travay ekselan pandan sa 2an. I kler ki Lopozisyon zot laservel pa pou pous zot pou apresye sa bon travay.

Si bann diferan lorganizasyon enternasyonal in felisit ou tim, mwan osi mon pou felisit zot. Mon remersiman i osi al pou tou zabitan Grand Anse Mahe ki malgre serten zot in ankoler letan mon ti pe siport parol ki mon ti dir pandan kanpanny, kot mon ti dir ki mon pou siport desizyon Gouvernman pou bann mezir ekonomik ki bezwen ganny pran Mr Speaker. Mon repete ki ti bezwen ganny pran.

Mon lespri i kler ozordi pou desizyon ki mon ti pran an 2020. Mon remersi zot pou zot pasyans, konprenezon e zot sakrifis. Atraver ou Mr Speaker mon poudir Onorab ki ler mon ti pe debarke dan sa pirog nanm, mon ti konsyan ki

mon pe fer Mr Speaker. Mon ti konsyan ki mon pe fer.

Mr Speaker mon envit tou bann dimoun pou vin pli responsab e pli performan an 2023. An gran parti larepons e solisyon i avek nou dan distrik; koste fer ou lavwa tandé. Akoz i touzour annan en plas pou ou kontribisyon e ou prezans.

Mon profite pou remersi Maria, Rachel, Vanita. Mon osi remersi DA e son tou son travayer Ladministrasyon Distrik Grand Anse Mahe. E pli gro remersiman spesyal pou lekip aktivis LDS dan Grand Anse Mahe.

Mr Speaker Seselwa annou remersi nou Bondye pou son faver e benediksyon divin lo nou pei. Seselwa annou remersi nou Bondye pou son faver e benediksyon divin lo nou pei. Mon pe koz ek ou dan lakour ki pe ekoute ou sa travayer Seselwa e lazènes Seselwa, zis konpar performans Sesel an konparezon avek lezot pei.

Benediksyon Bondye i vreman bon e senser, akoz in ganny ekrir Mr Speaker,” *If my people who are called by my name would humble themselves and pray, I will heal their land.*”

Mr Speaker ou ek mwan - wi nou tou nou annan rezon pou selebre progre sa 2an mirak Sesel! Annou kontinyen

annan konfyans dan nou Bondye e nou menm. Sirtou dan nou Prezidan e son lekip ki pe travay dir. ANUS sel opsyon pou Sesel? Kontinyen regard dan binok.

*(laughter)*

**HON WAVEN WILLIAM**

Kontinyen bril lapay Mr Speaker mon pa war zot mwan! Mersi Mr Speaker.

***(APPLAUSE)***

**MR SPEAKER**

Mersi Onorab. Laparol i pou Onorab Churchill Gill.

**HON CHURCHILL GILL**

Mersi Mr Speaker. Bonn apremidi Mr Speaker, Minis, koleg Onorab, tou dimoun a lekout, spesyalman zabitan Baie Ste Anne. Mr Speaker tou sa ki nou dir sa ki nou koze i pa vedit i demontre grander nou laservel. Me i plito akoz lalang napa lezo alors i kapab bate 24 lo 24.

***(APPLAUSE)***

**HON CHURCHILL GILL**

Mr Speaker konman Manm elekte pou ditrik Baie Ste Anne Praslin mon le donn mon reaksyon lo Bidze Sesel pou lanen 2023.

I ekstrememan enportan ki tou dimoun dan distrik Baie

Ste Anne e Sesel i ganny byen eksplike ki vremen i annan dan sa Bidze. Ki fason i tous zot, ki benefis i annan, ki defi ki sa Bidze i anmennen pou zot.

Desizyon pou ogmant, pou ogmantasyon saler malerezman pa pe benefisyè zot. Tou Seselwa menm si lefe ki sa pri lavi pe tous zot i kler ki i pa pe tous zot. Nou frer ekser Seselwa kid an sekter prive pa pou benefisyè avek sa desizyon ogmantasyon saler.

Nou toutan ganny dir ki Sekter Prive i moter lekonomi. Eski pa sa bann travayer dan sa Sekter Prive ki pe fer marse sa moter? I toutafe normal alors ki zot osi zot devret ganny gete e ganny rekonnet pou zot travay dir.

Mr Speaker travayer Seselwa dan Sekter Prive i reprezant en poursantaz sibstansyel. Ler ou tir bann travayer etranze e sa i fer ki nou pe koz en kantite fanmir ki pa pe benefisyè e pa pe ganny touse. Menm si zot fer fas avek menm defi zot al dan menm magazen zot konsonm preski menm keksoz.

Ki fason alor eski sa bann travayer dan sa kategori pou *deal* avek sa reaksyon reel ki zot pou bezwen fer fas avek konpare avek travayer dan sekter piblik? Minis in dir nou ki i swete ki Sekter Prive i fer en keksoz pou zot travayer.

Minis me dan lenstans kot nanryen pa ganny fer, i kler ki sa bann dimoun pou bezwen sibir konsekans sa pri lavi don tou san splander.

Ki konpletman an deor sa ki ou'n dir nou dan ou prezantasyon Bidze konmkwa ki lobzektiv prensipal Bidze 2023, se pou redistribye larises pei sa travayer, sa travay dir ki tou Seselwa in fer pandan sa dernyen 2an. Minis eski konman en Gouvernman responsab, ou pa krwar ki en keksoz i bezwen ganny fer pou sa bann dimoun, pou adres sa disparite tre serye?

Mr Speaker dan mon distrik aktivite ekonomik prensipal se *tourism* e environ 80poursan lafors travayer i dan sekter tourizm. Sa i vedir ki tou sa 80 travayer, sa 80poursan travayer lo Praslin pa pou ganny okenn ogmantasyon. Ki sa i vedir pou zot?

Donnen sa bann depans ekstra ki zabitan lo Praslin i bezwen fer fas avek, zot pou ganny bokou difikilte pou zer zot Bidze lafanmir kot lakour. Dan sa sans sa Bidze pa pe soulaz zot ditou.

E de plis Minis in konfirmen, ki to lenflasyon prozekte pou lannen 2023 i espekte monte pou vin 4poursan. Mon konsyan ki Gouvernman napa kontrol lo

Sekter Prive. Sa i pa vedir ki en diskisyon pa kapab ganny inisye avek bann akter dan Sekter Prive, pou trouv en solisyon pou sa bann group travayer.

Mr Speaker Minis in osi anons nouvo *levy* lo pti, mwayen e gran lotel R25, R50 e R100 respektivman pou al ver proteksyon lanvironnman. Menm si Minis in dir nou ki sa pou osi aplik pou bann bato *charter*, Minis pa'n dir nou konbyen bato *charter* pou peye.

An plis ki sa eski ozordi dan Sesel nou annan en striktir ideal e byen konpreansiv, pou asire ki konman en pei nou pou antyerman annan kontrol lo tou sa bann biznes yot ki annan dan pei ozordi e zot pe vann bann lili flotan.

Fodre ki Minis i pran kont ki dan labsans en striktir kontrol efikas, konman en pei nou pa pou zanmen kapab *monitor* kantite domaz ki sa bann bato *charter* oubyen *liver board* i koze dan nou lanvironnman.

Nou pa zanmen konnen dan en fason konkret ki zot fer avek tou sa bann salte ki akimile abor. Nou pa konnen ki kantite domaz zot bann lank i koze dan lo nou bann koray. Espesyalman dan nou bann landrwa lakot tel parey Curieuse, Anse Lazio, labe

Baie Ste Anne, Grand Soeur, Petite Soeur, Coco, St Pierre, Anse Gouvernement e lezot landrwa ankor otour Sesel.

Minis i enportan ki nou ganny dir ki kantite *levy* sa bann bato pou bezwen peye. Lo kote nouvo rezim taks 2poursan lo reveni lotel Minis in fer nou konpran ki sa 11 gran lotel zot in kolekte en sonm reveni R4.76bilyon, me zot in pey selman R60milyon e sa in ganny peye par selman 4 gran lotel.

Minis baze lo sa lenformasyon, en estimasyon i fer ki an mwayen sa 4 gran lotel in pey zot anviron R15milyon. Si ou Minister i fer tou sa 11 gran lotel pey tou zot taks, ou ti pou'n anmas anviron R165milyon.

Bokou plis ki sa R118milyon ki ou'n prozekte avek sa 2poursan taks lo reveni. Donner en tel senaryo, eski vreman sa bann pti e mwayen lotel 24 a 50 lasanm ti vreman devret ganny takse sa 2poursan lo zot reveni.

Vi ki mazorite sa bann pti lotel zot bezwen pey diferan *commission* avek bann diferan Lazans deor ki vann zot e donn zot kliyan. Zis, zis akoz serten gran lotel pa onor zot konmitman. Minis i pou tre enportan pou benefis sa bann lotel ki kontiyelman pey zot taks a ler, konnen ki pou arive



avek sa 7 gran lotel ki pa'n pey zot taks.

Ozordi i annan bokou pti biznes ki'n bezwen ferm zot laport, menm si Minis in anons en sonm R50milyon pou sibvansyon to lentere lo *loan* R3milyon. Minis pa'n donn nou okenn detay ki manner sa pou marse. Konbyen lentere ki pou ganny sibvansyonnen.

Mr Speaker menm si serten konpanyen sekirite pe ganny Bidze alokasyon pou pey 13enm mwan saler, i regretab pou sa bann travayer sikirite ki zot anplwayer i lo kontra ki'n fini sinyen me sa letan pa ti enkli 13enm mwan saler dan sa bann lagreman. Menm sityasyon bann kontrakter avek *LWMA* ki anploy dimoun.

Mr Speaker Minis in mansyonn sa 25poursan lo karbiran pou bato kargo Praslin ek La Digue. Menm si sa lannons in ganny fer dapre operater bato kargo ki mon, mon'n koz avek, zot pa ancor ganny en dokiman ofisyel ki eksplik zot prosedir pou zot benefisye avek sa 25poursan lo karbiran.

Sa i fer ki zabitan Praslin pa ancor kapab benefisye avek sa rediksyon ki ti sipoze anmenn en soulazman pou zot. Mon demande ki operater bato kargo i ganny dokiman ofisyel ki klerman eksplik

prosedir ki zot bezwen swiv pou kapab benefisye avek sa rediksyon.

Mr Speaker mon'n note sa bann diferan alokasyon pou distrik Baie Ste Anne ki'n vini an rezilta travay ki mwan, mon'n fer pou zabitan konman zot Manm Elekte atraver bann diferan Mosyon e kestryon ki mon'n anmennen dan sa Lasanble pou benefis zabitan Baie Ste Anne;

Alokasyon pou stasyon teste veikil pou Praslin,

Alokasyon pou peyman konpansasyon pou zabitan ki reste otour stasyon elektrisite *PUC*,

Alokasyon pou konstrir nou Kordgard modern pou distrik Baie Ste Anne,

Alokasyon pou kontiyen travay lo lenfrakstriktir lo Ile Eve. Bokou dimoun pe espere ki sa bann travay i konplete pou zot finalman kapab ganny zot alokasyon pou konmans zot biznes.

Alokasyon pou renovasyon lo ansyen lasose ki pou ganny met a dispozisyon *Coast Guard*. Alokasyon pou renovasyon *building* ladministrasyon distrik.

Alokasyon pou kontiny travay lo lenfrakstriktir lo nouvo lasose pasaze Baie Ste Anne.

Mr Speaker dan Bidze tou Minister, i annan alokasyon pou transportasyon mon osi

note ki Minis in servi enpe sa larzan, bann Minis i servi alokasyon pou transportasyon bann Minis i servi sa pou fer vizit travay ki zot fer lo Praslin. Me selman bann, bann zabitan Praslin pa gannyen sa loportinite pou zot kapab war Minis parey zabitan lo Mahe, i ganny sa loportinite en fwa par semenn.

E zabitan Praslin ek La Digue zot bezwen pey dan zot pos pou desann Mahe pou kapab war en Minis. Mon'n deza demande mon le demann ankor ki bann Minis i servi en pe sa alokasyon transportasyon pou zot vin Praslin pou donn loportinite zabitan Praslin ek La Digue, pou kapab war zot lo Praslin ek La Digue.

Dan plas zabitan peye pou desann Mahe pou war zot, espesyalman dan sa difikilte bidzeter ki zabitan sa de zil i fer fas avek. Sa i a tonm dan kad amelyorasyon dan Servis Piblik ki Minis in koz lo la pou sa de zil.

Mr Speaker i regretab ki ler en biznes tre enportan pou zil Praslin tel konman biznes kargo, apre preski 6mwan negosyasyon e bokou kominikasyon an ekri pou eksplike e donn lenformasyon dapre ki prosedir i demande, la ler mon pe koze sa bann dimoun konsernen pa ankor kapab ganny en solisyon pou

zot kapab amelyor zot servis ki zot pe donn bann zabitan lo Praslin. En tel fason travay i retard progre.

Dan mon kapasite konman Manm Elekte pou distrik Baie Ste Anne, mon pou bezwen rod en lapwentman avek sa Minister konsernen pou war e konpran akoz ki en sitwayen ki bezwen bouze, menm apre 6mwan i pa Ankor kapab.

Mr Speaker bokou larzan in ganny mete pou Minister Lasante, par kont Lopital Praslin i ankor pe fer fas avek bokou defi; tel konman lespas nesaser pou delivre serten servis. Travay *maintenance*, serten lezot kalite servis ek lekipman nesaser, serten latizann. Mon swete ki parmi sa bann alokasyon bidzeter, sa bann defi i ganny adrese.

Mr Speaker mon osi note ki pou annan en seri odit lo senk lantrepriz piblik. Sa se *PUC, Seypec, Air Seychelles, IDC e STC*. Dan sa senk lantrepriz selman *PUC* ki son kont i ganny odite par Oditer Zeneral. Lezot lantrepriz piblik, zot annan zot oditer prive ki odit zot kont. Eski sa bann odit ki pe ganny anonse pou ganny fer par oditer endepandan?

Mr Speaker lo bann travay lentegrasyon lo lakot ki Minis in anonse i regretab ki sou distrik Anse La Blague

pa'n ganny mansyonnen. Vi ki laba osi kote gran lans ek pti lans in ganny bokou andomaze. Mr Speaker pou konklir Minis in fer resorti ki en vot R37milyon in ganny prozekte pou nou bann atlet partisip dan konpetisyon enternasyonal Zwe De Zil e Zwe Lafrik.

Dapre lenformasyon ki mon'n gannyen, serten atlet lo Praslin ek La Digue pe ganny serten difikilte pou zot form par dan Lekip Nasyonal. Menm si zot in fer bann performans tre remarkab dan zot bann disiplin respektiv, ki ti'n ganny *set* konman bann target pou kalifye.

Mon swete ki bann atlet Praslin e La Digue zot ganny sipor nesaser pou preparasyon osi dan sa alokasyon. E mon pe demande e ensiste ki *sportmen* Praslin ek La Digue i ganny zot sans kot zot merite parey tou atlet. Tou dimoun Sesel i konnen ki sa de zil i prodwir tre bon atlet o nivo dan plizyer disiplin.

Mr Speaker Minis in anonse ki tou etidyan ki etidye aletranze zot *stipend* pou ganny ogmonte pou zot kapab fer fas avek logmantasyon pri lavi, dan sa bann pei respektiv ki zot ete. Sa i merite.

Me akoz ki etidyan Praslin ek La Digue ki pe etidye lo Mahe dan bann lekol pos-segonder, pa'n ganny

ogmantasyon lo zot bann *allowance*, vi ki sa fleo pri lavi pe osi afekte Sesel?

Mr Speaker permet mwan pou remersye tou zabitan dan distrik Baie Ste Anne e asir zot ki mon pou kontinyen travay pou nou distrik kontinyen bouz devan.

Amelyor tou nou bann fasilite, kkontinyelman rod nou bann benefis dan Bidze nasyonal, parey zot pe kapab konstate sa ki pe arive dan nou zoli distrik. Ki mon pou touzour pouse pou arive e mon pou ankor pe pouse pou bokou plis keksoz ganny fer dan distrik Baie Ste Anne pou zot benefis.

Tou sa bann keksoz ki mon pe koz lo la, zot konnen ki mwan, mon'n inisy e sa i vedir ki zot in byen vote. E travay pe ganny delivre pou zot satisfaksyon.

**(APPLAUSE)**

**HON CHURCHILL GILL**

Nou annan serten travay ki nou'n konmanse ki mon pa ankor kapab ganny en rezilta pou zot. E sa se sa, sa fame lager pou nou ganny serten benefis lo resours ki ganny zere lo nou zil. Sa travay i en travay kontiyen, e tre byento mon pou kontiyen pouse pou ki sa Vallee De Mai ki lo Praslin, Praslinois i ganny serten benefis lo en baz

pousantaz, pou reflekte en *fair deal* akoz sa i sitye lo zil Praslin. Mersi Mr Speaker.

**(APPLAUSE)**

**MR SPEAKER**

Mersi Onorab. Mon ava apel Onorab Philip Monthy pou son lentervansyon.

**HON PHILIP MONTHY**

Mersi Mr Speaker. Mr Speaker i touzour en loner e en privez pou mon donn mon repons lo prezantasyon Bidze ki Minis Finans ti vin fer devan sa Lasanble Vandredi le 4 Novanm.

E pou sa mon pou touzour sezi sa lokazyon pou remersye tou mon bann zabitan Cascade ki ti fer mon konfyans dan dernyen eleksyon, pou akord mon sa privez pou vin zot lavwa dan sa Lasanble.

E mon osi pou remersye tou mon bann aktivis ki ti mars akote mwan pandan letan kanpanye e ki'n ede ki nou'n fer listwar dan Cascade. Mr Speaker sa legzersis pou donn nou larepons lo ladres Bidze prezante par Minis Finans, i enn ki sa lannen pou mwan, mon konsider konman istorik.

Akoz apre ki nou'n bezwen pandan sa de dernyen lannen vin la anndan pou eksplik pep Seselwa akoz in

neseser pou ki Gouvernman i pran sa bann desizyon difisil, kot zot pa ti pou forseman war okenn benefis direk deswit. Me o kontrer kot zot ti pe ganny demande pou fer sakrifis e annan pasyans e konfyans dan sa Gouvernman, ki zot ti desann an gran nonm pou elekte an 2020.

Ozordi i premye fwa dan listwar sa pti pei ki en Gouvernman atraver sa Bidze pe dir avek sa pep Seselwa mersi, pou zot konprenezon! Mersi pou zot kouraz! Mersi pou zot sakrifis e mersi pou zot pasyans.

E ki la prezan ki pei in sorti dan sa vag lensertitid ekonomik i moman pou zot osi benefisy e avek rezilta sa travay dir e tre byen kalkile ki sa Gouvernman in fer pandan sa 2an dan lofis ki sa Gouvernman presedan pandan 43an pa'n reisi fer.

Mon pe dir sa i premye fwa Mr Speaker akoz sa Gouvernman ki ti la avan nou, menm si pei ti pe byen fer ekonomikman e ti annan larzan pou soulaz soufrans sa pep, zanmen zot in annan sa kouraz e lavolonte pou zot fer li.

Zot in zis en Gouvernman ki'n koz plis dan plas fer aksyon. En senp legzanp ler nou ti pe demande ki i annan logmantasyon dan sekirite sosyal pou nou bann

dimoun aze, avan eleksyon 2016. Ki nou ti ganny dir? “Kote pou ganny larzan’, zis en Gouvernman iresponsab ki pou fer sa!” E nou bann *post* lo *Facebook* ki bann aktivis ti mete plizyer Onorab la anndan ki gognarde.

La selman le 26 zot pe al fer lamars pou demann Gouvernman pou ganny sekirite sosyal nou bann dimoun aze. Si sa pa ipokrit ki manner i apele Mr Speaker?

Akoz kan zot ler zot ti o pouvwar zot pa’n swazir pou fer tousala Mr Speaker, sa zot menm zot ki konnen. Parey Minis Finans ti fer remarke lot fwa i sanble mwan zot travay pli byen letan zot dan Lopozisyon ki ler zot ti o pouvwar.

Mr Speaker mon pou remersye Bondye pou lefe ki in met lasazes dan sa pep ki apel Seselwa. E fer ki in vin enn ki’n matir politikman e ki war klerman ki retar sa Parti *US* in met zot. En parti ki ti anvi reste o pouvwar dan dernyen eleksyon zis pou konsolid zot bann gen ek zot bann aki, ki zot in akimile pandan sa 43an lo pouvwar.

Zis parey Mr Faure ti fer nou konpran dan enn zot bann *rally* ler zot war ki zot bann privez ki zot ti abitye zwir lo lasyer sa pep in ganny koupe. E ki zot nepli kapab fer sa ki zot anvi fer, parey ti

abitye leka dan lepase, kot larises sa pei ti partaz zis antre dalon, zot devlop en laenn pou sa Gouvernman *LDS*, ki pe mank sonmey zis pou fer sir ki Seselwa i ganny en lavi ki pli meyer posib Mr Speaker.

La prezan ki sa paz nwanr nou listwar in vire e prosperite pe rennyen dan sa Sesel, ki pou premye fwa dan son listwar i appartenir pou tou son zanfan, sa pep pa pou zanmen les zot ganny anbete ankor avek sa bann zoli parol ki zis fer kontan zorey, me ki les Seselwa avek en vant vid pandan ki zot, zot pos ti kontinyelman ranpli.

Ler mon’n ekout ladres Minis Mr Speaker, premye remark ki ti vin dan mon lesprisetete ki sa parti ki konmela i apel son lekor “*A New United Seychelles*” i dan en manman problem. E ou ti, ou ti klerman kapab war sa lo figir la anndan dan sa Lasanble Mr Speaker aköz zot ti’n dezespware konmdir ansyen Onorab Ferrari. Zot dan gro problem Mr Speaker pou plizyer rezon e les mon a eksplike.

Ler *LDS* ti ranport eleksyon par en gran mazorite an 2020, plizyer dimoun ti dir ki lafen sa Parti *US* ti pros. E zot menm zot, zot ti konnen ki zot ti dan en sityasyon ki zanmen zot in war zot ladan, e zot pa ti tro konnen ki

manner zot pou redres sa bato ki kaptenn ti'n abandonnen.

Me Mr Speaker avek sa pandemik *Covid* ki ti tap lemonn antye e ki ti pe vin de pli an pli grav o moman ki nou'n ariv lo pouvwar, sa parti ti war en loportinite pou zot servi pou zot esey sov zot lekor.

Pandan ki lekonomi mondyal ti dan en gran difikilte, zot ti swazir en taktik pou fer sa pep krwar ki sete sa sanzman ki zot ti fek fer, ki ti rezilta sa bann tel sityasyon.

Zot ti adopte en prensip *boycott* tou sa ki sa Gouvernman ti vin avek ; -dekouraz dimoun pou al pran zot vaksen, *boycott* reouvertir nou lafrontyer e envant leskiz pou pa, pa partisip lo *High Level Committee*, kot zot ti a kapab pe aport zot kontribisyon zot osi pou ede sov nou pei.

Akoz apre tou Mr Speaker, sa pei i pou nou tou pe enport ou lopinyon politik. Me fodre ou vreman en patriyot ki napa laswaf pouvwar, pou ou kapab annan en tel sans patriyotizm e en grander lespri parey sa zonm ki apel Wavel Ramkalawan.

Me Mr Speaker priyorite *US* sete pa pou sov Sesel zot, akoz nou konn tre byen ki kalite ras zot ete. Akoz ler pei i prospere anba en

Gouvernman *LDS*, pou zot sa i en dezavantaz. Kontrerman avek *LDS* ki ler nou ti dan Lopoziyon kot serten desizyon ti ganny pran par sa Gouvernman *US* ki ti la o pouvwar sa letan.

*LDS* ti siport plizyer sa bann desizyon akoz parey ti ganny dir souvan par Onorab Ramkalawan sa letan, "si i bon pou Sesel, savedir i bon pou nou e nou *ok* avek sa e nou pou siporte". Be *US* pandan sa 2an ki zot in dan Lopoziyon pa'n zanmen annan sa grander lespri pou adopte en tel lapros, akoz zot sel motiv sete tou fer tou posib pou ki Sesel i *collapse*.

Me malerezman pou zot e erezman pou sa pep ki apel Seselwa zot in *fail* mizerableman. Apre zot a vin dir nou ki Seselwa pe kont zour pou 2025 arive, pou tir sa Gouvernman e remet zot lo pouvwar! Seryezman?

Mr Speaker atraver ou mon pou dir Onorab Vidot, priye pou ki 2025 pa arive. Akoz avek zot laplenn lanmwatye vid e son senk vot an plis ki i ti gannye dan dernyen eleksyon Roche Caiman. E ler mon'n ekout son *speech* 15minit ki in fer la apremidi 2025, i riske pli pir pou li avek son parti ki sa ki ti arive an 2020.

Akoz mon'n dir ki zot dan problemm Mr Speaker, akoz

zot ti krwar ki sa Gouvernman ki la i enn ki ti pou pran zot traka e deroute dan son travay, kot nou ti a war en pei lo son zenou e faid parey zot ti fer an 2008 e la zot ti a selebre.

Me erezman sa Bidze ki Minis in vin prezant ek sa pep, i enn ki'n montre zot ki nou annan en Minis Finans ki aktyelman konn son *stuff* parey nou dir. E ki ler in *set* son konpa lo en direksyon napa vwale. Erezman ki nou annan en lekip solid kot sa Minister ki pe travay pou byennet sa pep, e ki pa pe travay anba okenn presyon politik pou zis pran bann desizyon popilis ki fer kontan zorey me ki kit en gou anmer dan labous sa pep apre.

E Minis Hassan fek fer sa sorti tre kler dan son *interview* lo *SBC* Mr Speaker. Kot in fer kler ki bann desizyon popilis anba son *watch* pa pou zanmen egziste.

*Sri Lanka* ek Langleter i de pei ki'n swazir pou al dan laliny popilis parey ki si *US* ki ti la lo pouvwar zot ti pou swazir pou ale. Gete ki sityasyon zot ladan. La aktyelman Mr Speaker e Sesel pou dan ti pou dan sa menm sityasyon ozordi, si sete zot ki ti'n ranport laviktwar an 2020.

Parey nou konnen Mr Speaker, Minis i vini e Minis i ale, me prensip i reste e prensip *LDS* se travay dir e

pran desizyon ki saz pou byennet pei. Menm si sa i vedir ganny kritike e gognarde e perdi detrwa vot si i nesaser. E kritike nou'n gannyen pandan sa 2an ki'n pase Mr Speaker. Sa in souvan fer mon mazin sa koze ki dir, "si ou lapo pa epe, pa vin dan politik".

E mon asire ki parey mon, mon bann koleg osi zot in mir la ater e napa personn ki pou fer nou vwale avek zot bann kritik mal fonde e souvan malisye. Ler mon'n analiz sa Bidze Mr Speaker i kler ki sa plan ki sa Gouvernman dizour in adopte i pe marse. En plan kot parey Minis in fer nou remarke, kot premye lannen dan lofis, priyorite sete pou stabiliz sityasyon ekonomik pei, relans nou lekonomi e mentenir en disiplin strik e pa vwale menm si nou konnen ki nou ti pou ganny atake partou kote avek nou bann oponan.

Mr Speaker, fodre pa ki nou pep i bliye aköz parey mon pou toultan dir nou en pep ki annan tandans pou bliy vitman. Fodre pa ki nou bliye ki an 2020 Sesel ti pe fer fas avek pli gro kriz ekonomik dan son listwar, e ti enportan ki nou sirmont sa defi a tou pri pou evite ki nou tonm dan en sityasyon katastrofik, tel parey nou war arive avek plizyer pei.

Ler mon tann Minis dir ki zis dan 60 zour larzan pou pey saler Sesel travayer Seselwa ti'n fini. Mon demann mon lekor si zot mazine ki kantite presyon ti annan lo sa Minis ki la devan, e lo nou bann dirizan? Sa Mr Speaker Seselwa fodre pa zanmen bliye sa.

I enportan ki Seselwa pa bliye kot nou sorti e ki nou rekonnet ki si sa ladministrasyon ti'n mal kalkile e adopte sa lapros popilis ki sitan popiler avek Parti US ek zot bann Manm ki reprezant zot la anndan dan sa Lasanble, kote nou ti pou ete la ozordi?

Ler nou kapab realiz sa nou pou dan en pozisyon pou pli byen apresye e zwir rezilta sa travay ki la aprezan pe ganny pase avek sa pep ozordi. E se sa, sa transformasyon ki Prezidan Ramkalawan in koz sitan lo la. E Seselwa pou konmans santi sa vre transformasyon avek sa Bidze Mr Speaker atraver lezot Bidze ki pou vini a lavenir.

Sa Bidze i enn ki pe prevwar 1.4bilyon pou bann proze kapital kan Onorab Cosgrow atraver ou Mr Speaker ti pe dir nou kennsel tou proze kapital pei. En Bidze ki pe propoz 1.2bilyon pou proteksyon sosyal, kan nou pe ganny akize konmkwa nou napa en leker pou nou

pou bann ki pli vilnerab be sa 2, 1.2bilyon ki la dan sa Bidze kwa sa Mr Speaker larzan *forgo?*

En Bidze ki pou premye fwa pe propoz en logmantasyon saler 10poursan lo saler tou travayer dan Sekter Piblik e sa Mr Speaker pou ganny kalkile lo saler de baz apre ki bann *allowance* in ganny konsolide. Sa i pou fer ki travayer pou benefisy e pou osi en gran lavantaz pou zot ler zot al, zot pe al apros zot labank pou ganny en *loan* e ler zot pou ganny zot 13enm mwan saler.

En Bidze ki pe fer provizyon pou rekonstri nou bann lenfrastruktir sportiv ki'n ganny negligize e abandonnen par sa ansyen Gouvernman, e ki dan en leta enpitwayab la aktyelman. I fer lapenn Mr Speaker ki tou sa progre ki bann Onorab lo lot kote latab i dir nou zot Gouvernman in fer, selman nou Lekip Nasyonal Foutbol pe bezwen al zwe nou bann *home matches* Moris.

Kot dan li menm ou pa kapab apel li en *home match*, akoz i pe ganny zwe lo later Morisyen olye lo later Seselwa. Si sa Gouvernman US ti'n fer son travay byen kekfwa lekip foutbol St Michel ti ava kapab vin premye lekip Seselwa, pou kalifye staz group dan konpetisyon Klib Lafrik, prenan kont ki zot ti fer



viktwar 1 lo 0 lo zot oponan Moris.

Si sa lekip in kapab fer en tel rezilta laba Moris, lo nou prop later lekel ki pa dir ou ki sa *score* ti a kapab pli gran e donn lavantaz sa lekip lokal pou kalifye e ki ti ava en loner pou foutbol Seselwa.

Sa kalite sityasyon kot sa Gouvernman *US* in sitan negliz nou bann *sportsmen*, atlet e lenfrastriktir spor, li menm li ki mon apel "*gross inefficiency*" Onorab Cosgrow atraver ou Mr Speaker.

Sa Bidze Mr Speaker pe osi prevwar pou rekonstrir oubyen repar nou bann lenfrastriktir skoler ki la osi i montre ou *gross inefficiency* sa ansyen Gouvernman.

Ki manner ou ekspekte rezilta *IGCSE* avek *A Level* i amelyore, ler ou war leta ki serten nou bann lekol i ladan? Tousala pe ganny adrese par sa Bidze Mr Speaker ler nou koz lo kales kase, sa kales ti'n kase menm Mr Speaker.

*Basic maintenance* ti pratikman non egzistan e gaspiyaz ti rennyen partou. Menm si apenn 2an pase larzan pou pey travayer ti enn bann preokipasyon mazer sa Gouvernman *LDS*, ozordi nou war nou pe kapab investir dan lenfrastriktir pei e an menm tan donn en logmantasyon saler signifikan sa pep la deor.

Enn bann pli gran defi nou Gouvernman Mr Speaker se reform dan Servis Piblik nou'n erit en Servis Piblik kot letarzi e trenn lipye i rennyen. Sa pa fek arive la anba sa Gouvernman, me i annan ki pe tir zot fristrasyon politik lo sa pep, e sa fodre ki i arete e ler aksyon pou ganny pran, annou pa kriy viktimizasyon politik.

Mr Speaker ler ou pran kont sa kantite defi ek lensertitid ekonomik ek finansyel ki nou'n fer fas avek pandan sa de dernyen lannen, mon pou kapab kantmenm sa dir tre for ki mon satisfes avek lakantite devlopman e proze ki nou'n kapab konmanse e osi konplete dan mon distrik Cascade.

Pandan ki nou ti pe ganny dir abandonn nou tou proze kapital kot sa ti vedir aret fer lakaz ki ti pou benefisyen nou pep, nou'n war sa proze 24 *unit* lakaz ki ti'n sezi dan semen ganny konplete e 24 nouvo fanmir, in kapab ganny en lozman konvenab pou zot ek zot fanmir.

Annou pa bliye Mr Speaker kantmenm nou pe tann dir nou pe zis vin koup riban lo bann proze ki ti'n deza konmanse, mwan, mon poudir zot ki sa piti ki zot in konsevwar la nou ki'n fer li ne e sonny li pou fer li grandi.

Akoz si nou ti ekout *US* sa 24 fanmir, la ler mon pe koze ti pou ankor dan zot menm sityasyon difisil kot zot ti pe reste ,e sa proze ti pou ankor tel parey nou ti vin zwenn li. Se sa ki ti pou realite Mr Speaker si sa Gouvernman ti'n ekout Lopozisyon.

E la mon pou profite poudir tou zabitan Cascade ki pe aktivman kontribye lo lalis lakaz kontinyen avek zot kontribisyon, aköz nou pa'n zis konplet sa enn premye 24 *unit*, me ki dezyenm faz sa proze ki vedir en lot 24 *unit* pou al konmanse tre byento.

Mon konnen ki plizyer zot in fristre aköz zot santi zot ti'n merit ganny zot lakaz dan sa dernyen alokasyon, e mon pou antyerman dakor avek zot Mr Speaker. Me ler ou annan 109 dimoun ki pe aktivman kontribye e anviron en karantenn ki ou kapab konsider konman priyoriter, i pou difisil pou satisfere tou dimoun prenan kont ki dan sa 24 *unit* Gouvernman i pran 4 pou *national quota* e ou annan 8 *unit* ki'n al dan *relocation*.

Sa in les nou avek zis 12 *unit* pou *allocate* e sa legzersis in ganny fer dan latransparans avek partisipasyon tou Manm lo Komite. Annan dimoun ki'n ganny lakaz Mr Speaker ki ti lo lalis depi 1998. I annan ki ti'n menm ganny dir ki zot pou

mor dan sa pti lakaz an tol kot zot ete.

Parey sa madanm ki ti koze in dir i ti lo *black list* e ki la prezan i bezwen lo *white list* nou pou kontinyen tir dimoun lo sa *black list* lakaz Mr Speaker. Me pa zis sa ,menm bann dimoun ki zot lopinyon politik i diferan avek sa ki pou mwan, in osi ganny lakaz e nou pou kontinyen avek sa travay dan latransparans.

Avek konplesyon dezyenm faz proze, lezot fanmir a byento benefisye e mon pou lans en lapel avek nou bann zenn profesyonnel dan distrik. Ki a la resers en lozman e ki *meet* kriter pou proze *self finance* pou vin devan. I annan 32 *unit mid-range condominium* ki pou ganny anonse byento anler kot masin koltar ti ete. Vini e pran *ownership* zot desten pou ganny zot prop lakaz.

En lot proze mazer ki nou'n reisi konplete Mr Speaker, se nouvo por lapes artizanal ki nou bann peser pe sitan espere, ti pe sitan espere. E la ankor in ganny dir ki nou'n vin koup riban bann proze ki *US* in konmanse. Mr Speaker bazar Cascade in ganny finanse par Linyon Eropéen anba en fon apele *Sectoral Support Fund* ki an egzistan depi 1984.

Sa fon i la Mr Speaker me sa Gouvernman *US* ti pe zis

asiz lo sa larzan ziska en moman Linyon Eropeen ti pe menase pou aras zot sa larzan, e zot ti bezwen taye al fer en pti bout lasose. Apre tou sa lannen ki nou bann peser ti pe vann pwason ater lo palet dan bann kondisyon lizyenn ki pa akseptab sete nek lavey eleksyon 2020 ki zot ti decide pou demar sa proze.

Ler mon'n antre dan lofis *MNA* Mr Speaker mon'n a sak fwa ki mon'n zwenn Minis Ferrari profite pou kestyonn li lo lavansman sa proze. E ki nou ti decide fer an atandan, se fer en bazar tanporer pou tir nou bann peser dan sa kondisyon deplorab ki zot ti ladan, menm si annan ki ti pe opoze e ti pe dir nou les sa bann zans la ater dan zot labou.

Me Mr Speaker nou pa'n fer sa nou. Nou'n konstri en bazar tanporer aköz nou ti war li neser pou pran swen avek sa kominote peser, ki pe travay dir pou asire ki Cascade i reste touzour sa referans kot pwason fre i konsernen.

E pa zis sa ,nou'n osi aport plizyer kontribisyon anver sa proze ki fer li sa ki i ete ozordi. E la mon pou profite pou remersye Lasosyasyon Peser Cascade, ki mon'n asire ki bann prosedir neser in ganny fer e ki prezan Cascade i annan en Lasosyasyon ki legal.

En lot kontribisyon ki nou'n fer Mr Speaker se ki menm si sa i en proze *SFA* ,nou'n fer sir ki sa bout kot ti pe vann legim i ganny renove, e kontinyen ofer sa servis nou zabitan en keksoz ki pa ti pou leka.

Mr Speaker menm fas a en mank resours finansyel, plizyer lezot proze dan distrik in ganny konplete. Mon bann zabitan anler Anse Dejeuner ki pandan 10an ti pe soufer avek sa sityasyon semen kase, kot lanbilans e plizyer transpor pa ti pe kapab monte, aköz lafason ki sa Gouvernman avan ti'n azir gro lebra lo later prive dimoun, mon'n reisi rezourd sa problem e mon kontan ki zot soufrans in finalman ariv a son lafen.

Bann lenfrastruktir sportiv ki'n ganny neglize pe ganny adrese. Menm avek serten retar nou *multi-purpose court* i enn ki'n ganny en nouvo vizaz. E nou pou kontinyen avek renovasyon bann laplenn foutbol ki swa dan Cascade santral e osi byen ki dan bann sou-distrik.

Nou'n lans nou dan en kanpany renovasyon nou bann *bin site* e konstriksyon sa ki nouvo e la mon sipliy avek bann zabitan pou silvouple servi zot byen e aret polye nou zoli distrik.

Mr Speaker mon personnelman angaze pou fer

sir ki serten nou bann *businessmen* dan distrik, ki pe fer fas avek plizyer difikilte pou *operate* zot biznes, i ganny en landrwa konvenab pou zot.

Avek vizit ek diskisyon ki mon'n fer avek Lotorite konsernen, mon espere ki byento nou ava annan en solisyon pou zot. Mon fortman angaze pou ki serten proze semen ki pou ede soulaz soufrans mon bann zabitan i ganny konplete.

E la Mr Speaker, mon pou profite pou fer konpran mon bann zabitan ki pe esper en semen pou plizyer lannen ki proze semen pou ganny fer. Me, e mon repete me, dapre finansman ki nou annan e baze osi lo permisyon ki nou gannyen avek bann propriyeter later prive. Mon pa pe vin bat latet personn akoz parey mon ti dir napa baton mazik.

Sa, sa ki nou kapab fer nou a fer sa ki nou pa kapab nou ava anvoy li pou pli tar ler mwayen i a permet nou. I annan demann de pli an pli pou ki Cascade i annan son prop *day care* Mr Speaker mon krwar nou tou nou konnen ki'n arive avek sa *day care* ki ti la.

Demars pe al konmanse pou ki parey lezot distrik, Cascade osi Bondye pitye dan en lavenir pros a ganny en *day care*. E bann paran ki pe war

zot pe bezwen al dan lezot distrik pou ganny sa servis a kapab ganny en soulazman.

Sant kominoter Cascade in brile preski 10an pase Mr Speaker, mon soulaze ler mon war en alokasyon dan sa Bidze ki vedir Cascade a ganny son sant kominoter tre byento finanse antyerman par Gouvernman Sesel.

Sa bann zenn ki mon war zot pe fer zot laklas ladans dan en biro ava annan en landrwa apropiye pou fer zot aktivite. E lezot zenn a kapab annan sa fasilite konvenab pou angaz zot dan plizyer lezot aktivite, ki ava kit zot angaze e evite ki zot tonm dan bann aktivite ki pou detrir zot lavenir.

Mon pou personnelman envit sa bann ki pe dir nou en "Gouvernman koup riban" pli prezizeman Onorab Vidot Mr Speaker pou li vin koup sa enn ler sa enn sa proze ler i a konplete Mr Speaker.

Renovasyon batiman Ladministrasyon Distrik osi in ganny prevwar dan sa Bidze;- en batiman ki ler ou pe gete parey i leka dan plizyer lezot distrik, ou pou war klerman sa nivo neglize e labandon ki sa Gouvernman lepase in fer avek. Pourtan Mr Speaker sete sanmenm landrwa ki zot ti servi pou fer tou zot bann travay politik, kot anler ou ti a krwar sa ti zot propriyete personnel.

Sa Gouvernman ki la Mr Speaker i pa vin fer politik kot Ladministrasyon Distrik. Me i plito angaze pou donn sa landrwa son respe e donn li sa konfor ki i merite pou deservi tou zabitan Cascade san eksepsyon.

Mr Speaker pou distrik bouze *MNA* tousel avek *DA* e Gouvernman tousel pa pou kapab fer sa lo nou menm. Nou bezwen langazman tou zabitan ki annan lanmour pou nou distrik byeneme pou vin donn en koudmen. Mon pou ankor profite pou lans en lapel avek kominote biznes ki baze dan distrik Cascade, pou devlop sa kiltir apartenans dan kominote e pou ede finans bann proze ki pou benefisye nou zabitan.

Mon pou profite pou remersye *Rotary Club Coco De Mer* ki'n apros mon e pe aport zot sipor pou konkretiz plizyer proze ki nou'n tonm dakor lo la. Enn parmi ki pou benefisye bann zabitan Petit Paris dan rezyon laboutik Ramesh pe ganny prevwar pou konmans e terminen avan sa lannen i fini, si tou keksoz i al byen.

Letan mon pe terminen Mr Speaker, mon pou osi remersye mon *DA* Manmzel Beguitta Melanie, mon *clerk* Lynn, e tou bann lezot *staff* kot Ladministrasyon Distrik ki ansanm menm avek plizyer

defi nou pe travay pou byennet sa distrik ki apel Cascade.

Sa travay Mr Speaker i pa enn ki fasil, me otan ki mon la mon oule asir mon bann zabitan, ki mon pou touzour travay dan en fason onnet avek byennet distrik e zot zentere a ker. E mefye zot avek bann ki pe lager lebra kase zis pou vin anrisir zot lekor ankor.

Sa Gouvernman *LDS* ki la i pou la pou ankor plizyer lannen Mr Speaker. E mon pou zis dir sa parti ki apel *United Seychelles* kontinyen reve zot. Sa pep ti met zot ater an 2020 e an 2025 zot pa pou ater me zot pou anba later. Mersi Mr Speaker.

### **MR SPEAKER**

Mersi Onorab. Bon avan nou separe mon oule fer en pwen mon'n remark bann zwe lo mo ki Manm *LDS* pe fer lo non parti Lopozisyon. Mon oule dir i annan en fason pou adres en non e mon aksepte ki zot apel li *A New United Seychelles* parey zot in abitye, me selman mon pa war bann akronim ki zot pe servi i akseptab.

E sa aköz ler enn in konmans servi lezot i le al pli lwen ankor e fer li pli gou. Donk mon pe demann zot pou evite si zot le servi li, servi li an deor Lasanble e pa dan Lasanble.

Mersi pou zot  
partisipasyon ozordi. Mersi  
pou Minis osi. Nou *adjourn*  
ziska demen maten 9er.

**(ADJOURNMENT)**